

如岑法師輯

思歸集

佛陀教育基金會印贈

一切佛經，及闡揚佛法諸書，無不令人趨吉避凶，改過遷善。明三世之因果，識本具之佛性。出生死之苦海，生極樂之蓮邦。讀者必須生感恩心，作難遭想。淨手潔案，主敬存誠。如面佛天，如臨師保。則無邊利益，自可親得。若肆無忌憚，任意褻瀆。及固執管見，妄生毀謗，則罪過彌天，苦報無盡。奉勸世人，當遠罪求益，離苦得樂也。

重印思歸集序

嘗聞世稱佛法利生，惟鮮有言及出要者；知出要矣，又復忽於淨土之門，幸逢知識，誘掖介之，欣欣焉相率而趨之矣。涉其津見，夫浩瀚無際，又生畏縮焉，終至逡巡以退。所謂魚子菴摩羅花，豈不信歟。或有進退未決，徘徊無所，及聞淨僅三經，又易其簡，復起鼓進，循其途入漸深，始悟三經不過淨法之三綱，綱若舉，目全張，則帝網群珠，有重重無盡者矣。古德云：千經萬論，處處指歸。若期諸事理一心，捨夫群經論議，惡能明其法，而行其實哉。境造乎此，不免又有仰彌高，鑽彌堅之歎，欲止不能，欲進莫由，其不困躓者幾希。西蜀高僧，如岑上人者，承靈巖之衣鉢，深得念佛三昧。憫末法鈍根，不可大受。乃選經論念佛旨趣，及歷代祖師法言，彙為一編，曰：思歸。

集。納大千於一指，藏須彌於芥子，更從而鈎玄提要，抉摘窈微，能手一冊，何異淹通淨藏，學既無畏而復縮退，是真不知有生死之可畏也已。此集悲切權巧，堪謂蓮海疾舟，然賭卞和之璞，能識其為美玉者，衡鑑教下，似又不多見也。古閩陳居士煌琳，靈巖之高足，篤於淨學，一讀而深契之，適其王考妣百週冥紀，思追劬勞，曰：報恩之大，莫若述先志也。先考妣崇佛，好濟眾。今之世與心，溺俱深矣，能濟之者，其為佛法乎？若畏而難之，有淨法在，仍畏其繁，有斯集焉。故重刊廣布之，俾眾生登此疾舟，有不出要者乎？斯舉也，為宏道歟，為利生歟，或專為孝思歟，抑為岑上人之知音歟？予惑不能辨，問諸達人。達人笑曰：一舉而眾德備，既備矣，不亦善乎？與其徧計而執其偏，曷若權實而融其圓哉？予豁然投筆，拜其言。

中華民國六十年辛亥端陽後三日 李炳南敬序

思歸集發刊序

淨土法門。其大無外。如天普覆。似地均擎。上之則等覺菩薩。不能超出其外。下之則逆惡罪人。亦可預入其中。誠可謂三世諸佛之總持法門。一代時教之特別妙道也。但以法門大而攝機溥。用力少而得效速。致稍通宗教者。皆藐視之。謂為愚夫愚婦之修持法門。而不知佛力自力之大小難易。不可以語言文字形容也。以一切法門。依戒定慧力。修到業盡情空地。位方有了生死分。業盡情空。豈易言哉。斷見惑如斷四。十里流。況思惑乎。縱令見地高深。以煩惱未斷。仍舊輪迴。再一受生。退者萬有十千。進者億少三四。自力之不足恃。敢矜己智。而不隨順如來誓願。攝受之道乎。修淨土法門者。但具

真信切願。志誠懇切。如子憶母而念。其平素所作所為。不與佛法世誼相悖。則臨命終時。蒙佛接引。往生西方。縱絲毫惑業未斷。帶業往生者。其所得尚超過業盡情空之阿羅漢上。以種性不同故。況已斷者。又何待言。以佛力不可思議。法力不可思議。眾生心力不可思議。合此佛法二不可思議之力。俾自心之力。得以圓顯。（此自力與不仗佛法力之自力迥別。）固與專仗自力者。奚啻恆河沙數之天淵懸殊也。是知此之法門。不可以一切普通法門之道理論。以是特別法門故也。余嘗有聯云。法門廣大。普被三根。因茲九界同歸。十方共讚。佛願洪深。不遺一物。故得千經併闡。萬論均宣。華嚴普賢行願品。盡華藏世界海法身大士。十住。十行。十迴向。十地。等覺。四十一位。均一致進行。依普賢菩薩教。以十大願王功

德求生西方。以期圓滿佛果。彼矜己智而藐淨土者。為超過此諸菩薩之上。為是喪心病狂。求升反墜。弄巧成拙也。宏揚淨土經書。多難勝數。如岑大師。錄其佛菩薩祖師。及近世各學人言論。（近世知識稱為學人者。以前有佛菩薩祖師故。切勿疑訝。）名思歸集。祈光作序。光少不努力。老無所能。但將五十九年所信之義書之。以塞其責。聊表普願同倫。同生西方之愚誠。至於大智慧人之譏誚唾罵。所不計也。爰為之歌曰。應當發願願往生。客路溪山任彼戀。自是不歸歸便得。故鄉風月有誰爭。思歸諸君。祈各注意。

民國二十八年己卯冬至前三日 七十九歲粥飯僧釋印光謹撰

題思歸集

截句十首

- ① 萬論千經語義繁。纂歸一卷便流觀。
分明說與還家樂。好作豐碑指路看。
- ② 佛言祖語輯精賅。淨土詩成正可懷。
漫道有家歸未得。鄉心無盡似西齋。
- ③ 背父飄流五十年。現成家業在西天。
思量金臂遙垂處。忍使如來望眼穿。
- ④ 業盡情空未易幾。法王方便妙難思。
而今識得還鄉路。驀直趨歸七寶池。
- ⑤ 娑婆樂少苦尤多。欲斷生因可若何。
浪子還家真樂事。原來慈父是彌陀。
- ⑥ 佛念眾生如憶子。眾生背父久離鄉。

莫教逃逝長違遠。功德池中水正香。

⑦ 輪迴萬劫與千生。早備資糧信願行。

十萬億程原在即。未應邊地住疑城。

⑧ 迷途未遠莫遲回。準擬蓮邦歸去來。

到得家園團聚處。藕花香裏坐金臺。

⑨ 七重寶樹燦光華。九品香臺四色花。

都攝六根成淨念。始知安養是吾家。

⑩ 法聽樓閣玲瓏處。身在毫光照耀中。

水鳥風林都唱佛。無邊樂事是蓮宗。

書雲黃覺 三十年正月上元日

思歸集卷一

印光法師鑑定

思歸子釋如岑敬輯

飯命發願偈

飯命西方佛法僧。願乞慈悲冥加被。

令依是集修學者。悉得往生證不退。

本師釋迦牟尼佛。梵語釋迦牟尼。此云能仁寂滅。釋迦是姓。牟尼是名。佛譯覺者。當中國周昭王二十六年。四月初八日。示生於中印度。迦毘羅國王宮中。為太子名悉達。父王名淨飯。母名摩耶。從右脅生。十九出家。三十成道。說法五十年。住世八十載。滅度於拘尸那城。娑羅雙樹間。時周穆王五十三年。二月十五日也。詳如別傳。

佛說阿彌陀經云。從是西方。過十萬億佛土。有世界名曰極樂。其土有佛號阿彌陀。今現在說法。又云。彼土何故名為極樂。其國眾生。無有眾苦。但受諸樂。故名極樂。又云。彼佛何故號阿彌陀。彼佛光明無量。照十

方國無所障礙。是故號為阿彌陀。彼佛壽命及其人民無量無邊。阿僧祇劫。故名阿彌陀。又云。眾生生者皆是阿鞞跋致。其中多有一生補處。其數甚多。非是算數所能知之。但可以無量無邊阿僧祇說。又云。眾生聞者。應當發願。願生彼國。所以者何。得與如是諸上善人。俱會一處。又云。若有善男子。善女人。聞說阿彌陀佛。執持名號。若一日。若二日。若三日。若四日。若五日。若六日。若七日。一心不亂。其人臨命終時。阿彌陀佛與諸聖眾。現在其前。是人終時。心不顛倒。即得往生阿彌陀佛極樂國土。又云。汝等眾生。當信是稱讚。不可思議功德。一切諸佛所護念經。○十六觀經云。欲生彼國者。當修三福。一者孝養父母。奉事師長。慈心不殺。修十善業。二者受持三皈。具足眾戒。不犯威儀。三者發菩提心。深信因果。讀誦大乘。勸進行者。如此三事。名為淨業。○大集經云。端坐繫念。專心想彼阿彌陀佛。如是相好。如是威儀。如是大眾。如是說法。如是繫

念。心心相續。次第不亂。……是人必覩阿彌陀佛。……譬如世間。若男若女。遠行他國。於睡夢中。見本居家。時實不知為晝為夜。而亦不知為內為外。是人爾時。所有眼根。牆壁石山。終不能障。乃至幽冥黑暗。亦不為礙。……積念薰修。久觀明利。故終得覩彼阿彌陀佛也。○寶積經云。爾時彌勒菩薩白佛言。世尊。如佛所說。阿彌陀佛。極樂世界。功德利益。若有眾生。發十種心。一心專念。向於阿彌陀佛。是人命終。當得往生彼佛世界。世尊。何等名為發十種心。由是心故。當得往生彼佛世界。佛告彌勒菩薩言。彌勒。如是十心。非諸凡愚不善丈夫之所能發。何等為十。一者於諸眾生。起於大慈。無損害心。二者於諸眾生。起於大悲。無逼惱心。三者於佛正法。不惜生命。樂守護心。四者於一切法。發生勝忍。無執著心。五者不貪利養恭敬。尊重淨意樂心。六者求佛種智。於一切時。無忘失心。七者於諸眾生。尊重恭敬。無下劣心。八者不著世論。於菩提分。

生決定心。九者種諸善根。無有雜染。清淨之心。十者於諸如來。捨離諸相。起隨念心。彌勒。是名菩薩發十種心。由是心故。當得往生。阿彌陀佛。極樂世界。彌勒。若人於此十種心中。隨成一心。樂欲往生。彼佛世界。若不得生。無有是處。

導師阿彌陀佛 梵語阿彌陀。此云無量壽。又云無量光。即西方極樂世界之教主。按鼓音王經。過去劫中有妙喜國。王號憍尸迦。時有佛名世自在王。憍尸迦投佛出家。號曰法藏。又無量壽經云。法藏比丘。於世自在王佛所。發無上菩提心。又發四十八願。每願皆云。若不爾者。誓不成佛。時大地震動。天雨妙華。空中讚言。決定成佛。

佛說無量壽經。四十八願之第十八願云。設我得佛。十方眾生。至心信樂。欲生我國。乃至十念。若不生者。不取正覺。唯除五逆。誹謗正法。第九願云。設我得佛。十方眾生。發菩提心。修諸功德。至心發願。欲生我國。

臨壽終時。假令不與大眾圍繞。現其人前者。不取正覺。第二十願云。設我得佛。十方眾生。聞我名號。繫念我國。植眾德本。至心迴向。欲生我國。不果遂者。不取正覺。第三願云。設我得佛。國中人天。不悉具足真金色者。不取正覺。第十六願云。設我得佛。國中人天。乃至聞有不善名者。不取正覺。第二十一願云。設我得佛。國中人天。不悉成滿三十二大人相者。不取正覺。

觀世音菩薩 梵語阿那婆婁吉低輸。此云觀世音。按悲華經。往昔寶藏佛時。阿彌陀佛為輪王。菩薩為第一太子。名不眴。對佛發宏誓願已。蒙佛更名觀世音。并授以遍出一切功德山王佛之記。現在極樂世界。輔佛宏化。後補彌陀之位。時轉極樂名一切珍寶所成就世界。其他因行果德。及本迹應化。詳如法華。楞嚴。大悲授記等經。

大悲心陀羅尼經云。稱我本師阿彌陀佛。常須供養。專稱名號。得無量

福滅無量罪。命終往生阿彌陀佛國。如來授手。摩頂告言。汝莫恐怖。來生我國。○觀世音菩薩授記經云。發阿耨多羅三藐三菩提心。願生我國。皆見安樂世界。阿彌陀佛。菩薩聲聞。既見是已。歡喜踴躍。唱如是言。南無阿彌陀如來。應供。正徧知。此時眾中八萬四千眾生。皆發阿耨多羅三藐三菩提心。及種善根。願生彼國。○十一面觀自在經云。以淨信心。殷重憶念作意。現世得十種利益。復得四種功德。一者。臨命終時。得見如來。二者。不生惡趣。三者。不非命終。四者。從此世沒。得生極樂國土。大勢至菩薩。梵語摩訶那鉢。此云大勢至。按悲華經。往昔寶藏佛時。阿彌陀佛為輪王。菩薩為第二太子。名尼摩。對佛發宏誓願已。蒙佛更名。得大勢。并授以善住珍寶山王佛之記。現在極樂世界。位居第二補處。成佛次於觀世音後。其世界時劫佛事等。與觀世音同。楞嚴經載其所說之念佛法門。最為精要。凡修淨業者。俱宜遵行。

楞嚴經云。我憶往昔。恆河沙劫。有佛出世。名無量光。十二如來。相繼一劫。其最後佛。名超日月光。彼佛教我。念佛三昧。譬如有人。一專為憶。一人專忘。如是二人。若逢不逢。或見非見。二人相憶。二憶念深。如是乃至。從生至生。同於形影。不相乖異。十方如來。憐念眾生。如母憶子。若子逃逝。雖憶何為。子若憶母。如母憶時。母子歷生。不相違遠。若眾生心。憶佛念佛。現前當來。必定見佛。去佛不遠。不假方便。自得心開。如染香人。身有香氣。此則名曰。香光莊嚴。我本因地。以念佛心。入無生忍。今於此界。攝念佛人。歸於淨土。佛問圓通。我無選擇。都攝六根。淨念相繼。得三摩地。斯為第一。

文殊師利菩薩 或云曼殊室利。此云妙德。亦云妙吉祥。按悲華經。寶藏佛時。阿彌陀佛為輪王。菩薩為第三太子。名王眾。對佛發宏誓願已。蒙佛更名文殊師利。并授記於未來南方清淨無垢寶真世界。

成佛號普現。又文殊般涅槃經云。文殊示生於舍衛國。多羅村。梵德婆羅門家。從右脅出。身紫金色。墮地能語。尋去於佛前出家。

華嚴經云。爾時光明。過千世界。一切處。文殊菩薩各於佛所同時說言。一切威儀中。常念佛功德。晝夜無暫斷。如是業應作。○觀佛三昧海經云。文殊自敘宿因。謂得念佛三昧。當生淨土。世尊記之曰。汝當往生極樂世界。文殊發願偈云。願我命終時。盡除諸障礙。面見阿彌陀。往生安樂刹。生彼佛國已。成滿諸大願。阿彌陀如來。現前授我記。○淨土聖賢錄云。唐法照大師。蒙文殊以威神力。攝入五台聖境。照見作禮。請問修行要道。文殊告曰。汝今念佛。今正是時。諸修行門。無過念佛。供養三寶。福慧雙修。此之二門。最為善要。我於過去劫中。因觀佛故。因念佛故。因供養故。得一切種智。是故一切諸法。般若波羅密。甚深禪定。乃至諸佛。皆從念佛而生。故知念佛。是諸法之王。照問。當云何念。文殊言。此世界

西有阿彌陀佛。彼佛願力不可思議。汝當憶念。令勿間斷。命終決定往生。永不退轉。語已。舒金色臂。摩照頂曰。汝念佛故。不久當證無上菩提。照受記已。歡喜作禮而退。

普賢菩薩 梵語邈輪跋陀。此云普賢。按悲華經。寶藏佛時。阿彌陀佛為輪王。菩薩為第八太子。名泯圖。對佛發大誓願已。蒙佛更名普賢。并授記於未來北方知水善住淨功德世界成佛。號智剛吼自在相王。又按華嚴經。菩薩既為毘盧遮那佛之佐輔。尚以十大願王。導華藏海眾諸大菩薩。同歸極樂世界。我等下凡。可不發願追隨乎。

華嚴經云。普賢菩薩。稱讚如來。勝功德已。告諸菩薩。及善才言。善男子。若欲成就此功德者。當發十種廣大行願。一者禮敬諸佛。二者稱讚如來。三者廣修供養。四者懺悔業障。五者隨喜功德。六者請轉法輪。七者請佛住世。八者常隨佛學。九者恆順眾生。十者普皆迴向。或復有人。以

深信心。於此大願。受持讀誦。乃至書寫。一四句偈。速能滅除五無間業。臨命終時。最後剎那。一切諸根。悉皆散壞。……唯此願王。不相捨離。於一切時。引導其前。一剎那中。即得往生。極樂世界。偈曰。願我臨欲命終時。盡除一切諸障礙。面見彼佛阿彌陀。即得往生安樂剎。我即往生彼國已。現前成就此大願。一切圓滿盡無餘。利樂一切眾生界。彼佛眾會咸清淨。我時於勝蓮花生。親見如來無量光。現前授我菩提記。○如來不思議境界經云。爾時世尊。入於三昧。名如來不思議境界。普賢菩薩告德藏菩薩言。若有善男子。善女人。為求無上菩提。發心欲證此三昧者。是人要須先修智慧。以此三昧。由慧得故。修智慧者。應當遠離妄言綺語。及諸散亂。無益之事。詣精舍中。觀佛形像。金色莊嚴。或純金成。相好具足。無量化佛。在圓光中。次第而坐。即於像前。頭面禮足。作是思惟。我聞十方無量諸佛。今現在世。所謂一切義成佛。阿彌陀佛。……於彼

諸佛。隨心所樂。尊重之處。生大淨信。想佛形像。作彼如來。真實之身。恭敬尊重。如現前見。上下諦觀。一心不亂。往空閒處。端坐思惟。如佛現前。一手量許。心常繫念。不令忘失。若暫忘失。復應往觀。如是觀時。生極尊重恭敬之心。如佛真身。現在其前。了了分明。不復於彼。作形像解。見已。即應於彼佛所。以妙花鬘。末香。塗香。恭敬右遶。種種供養。彼應如是。一心繫念。常如世尊。現其前住。然佛世尊。一切見者。一切聞者。一切知者。悉知我心。如是審復。想見成已。還詣空處。繫念在前。不令忘失。一心勤修。滿三七日。若福德者。即見如來。現在其前。其有先世。造罪業障。不得見者。若能一心。精進不退。更無異想。還得速見。何以故。若有為求無上菩提。於一事中。專心修習。無不成辦。譬如有人。於大海中。飲一掬水。即為已飲。閻浮提中。一切河水。菩薩若能。修習此菩提海。則為已修。一切三昧。諸忍。諸地。諸陀羅尼。又云。自心作佛。離心無佛。乃至三世。一切諸

佛亦復如是。皆無所有。唯依自心。菩薩若能了知諸佛。及一切法。皆唯
心量。得隨順忍。或入初地。捨身速生妙喜世界。或生極樂淨佛土中。常
見如來。親承供養。

馬鳴菩薩 梵語阿濕矩沙。此云馬鳴。按傳燈錄謂菩薩生時。感動
諸馬悲鳴故。又善能說法。能令諸馬聞已悲鳴垂淚故。當佛滅度六
百年後。西域九十六種外道復興。大毀佛法。菩薩乃示生於東印度。
桑岐多國。廣造諸論。顯正摧邪。所造大乘起信論。勸人念佛求生西
方。臨終入龍奮迅三昧。涌身虛空。光燦如日。還復本位。而取涅槃。

大乘起信論云。應當勇猛精進。晝夜六時。禮拜諸佛。誠心懺悔。勸請隨
喜。迴向善提。常不休廢。得免諸障。善根增長故。又云。如來有勝方便。攝
護信心。謂以專憶念佛因緣。隨願得生他方佛土。常見於佛。永離惡道。
如修多羅說。若人專念西方阿彌陀佛。所修善根。迴向願求生彼世界。

即得往生。常見佛故。終無有退。若觀彼佛。真如法身。常勤修習。畢竟得生。住正定故。

龍樹菩薩 梵語那伽曷樹那。此云龍樹。因生於樹下。得道於龍宮。故南天竺梵志之裔。博通世學。出家三月。遂通三藏。時龍王迎入龍宮。開閱龍藏九旬。未及萬一。即悟無生。乃還人間。大弘佛教。所著婆沙論。勸人念佛求生西方。後入月輪定而寂。佛於楞伽經中謂。當來南天竺。有龍樹比丘。能顯中道義。得證初地。往生極樂。適符佛記。

大智度論云。念佛三昧。能除種種煩惱。及先世罪。復次。念佛三昧。有大福德。能度眾生。是諸菩薩。欲度眾生。修餘三昧。無如此念佛三昧福德。能速滅諸罪。復次。佛為法王。菩薩為法將。所尊重者。惟佛世尊。復次。菩薩常善修念佛因緣故。常值諸佛。如般舟經中說。菩薩入是三昧。即現生阿彌陀佛國。○婆沙論云。阿彌陀佛。本願如是。若人念我稱名自皈。

斯人必定得阿耨多羅三藐三菩提。是故常應憶念。以偈讚曰。無量光明慧。身如真金山。我今身口意。合掌稽首禮。又云。佛足千輻輪。柔軟蓮花色。見者皆歡喜。頭面禮佛足。又云。眉間白毫光。猶如清淨月。增益其面光。頭面禮佛足。又云。若人願作佛。心念阿彌陀。應時為現身。是故我皈命。又云。人能念是佛。無量力功德。即時必入定。是故我常念。又云。若人種善根。疑則華不開。信心清淨者。華開則見佛。又云。以此福因緣。所獲上妙德。願諸眾生類。皆亦悉當得。

天親菩薩 梵語婆藪槃豆。此云天親。天竺富婁。又國人。出家後樂聞小乘。輒毀大乘經典。後聞其兄無著。多方啟發。乃悟前非。欲自斷舌。其兄止之曰。昔以舌毀大乘。今以舌讚大乘。補過自新。猶未晚也。斷舌絕言。其利安在。天親於是精研覃思。製大乘論。凡百餘部。並行於世。所著往生論。發揮淨土莊嚴利益。甚為詳明。念佛者。極宜注意。

無量壽經論云。修五念門成就者。畢竟得生安樂國土。見阿彌陀佛。何等五念門。一者禮拜門。二者讚歎門。三者作願門。四者觀察門。五者迴向門。云何禮拜。身禮拜阿彌陀佛。為生彼國意故。云何讚歎。口讚歎。彼如來名。如彼如來。光明智相。如彼名義。欲如實修行相應故。云何作願。一心專念。畢竟往生安樂國土。入如實修行奢摩他故。云何觀察。正念觀彼。欲如實修行毘婆舍那故。彼觀察有三種。何等為三。一者觀察彼佛國土功德莊嚴。二者觀察阿彌陀佛功德莊嚴。三者觀察彼諸菩薩莊嚴。云何迴向。於彼觀察不捨一切苦惱眾生。同願生彼安樂國土。願心所有功德善根。以巧方便。作願迴向。攝取眾生。不捨一切故。偈云。世尊我一心。皈命盡十方。無礙光如來。往生安樂國。我作論說偈。願見阿彌陀。普共諸眾生。往生安樂國。

覺明妙行菩薩 按西方確指菩薩自敘夙因云。我昔於晉明帝時。

受貧子身。為貧苦故。乃發願念佛。求生西方。於是七日七夜。專精憶念。便得心開。親見極樂世界。蒙佛授記。後果往生。繼以度生願重。隨類現身。攝受群品。又淨土聖賢錄云。菩薩以往昔因緣故。於明崇禎十六年。迄清順治四年。降於吳門。隨機倡導。開闡淨土法門。

西方確指云。我昔於晉明帝時。受貧子身。為貧苦故。乃發大願云。我以宿業。受此苦報。若我今日。不得見阿彌陀佛。生極樂國。成就一切功德者。縱令喪身。終不退息。誓已。七日七夜。專精憶念。便得心開。見阿彌陀佛。相好光明。滿十方界。我於佛前。親蒙授記。後年七十五而坐脫。竟生極樂。後以度生願重。再來此土。隨方顯化。○心本無念。念逐想生。此想虛妄。流轉生死。當知此一句阿彌陀佛。不從想生。不從念有。不著內外。無有相貌。即是盡諸妄想。與佛法身。非一非異。不可分別。如是念者。無煩惱塵勞。無斷無縛。止是一心。必得一心。方得名為執持名號。方得名。

為一心不亂。○念佛不能一心者。但息想定慮。徐徐念去。要使聲合乎心。心合乎聲。念久自得諸念澄清。心境絕照。證入念佛三昧。偈曰。少說一句話。多念一句佛。打得念頭死。許汝法身活。○念佛預先當發大願。願生極樂。然後至誠懇切。稱於阿彌陀佛。必使聲緣於心。心緣於聲。聲心相依。久久不失。則入憶念三昧。○大抵修淨業人。行住坐臥。起居飲食。俱宜西向。則機感易投。根境易熟。室中只供一佛。一經。一爐。一棹。一牀。一椅。不得放一多餘物件。庭中亦掃除潔淨。使經行無礙。要使此心一絲不掛。萬慮俱忘。空洞洞地。不知有身。不知有世。更不知我今日所作是修行之事。如是則與道日親。與世日隔。可以趨向淨業矣。○修淨業之法。不出專勤二字。專則不別為一事。勤則不虛棄一時。又持名之法。必須字字句句。聲心相依。不雜分毫世念。久久成熟。決定得生極樂世界。坐寶蓮花。登不退地。

思歸集卷一終

大慈菩薩發願偈

十方三世佛。阿彌陀第一。九品度眾生。威德無窮極。
我今大歸依。懺悔三業罪。凡有諸福善。至心用迴向。
願同念佛人。感應隨時現。臨終西方境。分明在目前。
見聞皆精進。同生極樂國。見佛了生死。如佛度一切。

(此文妙極)

思歸集卷二

印光法師鑑定

思歸子釋如岑敬輯

慧遠大師。蓮宗初祖也。賈姓。雁門人。學精儒老。年廿一。聞道安法師講般若經。因悟曰。儒老皆糠粃耳。遂出家。誓弘佛教。安歎曰。使法流傳中國。其在遠乎。後入廬山。感雷雨。運木以建東林。又鑿池種蓮。因號蓮社。集眾六時念佛。求生西方。在山卅餘載。雖帝詔亦不出。曾三覩聖像。均只默記。義熙十二年。佛再現。乃端坐入滅。年八十有三。師云。念佛三昧者何。思專想寂之謂也。思專則志一不分。想寂則氣虛神朗。氣虛則智悟其照。神朗則無幽不徹。斯二乃自然之玄符。會一而致用也。又諸三昧。其名甚眾。功高易進。念佛為先。何者。窮玄極寂。尊號如來。體神合變。應不以方。故令人斯定者。昧然忘知。即所緣以成鑑。鑑明則內照交映。而萬相生焉。非耳目之所暨。而聞見行焉。於是靈相湛一。清明自然。元音叩心。滯情融朗。非天下之至妙。孰能與於此哉。所以

奉法諸賢。咸思一揆之契。感寸陰之將頽。懼來儲之未積。於是洗心法堂。整襟清向。夜分忘寢。夙興唯勤。庶夫貞詣之功。以通三乘之志。仰援超步。拔茅之興。俯引弱進。乘策其後。以此覽眾篇之揮翰。豈從文詠而已哉。

曇鸞大師 雁門人。少遊五台。感靈異出家。嗜長生。受陶隱仙經十卷。後遇菩提流支。問曰。佛有長生術否。支授以十六觀經曰。此佛教之長生法也。鸞大喜。遂焚仙經。專修淨業。雖疾病不稍間。魏主號為神鸞。臨終誠眾曰。勞生役役。其止無日。地獄不可不懼。淨業不可不修。因令弟子高聲念佛。向西稽首而去。眾聞天樂西來。良久乃寂。

師云。於發願之外。更以發菩提心為最要。往生與否。以此為衡。又略論安樂淨土義云。云何名為十念相續。答曰。譬如有人。於曠野處。值遇怨賊。拔刃奮勇。直來欲殺。其人勁走。視渡一河。若得渡河。首領可全。爾時

但念渡河方便。我至河岸。為著衣渡。為脫衣渡。若著衣衲。恐不得過。若脫衣衲。恐不得暇。但有此念。更無他緣。一念何當渡河。即是一念。如是不雜用心。名為十念相續。行者亦爾。念阿彌陀佛。如彼念渡。逕於十念。若念佛名字。若念佛相好。若念佛光明。若念佛神力。若念佛功德。若念佛智慧。若念佛本願。無他心間雜。心心相次。乃至十念。名為十念相續。又宜於平時。約三五同志。共結要言。垂命終時。迭相開曉。為稱阿彌陀佛名號。勉其願生。聲聲相續。使成十念也。

智者大師 諱智顓。台宗初祖也。陳姓。潁川人。生時神光照室。十八出家。參慧思於大蘇。師曰。昔日靈山。同聽法華云云。令專修。始三七日。即證法華三昧。自是智辯無礙。判佛一代所說。為五時八教。撰淨土十疑論。勸人念佛。陳宣帝建寺請居。後隋煬帝從師受戒。賜號智者。旋歸天台。法化益盛。開皇十七年冬。向西念佛坐化。年六十七。

師云。欲決定生西方者。具二種行。定得生彼。一厭離行。二欣願行。厭離行者。常觀此身。不淨臭穢。唯苦無樂。深生厭離。姪欲煩惱。漸漸減少。又十想等觀。廣如經說。又發願。願我永離三界。雜食臭穢膿血不淨。耽荒五欲。男女等身。願得淨土。法性生身。此為厭離行。欣願行復二種。一先明求往生之意。二觀彼淨土莊嚴等事。欣心願求。明往生意者。所以求生淨土。為救拔一切眾生苦。即自思忖。我今無力救苦眾生。為此求生淨土。親近諸佛。若證無生忍。方能於惡世救苦眾生。故往生論云。發菩提心者。正是願作佛心。願佛心。則是度眾生心。度生心。則是攝受眾生。生佛國心。又云。悲智內融。定而常用。自在無礙。即菩提心。此是願生之意。二明欣心願求者。希心起想。緣阿彌陀佛。若法身。若報身等。金色光明。八萬四千相。一一相。八萬四千好。一一好。放八萬四千光明。常照法界。攝取念佛眾生。又觀彼土。七寶莊嚴。妙樂等備。如無量壽經。十六觀

經等。常行念佛三昧。及施戒修等。一切善行。悉以迴施。一切眾生。同生彼國。決定得生。此欣願門也。○五方便念佛門云。一凝心禪。二制心禪。三體真禪。四方便隨緣禪。五息二邊分別禪。凡住心一境。名曰凝心。且如行者念佛之時。諦觀如來。玉毫金相。凝然寂靜。了亮洞徹。名凝心禪。復次。前雖凝心。所習慣馳散。今制之令還。諦緣金相。名制心禪。復次。前雖制心。得住定境。既非理觀。皆屬事修。今體本空。誰制。無佛無念。名體真禪。復次。前雖謂體真。猶滯空寂。無量名相。昧然不知。今以無所得而為方便。從空入假。萬相洞明。不為空塵之所惑亂。名方便禪。復次。體真及以方便。各據空有。不離二邊。今諦觀靜亂。本無相貌。名言路斷。思想亦絕。名息二邊禪。從淺至深。如是分別。圓觀亦無深淺。而淺深宛然。遂開念佛五門。第一稱名往生念佛三昧門。第二觀想滅罪念佛三昧門。第三諸境唯心念佛三昧門。第四心境俱離念佛三昧門。第五性起圓

通念佛三昧門。假如行人。口稱南無阿彌陀佛時。心必願生彼國土。即是稱名往生門。行者想相佛身。專注不已。遂得見佛。光明赫奕。照觸行者。爾時所有罪障。皆悉消滅。即是觀相滅罪門。又觀此佛。從自心起。無別境界。即是諸境唯心門。又觀此心。亦無自相可得。即是心境俱離門。行者爾時。趣深寂定。放捨一切心意。將入涅槃。蒙十方佛。加被護念。興起智門。行者爾時。於一念頃。淨佛國土。成就眾生。如前門所有功德。百千萬分。不及其一。何以故。無功用位。能以一身為無量身。任運修習故。佛觀護故。諸佛法源。盡窮底故。普賢願因。悉圓滿故。本願力故。法如是故。即是性起圓通門。○約四教念佛云。夫心不獨生。必托緣起。行者念佛之時。意想為因。如來毫光為緣。亦名法塵。以對意根故。所起之念。即是所生法。觀此根塵能所。三根遷動。新新生滅。念念不住。分析方空。無佛無念。藏教小乘也。即觀念佛心起。能生所生。無不即空。妄謂心

起心實不起。起無自性。體之即空。所觀佛相。如鏡中像。虛空華。無佛無念。通教大乘也。即觀念佛心起。即假名之法。淺深同鑒。無性無相。如觀掌中。了知此心。有如來藏。歷劫斷惑。方證真常。離邊顯中。無佛無念。別教大乘也。即觀念佛心起。即空即假即中。若根若塵。並是法界緣起。一念亦爾。塵刹諸佛。一念照明。六道眾生。剎那普應。初即是後。今始覺知。如大福人。執石成寶。必無捨念。別求離念。即邊而中。無佛無念。圓教大乘也。

道綽大師 衛姓。并州人。十四出家。習經論。晚事瓚師學禪。偶過壁谷玄宗寺。慕鸞師淨業。遂停講學。靜坐常向西。六時禮敬念佛。日以七萬計。有僧在定中。見師手持數珠。如七寶山。他諸瑞應。未可殫述。講淨土三經幾二百遍。講畢。佛聲響彌林谷。毘連三縣中。凡七歲以上之孩子。皆知念佛。師臨終之日。眾見化佛住空。天華下雨而寂。

師云。凡修淨業者。不得背西坐臥。亦不得向西涕唾便利。蓋皈依蓮邦。應崇金地。心不殷重。非所以求往生也。○若欲會其二諦者。但知念念不可得。即是智慧門。而能繫念相續不斷。即是功德門。是故經云。菩薩摩訶薩。恆以功德智慧。以修其心。若始學者。未能破相。但能依相專至。無不往生。○問。若人但稱彌陀名號。能除十方眾生無明黑暗。得往生者。然有眾生。稱名憶念。而無明猶在。不滿所願者。何意。答。由不如實修行。與名義不相應故也。所以者何。謂不知如來是實相身。是為物身。復有三種不相應。一者信心不淳。若存若亡故。二者信心不一。謂無決定故。三者信心不相續。謂餘念間斷故。應須迭相收攝。勿使散亂。若能相續。即是信心。但能一心。即是淳心。若不生者。無有是處。

善導大師 蓮宗二祖也。因見道綽之淨業道場。喜曰。此真入佛之要津。遂至京師。激發四眾。長跪念佛。力竭方休。講淨土法門卅餘年。

未嘗睡眠。所有贖施。用寫彌陀經十萬餘卷。畫西方聖境三百餘壁。感化道俗甚眾。其間得三昧生淨土者無算。一日登柳樹向西祝曰。願佛接我。往生淨土。遂投身而寂。高宗欽其神異。賜寺額曰光明。

師云。大聖悲憐。直勸專稱名字者。正由稱名易故。相續即生。若能念念相續。畢命為期者。十即十生。百即百生。何以故。無雜緣。得正念故。與佛本願相應故。不違教故。順佛語故。若捨專念。修雜念者。百中希得一二。千中希得三四。(因與上四種相反故)○凡人臨終。須不得怕死。常念此身。多苦不淨。若得捨此幻身。超生善道。乃是稱意之事。○凡有疾病。但念無常。一心待死。囑看病問候人。凡來我前。為我念佛。不得說眼前閒雜之話。若病重將終之際。不許有人哭泣。但同聲念佛。待氣盡方可舉哀。若得明解淨行之人。頻來策勵。實為大幸。用此法者。決定往生。○死門甚大。須自家著力始得。一念差過。歷劫受苦。誰能相代。思之思

之。○臨睡入觀禮想發願文云。弟子某等。自是生死凡夫。罪障深重。輪迴六道。苦不可言。今遇知識。得聞彌陀名號。本願功德。一心稱念。求願往生。願佛慈悲不捨。哀憐攝受。弟子某等。不識佛身相好光明。願佛示現。令我得見。及見觀音勢至。諸菩薩眾。彼世界中清淨莊嚴。光明妙相等。令我了了得見。○凡臨睡時。觀西方勝境。或觀阿彌陀佛。相好光明。不得雜語雜想。亦不得求見瑞相。但辦專心。自有見時。或但稱佛號而睡。行者專取一法。不得雜用。務在久遠行之。必於淨土。功不唐捐也。

清涼大師 諱澄觀。字大休。賢首宗之四祖也。會稽夏侯氏子。身長九尺四寸。雙手過膝。口四十齒。日記萬言。誕時光徹隣里。九歲出家。受具後。即以十事自勵。著述四百餘卷。歷九朝。為七帝師。臨終趺坐西逝。世壽百二歲。文帝崇其道。輟朝三日。以理葬事。重臣皆縞素。茶毘得舍利數千粒。舌如紅蓮。火不能變。勅建塔寺。諡號清涼國師。

師云有五種念佛門。學者應知。一緣想境界念佛門。二攝境唯心念佛門。三心境無礙念佛門。四心境俱泯念佛門。五重重無盡念佛門。一緣想境界念佛門者。一心觀念阿彌陀佛是。二攝境唯心念佛門者。是心作佛。諸佛正遍知海。從心想生是。三心境無礙念佛門者。觀念佛時。是心即是三十二相。八十隨形好是。四心境俱泯念佛門者。是心是佛。諸佛正遍知海。從心想生是。是心。則佛相泯絕無寄。是佛。則心想當體全空。二相不存。二性顯矣。五重重無盡念佛門者。諸佛如來是法界心。入一切眾生心想中是也。

懷感大師 不詳所出。初與玄奘慈恩同為法相宗人。秉持強毅。精苦力學。疑念佛少時。何以得生安養。叩問善導。導曰。諸佛誠言。豈有虛妄耶。令入道場。念念取證。經三七日。不覩靈瑞。自恨障深。欲絕食畢命。導不許。勸令精修三年。感化佛金色光。觀眉間毫相。遂證念佛。

三昧。因著淨土釋群疑論七卷行世。臨終見化佛來迎。向西而逝。師云。至心念佛。即意業行善也。稱佛名號。即口業行善也。合掌禮拜。即身業行善也。由此三業行善。能滅八十億劫生死重罪。行願相扶。決定往生。○現今學者。唯須勵聲念佛。三昧易成。小聲念佛。遂多馳散。此乃學者自知。非外人能曉矣。○暗室念佛一法。固無聖教。但初學之人。處於暗室。絕諸視聽。心捨諸緣。專一念佛。如是行者。三昧易成。故凡世間。欲思難事。未得了解。亂想難成。或掩室獨居。或閉目絕視。因茲恬靜。思事得成。此亦如斯。而不學之輩。於此生疑。曾修習者。深將為要。

飛錫大師 不詳所出。初學律儀。後與楚金法師。鑽研天台教觀。天寶初。遊京師。止終南紫閣草堂寺。專修淨業。嘗撰念佛三昧寶王論三卷行世。旋奉勅住千佛法華道場。時一行不空三藏譯經論。師任潤文之責。永泰初。又奉詔於大明宮內。同不空三藏及良賁等。參譯

仁王般若經。及密嚴等經。師充證義正員。旋退隱。後不知其所終。師云。世人念過去釋迦。想現在彌陀。獨未聞念未來諸佛。何耶。以諸佛至尊也。眾生至卑也。高下出焉。群妄興矣。敬傲立焉。一真隱矣。眾生若非如來。當佛何在。若知母因子貴。米以糠全。則念佛三昧。不速而成。以隨所念。無非是佛故也。○世人多以寶玉木穗等為數珠。吾以出入息為念珠焉。稱佛名號。隨之於息。大有恃怙。安懼一息不還。即屬後世者哉。余行住坐臥。常用此珠。縱令昏寐。念佛而寢。覺即續之。必於夢中。得見彼佛。如鑽木煙飛。火之前相。夢之不已。三昧成焉。面覩玉毫。親蒙授記。萬無一失也。問。然則但能繼想。無取高聲乎。答。辟散之要。要存乎聲。聲之不勵。心竊無定。有五義焉。拔茅連茹。乘策其後。畢命一對。長謝百憂。一也。聲光所及。萬禍冰消。功德叢林。千山松茂。二也。金容熒煌。以煥彩。寶華浙瀝。而雨空。若指諸掌。皆聲致焉。三也。如牽木石。重而不前。洪

音發號。飄然輕舉。四也。與魔軍戰。旗鼓相望。用聲律於戎軒。以定破於強敵。五也。喧靜兩全。止觀雙運。叶乎佛意。不亦可乎。華嚴經云。寧受一切苦。得聞佛音聲。不受一切樂。而不聞佛名。然則佛聲遠震。開善萌芽。猶春雷之動百草。安得輕誣哉。○世人謂念佛有念也。吾則謂念佛無念也。又念即是空焉。得有非念滅空焉。得無念性本空焉。得生滅。又無所念心者。應無所住也。而修念佛者。而生其心也。無所念心者。從無住本也。而修念佛者。立一切法也。無所念心者。念即是空也。而修念佛者。空即是念也。此明中道。雙寂雙照。照而常寂。無所念心矣。寂而常照。而修念佛焉。如來寂照三摩地。念佛三昧。究竟之位也。

承遠大師 蓮宗三祖也。始學於成都唐公。次資川誥公。至荊州進學於玉泉真公。公令居衡山設教。從其化者萬計。一以念佛而開導之。始居山西南巖下。人遺食則食。不遺則食土泥。人與營居。德宗聞

知賜以彌陀寺額。後代宗因聞法照國師之言。知師有至德。度詔難起。特南嚮躬禮。賜其居曰。般舟道場。貞元十八年入寂。年九十一。

淨業彙編云。承遠大師。蓮宗三祖也。惜其法門。今不甚詳。就師本傳所載。知師以專持名號為正行。以布施持戒為助行。傳云。師以專念法門。書之途巷。刻之溪谷。不勤誘掖。以援於下。不求而道備。不言而物成。所有資生之具。施與餓疾。而自處於巖石之下。食土泥。茹草木。羸形垢面。躬負薪樵。雖天子不可徵。其自律可謂嚴矣。凡此皆師之淨土因行焉。

○謹按。有法照大師者。唐代宗朝之國師也。先自五台。親見文殊。教以念佛法門。後在廬山定中。神遊極樂。見一著惡衣侍佛者。佛告曰。此衡山承遠也。出定訪之。乃從其學。後道傳天下。即此。可知師道德之盛矣。

法照大師 蓮宗四祖也。止衡州雲峰寺。慈忍戒定。為時所宗。嘗於鉢內見五台聖境。後詣五台。親見文殊。為說念佛法門。又嘗於湖東

寺開五會念佛。感祥雲寶閣。覩阿彌陀佛。及二菩薩。身滿虛空。又於并州五會念佛。代宗在宮中聞念佛聲。遣使追尋。乃見師勸化甚盛。遂詔入京。教宮人念佛。亦及五會。因號五會法師。臨終端坐而寂。

淨業彙編云。法照大師。蓮宗四祖也。師之法門。以五會念佛著稱。蓋依無量壽經所說。淨利寶樹。出五音聲。皆念三寶名。聞者得忍不退。至成佛道之語而作。其讚云。第一會時平聲入。第二極妙演清音。第三盤旋如奏樂。第四要期用力吟。第五高聲唯速念。聞此五會悟無生。一到西方受快樂。永不輪迴出苦坑。發心念佛事須堅。臨終決定上金船。迴頭眾生皆得往。直上西方坐寶蓮。西方世界實為精。彼土眾生不可輕。衣被持華供養佛。還來本國飯經行。發心念佛度群生。願此五會廣流行。六道三途皆攝取。蓮華會裏著真名。勸君修道莫生瞋。法中無我亦無人。欲識西方求淨土。會是塵中不染塵。

（本書前請 印公鑑定時當蒙函示云。「四祖五會念法。從未聞見。疑是後人偽造。張觀本謂此法能興淨宗。光殊不以為然。祈再詳酌。以定去取。」今諦審偈文。益信老人所言。誠具卓見。但四祖別無法語可錄。故權存之。輯者識。）

少康大師 蓮宗五祖也。周姓。縉雲人。少通經論。兼善毘尼。貞元中。詣洛京白馬寺。見善導勸修淨土。文放光。因至長安善導影堂瞻禮。感善導現身空中。曰。若依吾教。廣化有情。他日成功。必生淨土。師遂往新定。乞錢誘小兒念佛。竟致佛聲盈路。又嘗於烏龍山建淨土道場。集眾念佛。臨終放異光數道而逝。塔於臺子巖。故號臺巖法師。

淨業彙編云。少康大師。蓮宗五祖也。師之法門。今不甚詳。就師本傳所載。係以厭穢欣淨。高聲念佛。兼行布施。為其行業。師常示眾云。當於淨土。起欣樂心。於閻浮提。起厭離心。又師高聲念阿彌陀佛一聲。眾見一

佛從口而出。乃至十聲皆然。又師乞錢誘人念佛。或勸念佛一聲。給與一錢。乃至念佛十聲。給與一錢。此所謂財法二施。方便攝受也。師亦嘗讚佛行道。

永明大師 蓮宗六祖也。王姓。錢塘人。曾知稅務。以官錢贖生。罪當死。臨刑神色不變。乃放出家。先依翠巖禪師。繼參韶國師。蒙觀音以甘露灌口。遂獲智辯。著宗鏡錄百卷。又著萬善同歸集。指歸淨土。忠懿王請住永明寺。日課百八事。夜往別峰念佛。人聞天樂鳴空。誦法華經至一萬三千部。開寶八年。焚香告眾。趺坐而化。年七十有二。師云。直須一心歸命。報盡精修。坐臥之間。常面西向。當行道禮拜之際。念佛發願之時。懇苦翹誠。無諸異念。如就刑戮。若在狴牢。怨賊所追。水火所逼。一心求救。願脫苦輪。速證無生。廣度含識。紹隆三寶。誓報四恩。如斯至誠。必不虛棄。如或言行不稱。信力輕微。無念念相續之心。有數

數間斷之意。恃此懈怠。臨終望生。但為業障所牽。恐難值其善友。風火逼迫。正念不成。何以故。如今是因。臨終是果。應須因實。果則不虛。聲和則響順。形直則影端也。○夫善惡二輪。苦樂二報。皆三業所造。四緣所生。六因所成。五果所攝。若一念心。瞋恚邪婬。即地獄業。慳貪不捨。即餓鬼業。愚癡暗蔽。即畜生業。我慢貢高。即修羅業。堅持五戒。即人業。精修十善。即天業。證悟人空。即聲聞業。知緣性離。即緣覺業。六度齊修。即菩薩業。真慈平等。即佛業。若心淨。則香台寶閣。淨刹化生。心垢。則邱陵坑坎。穢土稟質。皆是等倫之果。能感增上之緣。是以離自心源。更無別體。欲得淨果。但行淨因。○禪淨四料簡云。有禪無淨土。十人九蹉路。陰境若現前。瞥爾隨他去。無禪有淨土。萬修萬人去。但得見彌陀。何愁不開悟。有禪有淨土。猶如戴角虎。現世為人師。來生作佛祖。無禪無淨土。鐵床並銅柱。萬劫與千生。沒箇人依怙。

省常大師 蓮宗七祖也。字造微。顏姓。錢塘人。七歲出家。十七受具。戒行嚴謹。通大乘起信論。修天台止觀。淳化中。住西湖昭慶寺。慕廬山之遺風。結淨行社。雕刻佛像。刺血寫經。率眾念佛。時相國王文正等士夫。一百廿三人。皆執弟子禮焉。天禧四年正月十二日。端坐念佛。有頃。曰。佛來也。泊然而化。眾見地色皆金。移時方隱。年六十二。

蓮宗纂要云。省常大師。蓮宗七祖也。師之淨土因行。以堅持戒律。專稱名號。發菩提心。結社互勵。四者著稱。按師本傳云。師住杭州昭慶寺。專修淨業。慕廬山遠公遺風。結淨行社。士大夫。如相國王文正公。且等。一百二十人。自稱淨行弟子。與僧千人。同修淨業。師常刺血。書華嚴淨行品。每書一字。三圍繞。三禮拜。三稱佛名。刊印千卷。分施千人。又以梅檀香。造毘盧佛像。成。跪前發願云。我與大眾。始從今日。發菩提心。窮未來際。行菩薩行。願盡此報身。以生安養。願力宏堅。蓋可知矣。

法智大師 號知禮。金姓。四明人。父母禱佛而生。七歲出家。深悟止觀玄旨。淳化中。受請主乾符寺。尋徙保恩院。敷揚教觀。適明州旱。與慈雲同修光明懺。約三日不雨。當自焚一手。如期果大雨。因勅易保恩院。曰延慶寺。并賜法智大師之號。師遂建念佛施戒會。率眾行道。後又建日觀庵。送想西方。臨終對佛發願已。端坐而寂。年六十九。師云。生安養者。國土莊嚴。身心清淨。直至成佛。不墮三途。經云。尙無惡道之名。何況有實。……眾生生者。皆是阿鞞跋致。若欲生彼。當稱彼佛號。修彼佛慈。必為彼佛。本願攝取。捨此報身。定生彼國。具如經說。實非臆談。……俾成淨業。誓取往生。況劫濁命光。其猶風燭。一息不至。三途現前。何得自寬。不思來報。當依佛語。勿順人情。頓息攀緣。唯勤念佛。諸有志者。其各勉之。

遵式大師 葉姓。台州人。母禱觀音而生。廿歲受具。初學律。繼入國

清研習台教。又行般舟行。篤志安養。苦至嘔血。以死自誓。夢觀音指其口。引出數蟲。指端又出甘露服之。覺而疾愈。旋居寶雲。率眾念佛。嘗著大小彌陀懺法。述淨土決疑。及晨朝十念。往生略傳等行世。臨終時。炷香禮佛。願諸聖證明。往生淨土。已而念佛坐脫。年六十九。

師云。欲修往生觀者。當於靜處。向西趺坐。調氣定心。自想合生極樂世界。當便起心。生於彼想。於蓮華中。結跏趺坐。作華合想。作華開想。當華開時。有五百色光。來照身想。作眼目開想。見佛菩薩。與國土想。即於佛前。坐聽妙法。及聞一切音聲。皆說所樂聞法。所聞要與十二部經合。作此想時。大須堅固。令心不散。心想明了。如眼所見。經久乃起。○直想阿彌陀佛。丈六金身。住蓮花上。專繫眉間。白毫一相。其毫長一丈五尺。周圍五寸。外有八楞。其毫中空。右旋宛轉。在眉中間。瑩淨明徹。不可具說。顯映金顏。分齊分明。作此想時。停心注想。堅固勿移。然後應觀。想念所

見若成未成。皆想念因緣。無實性相。所有皆空。亦如鏡中面相。水中月影。如夢如幻。即空即假。即中不一不異。非縱非橫。不可思議。心想寂靜。則能成就念佛三昧。○凡公臨私養。歷涉緣務。雖造次而常內心不忘於佛。及憶淨土。譬如世人。切事繫心。雖經歷語言。去來坐臥。種種作務。而不妨密憶前事。宛然念佛之心。亦應如是。或若失念。處處攝還。久久成性。任運常憶。楞嚴經云。譬如此繫心。任運常遮一切惡念。設欲作惡。憶佛之故。惡不能成。縱使隨惡作惡業時。心常下輒。如身有香。自然離臭。○晨起服飾已。向西合掌。連念阿彌陀佛。盡一口氣為一念。如是十口氣。為十念。氣之長短。聲之高底。念之緩急。皆隨己便。念畢。三作禮而退。日日當行。以畢命為期。能如是者。決定得生。極樂世界。

慈覺大師 諱宗曠。襄陽人。幼禮真州長蘆寺秀禪師出家。深明宗要。元祐中。迎老母於東方丈。勸母念佛。七年不間。臨終。果正念往生。

師遵廬山之遺規。結蓮華勝會。普勸僧俗念佛。求生西方。夢感普賢。普慧。二菩薩。求書名入會。知獲聖賢幽贊。遂列二聖為會首。自是向化者益眾。靈芝律師。稱師為近代大乘導師。信哉。臨寂念佛坐化。

師云。初心入道。忍力未淳。須托淨緣。以為增上。何則。娑婆國土。釋迦已滅。彌勒未生。極樂世界。阿彌陀佛。現在說法。娑婆國土。觀音勢至。徒仰嘉名。極樂世界。彼上善人。親為勝友。娑婆國土。諸魔競作。惱亂行人。極樂世界。大光明中。決無魔事。娑婆國土。邪聲擾亂。女色妖姪。極樂世界。水鳥樹林。咸宣妙法。正報清淨。實無女人。然則。修行緣具。無若西方。淺信之人。偏生疑謗。竊嘗論之。此方之人。無不厭俗舍之喧煩。慕蘭若之寂靜。故有捨家出家。則殷勤讚歎。而娑婆眾苦。何止俗舍之喧煩。極樂優游。豈直蘭若之寂靜。知出家為美。而不願往生。其惑一也。萬里辛勤。遠求知識者。誠以發明大事。決擇生死。而彌陀世尊。色心業勝。願力洪

深。一演圓音。無不明契。願參知識。而不欲見佛。其惑二也。叢林廣眾。皆樂棲遲。少眾道場。不欲依附。而極樂世界。一生補處。其數甚多。諸上善人。俱會一處。既欲親近叢林。而不慕清淨海眾。其惑三也。此方之人。上壽不過百歲。而童癡老耄。疾病相仍。昏沈睡眠。常居大半。菩薩猶昏隔陰。聲聞尙昧出胎。則尺壁寸陰。十喪其九。而未登不退。實為寒心。西方之人。壽命無量。一托蓮胞。更無死苦。相續無間。直至菩提。所以便獲阿鞞跋致。佛階決定可期。流轉娑婆。促景而迷於淨土。長年其惑四也。若乃位居不退。果證無生。在欲無欲。居塵不塵。方能興無緣慈。運同體悲。回入塵勞。和光五濁。其有淺聞單慧。或與少善相應。便謂永出四流。高超十地。詆呵淨土。耽戀娑婆。掩目空歸。宛然流浪。並肩牛馬。接武泥犁。不知自是何人。比擬大權菩薩。其惑五也。故經云。應當發願。願生彼國。則不信諸佛誠言。不願往生淨土。豈不迷哉。……嗚呼。人無遠慮。必有

近憂。一失人身。萬劫深悔。故率海眾。各念彌陀。百聲千聲。乃至萬聲。迴向同緣。願生彼國。竊冀蓮池勝會。金地法盟。倚互相資。必偕斯願。操舟順水。更加櫓棹之功。則十萬之遙。可不勞而至也。

慈照大師 諱子元。號萬事休。茅姓。昆山人。母夢佛入門而生。師。十
九落髮。習止觀。後聞鴉聲悟道。於是利他心切。慕廬山蓮社遺風。建
白蓮懺堂。撰白蓮懺法。代為眾生禮佛懺悔。普勸大眾持戒念佛。求
生安養。又述圓融四土三觀選佛圖。開示蓮宗眼目。孝宗詔至德壽
殿。演說淨土法門。賜號白蓮導師。臨終合掌而逝。荼毘舍利無算。
師云。汝今欲修念佛三昧。求生淨土。速成佛果菩提者。須專以念佛為
正行。更以諸惡莫作。眾善奉行。所修一切善根。悉皆迴向淨土。成就念
佛功德。速證菩提。可謂順水行船。更加撻棹矣。○早晚專心禮拜彌陀。
如朝帝王。兩不失時。日就月親。心口與佛相應。去佛不遠。口念心想。心

願見佛。發深重心。決信無疑。日久歲深。功夫純熟。自然三昧成就。○臨終有三疑四關。為往生之障。須急除之。三疑者。一疑宿業極重。修持日淺。恐不得生。二疑債願未了。三毒未息。恐不得生。三疑我雖念佛。佛不來迎。恐不得生。四關者。或因病苦而謗彌陀。或因貪生而行牲祭。或因服藥而用酒腥。或因愛戀而繫家庭。

有嚴大師 胡姓。臨海人。六歲依靈鷲從師。十四受具。學於神照法師。悟一心三觀之旨。旋主赤城寺。後隱故山東峰。廬於檀木之傍。因白號檀庵。一鉢之外。不蓄分寸。嚴護戒律。專修淨業。所得三昧。每現瑞應。凡有著述。均闡蓮宗。靖國元年。一日天神降空。報曰。師淨業成矣。又夢池中。大蓮花。天樂圍繞。乃作自餞詩。卻後七日。跌坐而化。

師云。原夫佛慈接物。方便多門。有定散之善焉。有佛法之力焉。有事福而假願力迴向焉。有垂終劇怖而賴求救焉。如是等類。百千萬數。但藉

其一。必得往生。定善者。修心妙觀。首楞嚴定是也。散善者。如無量壽經。十念念佛。亦得往生是也。佛力者。緣阿彌陀佛。大悲願力。攝取念佛眾生。眾生承佛願力。即得往生。如劣夫從轉輪王。一日一夜。周行四天下。非其自力。輪王之力也。法力者。如佛告蓮華明王菩薩。令誦灌頂神咒。加持沙土。散亡者尸。或亡者墓。彼之亡者。或墮地獄。餓鬼。畜生中。承是真言。生極樂國是也。事福假迴向者。慈心不殺。具諸戒善。受持密咒。讀誦大乘。種種福善。迴向莊嚴。成淨土因。得生極樂是也。垂終求救者。臨命終時。火車相現。稱佛力故。猛火化為清涼風。如僧雄俊。及張鍾馗。一稱佛號。共生淨土是也。

道琛大師 彭姓。樂清人。十八受具。初學律。後從明法寺淵師參究。向上。建炎三年。勅主資福院。賜號圓辯。專修念佛三昧。嘗於定中見法智大師。覺而頓明。台宗要旨。行法華三昧。感普賢放光。遂建淨土。

繫念會集眾念佛。臨終眾聞異香滿室。師曰。佛來接我矣。書偈曰。唯
心淨土。本無迷悟。歸去來兮。即入初住。令誦安樂行品。未終而寂。

師云。或曰。唯心淨土。本性彌陀。為當往生。為即心是。若往生者。何謂唯
心。若即心是。何故經云。過十萬億佛土耶。答曰。當知十界四土。若淨若
穢。不離我心。此但直具而已。若達全具。為徧徧彼生佛。彼彼生佛。互徧
亦爾。趣舉一法。是法界之大都。互具各具。互融互攝。參而不雜。離亦不
分。一多自在。不相留礙。夫如是者。豈有娑婆釋迦。樂邦彌陀。而離我心
耶。故輔行曰。學者縱知內心具三千法。不知我心徧彼三千。彼彼三千。
互徧亦爾。苟順凡情。生內外見。應照理體。本無四性。心佛眾生。三無差
別。今更以譬喻顯之。如彼帝釋殿上。千珠寶網。眾珠之影。映在一珠。一
珠具足眾珠。彼彼千珠。互映亦爾。現前一心。即是千珠中一。彼彌陀佛
土。亦是千珠中一。所有十界眾生。趣舉一界。皆是千珠中一。既我一珠。

能映眾珠。我珠之外。無復眾珠。則離我心外。無別淨土。何故爾耶。以釋迦亦是一珠。既舉一全收。豈心外有法。故曰。唯心淨土。本性彌陀也。若爾。唯心而已。何云淨土。須知體非因果。一念唯心。迷悟既殊。因果宛爾。彌陀果悟。我等因迷。忻厭心生。順佛勸往。故云唯心。又稱淨土矣。然則既有取捨忻厭。莫成虛偽耶。曰。當知圓人捨。則捨穢究竟。三十九界皆捨。取則取淨窮原。直取上品寂光。故妙宗曰。取捨若極。與不取捨。亦非異轍。良由寂光不離三土。十界只是四土耳。若以四眼二智觀之。則萬象森羅。三十九界須捨。若以佛眼觀之。則真空真寂。非離三十九界。別有寂光。非寂光外。別有娑婆。如古德曰。只緣即心是佛。須假修行者。乃此意也。若了唯心本性。只一三千融妙之法。十萬遐方。皆不為礙。何以故。以心具故。以三千故。以融攝故。故得如斯。以上略提梗概。若欲深證此理。須除情想始得。

宗坦大師 申姓。黎城人。年十六落髮受具。少通義學。遍訪名師。垂五十年。名播講林。晚於唐鄧汝穎之間。專弘淨土。向化者甚眾。後於唐州青臺鎮。誓求安養。精進絕倫。嘗夢阿彌陀佛告曰。汝說法只六日。當生淨土。至期白眾曰。因緣聚散。固當有時。淨土勝緣。豈宜錯過。願眾念佛助我往生。遂端坐而寂。雲涌雷鳴。從西而來。三日方歇。師云。或專念一句南無阿彌陀佛。萬德洪名。或緣想西方。依正主伴勝境。務須恭敬尊重。與己有緣之佛。菩薩像。及經典。師友。或於臨壽終時。為苦所逼。須緣佛像。兼稱佛號。作求生淨土之想。像前燒香散華。供養不絕。生病人善心。囑稱十念。聲聲相續。令高聲稱念。藉聲束心。使心不散。故大集經。大莊嚴論。皆說高聲念佛。有十種功德。一能排睡眠。二天魔驚怖。三聲徧十方。四三途息苦。五外聲不入。六念心不散。七勇猛精進。八諸佛歡喜。九三昧現前。十往生淨土。

真歇大師 諱清了。雍姓。蜀西安昌人。襁褓時入寺見佛。喜動眉睫。年十一。依聖果寺清俊大師出家。十八登講場。尋棄講習禪。傲然以行。道俗遮留不顧。至沔漢。扞丹霞室。一日登鉢孟峰。忽然大悟。後住杭州率亭山。光孝寺。及溫州江心寺。大振禪宗。道幾半天下。又弘念佛法門。兼以自修。嘗作淨土說行世。紹興廿一年。無疾念佛坐化。

師云。宗門大匠。已悟不空不有之法。秉志孜孜於淨業者。得非淨業之見佛。尤簡易於宗門乎。又曰。乃佛乃祖。在教在禪。皆修淨業。同歸一源。入得此門。無量法門。悉皆能入。又曰。洞下一宗。皆務密修。其故何以。良以念佛法門。徑路修行。正按大藏。接上上根器。傍引中下之機。○一心不亂。人皆可以行之。由持名號。心不亂故。如龍得水。似虎靠山。此即楞嚴所謂。憶佛念佛。現前當來。必定見佛。去佛不遠。不假方便。自得心開之謂也。○淨土不離眾生心。是三無別。極樂遍在一切處。舉一全收。如

帝釋殿上。千珠寶網。千珠光影。咸入一珠。一珠光影。徧入千珠。雖珠珠互徧。此珠不可為彼珠。彼珠不可為此珠。參而不雜。離而不分。一一徧彰。亦無方所。彌陀淨土。即千珠之一。十萬億佛國。一佛一國土。亦各千珠之一。聖人善巧方便。示人專念阿彌陀佛。乃千珠直指一珠。見一佛即見十方諸佛。亦見九界眾生。微塵刹海。十際古今。一印頓圓。了無餘法矣。按師嗣法於曹洞門下。丹霞淳禪師。故曰洞下一宗。皆務密修者。謂密修淨業也。以其宗徒。雖則明倡禪宗。實則密修淨業故。

宗曉大師 字達先。王姓。四明人。年十八受具。先從具庵強公。次謁雲庵洪公。主昌國翠羅。後退隱西山。日誦法華經。又篤修淨業。嘗撰樂邦文類五卷。及樂邦遺稿二卷。蓮宗名作。多賴以傳。實大有功於淨土教者也。嘉定七年八月示疾。乃書偈曰。清淨本來不動。六根四大紛飛。掃卻雲霞霧露。一輪明月光輝。泊然而寂。時年六十有九。

師云。修淨業者。若鈍根人。當先作白骨觀。從白骨放光中。觀佛相好。利根人。則先作淨光。從中觀佛。右法見大藏圖字函。今錄於此。以資思修云耳。○昔善導大師有曰。若人欲速得往生者。應起無間修。所謂恭敬禮拜。稱名讚歎。憶念觀察。迴向發願。心心相續。不以餘業相間。故曰無間修。又若貪瞋癡起者。但隨犯隨懺。不令隔日隔夜。常使清淨。亦名無間修。若能畢命。誓不中止。決定往生。

中峰大師 諱明本。孫姓錢塘人。兒時戲。必為佛事。稍長。閱經行道。晝夜彌勵。困則觸柱自警。後往天目高峰處。密扣心要。遂獲大悟。說法無礙。著書甚多。大德十年。出主師子院。人稱中峰和尚。仁宗詔師不至。製金襴袈裟贈之。賜號佛慈圓照廣慧禪師。嘗著淨土詩百八首。及三時繫念佛事等書行世。至治三年。別眾而逝。諡普照國師。師云。古者道清珠投於濁水。濁水不得不清。佛號投於亂心。亂心不得

不佛。此珠之入水。自寸而尺。此水隨珠下處。變濁為清。以至於底。當雜念紛亂之頃。能移一念。觀想慈容。而稱念之。纔念一聲。即一念之間。散亂遠離。隨念寂靜。且一聲之念既爾。移念入第二中。譬如清珠之入水二寸也。自最初一念清淨。至第二念亦清淨。乃至第三。第四五。至於十百千萬億念。念念清淨。念念寂滅。念念純真。念念解脫。如教中所謂。淨念相繼者也。又詩云。一串數珠烏律律。百千諸佛影團團。循環淨念常相繼。放去收來總一般。

優曇大師 諱普度。蔣姓。丹陽人。弱冠出家。居廬山東林。篤修淨土。至大初。白蓮教匪盛行。邪正不分。因紹罷蓮宗。師曰。吾承斯道。將卅年矣。一旦亡於吾世。可乎。遂著蓮宗寶鑑十卷。辯明邪正。書成。證之諸方。莫能易一字。進奏。降旨褒美。令梓行天下。有開導人天。續佛慧命。復振東林之語。復命師為教主。賜號虎溪尊者。臨終念佛而逝。

師云。若念佛之人。塵垢未淨。惡念起時。急須高聲念佛。斂念歸正。勿令惡心相續。直下打併淨盡。永不復生。○纔有疾病。正要上前。坦蕩身心。莫生疑慮。直須向西正坐。專想阿彌陀佛。觀音勢至。及諸化佛。現在其前。一心稱念。南無阿彌陀佛。聲聲不絕。於諸世間。一切事務。不得思念。不得貪戀。或心念起。但急稱佛號。於念念中。滅除罪障。只此一念。決定往生淨土。命若未盡。自得安寧。慎勿妄起留戀世間之心。當存自存。當死須死。但辦往生。何須疑慮。若解此理。如脫蔽衣。以著上服。一捨凡身。便登聖地。豈不偉哉。○執持一句阿彌陀佛。一念之中。與理相應。諸法現前。六度具足。布施則心無染著。持戒則不起妄緣。忍辱則能所俱忘。精進則心無間斷。禪定則動靜俱寂。智慧則不立絲毫。

天如大師 號維則。譚姓。永興人。幼年出家。得法於中峰明本禪師。至正初。住蘇州城內師子林。即菩提正宗寺。一時宰官長者多往參。

學。屢詔問。皆稱疾不起。師既密契單傳。復推天台永明之旨。兼弘淨土之教。嘗著淨土或問。破諸疑惑。勸人念佛求生西方。以期一生了辦。師自修極為精篤。明洪武元年入滅。寂時靈瑞甚多。年七十一。師云。或問。圓觀之修。唯心之念。似上根之行門。華嚴十願。寶積十心。亦大根之功用。根器不對。功行難成。今吾自揣。觀吾自好。唯專持名號。加禮拜懺悔而已。師為如何。答。善哉善哉。汝知量矣。觀汝之言。正合善導。專修無間之說矣。無間修者。身專禮阿彌陀佛。不雜餘禮。口專稱阿彌陀佛。不稱餘號。意專想阿彌陀佛。不雜餘想。○念佛者。或專緣三十二相。繫心得定。開目閉目。常得見佛。或但專稱名號。執持不散。亦於現身。而得見佛。此間現見。多是稱佛名號為上。稱名之法。必須制心。不令散亂。念念相續。繫緣佛號。口中聲聲喚阿彌陀佛。以心緣歷。字字分明。稱佛名號。無管多少。並須一心一意。心心相續。如此方得一念滅八十億。

劫生死重罪。若不然者。滅罪良難。

妙叶大師 四明人。嘗研天台教觀。深修念佛三昧。時學者每惑於
白性唯心等語。因藥致病。極樂淨土。不求於西方。而求之於分別緣
影。師愍其愚。乃撰寶王三昧念佛直指二卷。時在洪武廿八年。頃海
內禪淨之徒。一時均獲津梁焉。後二百餘年。蓮池大師出。心慕其書。
因久失傳。竟未獲見。後萬融禪師偶得之。滿益大師。已收入十要。
師云。行者發心。必使入於道場。先觀我及盡虛空界。一切眾生。常在生
死大海。若不令其普脫。何名正行。於是等觀。寃親之境。起大悲心。……
定不為弊魔惡黨所退轉。如是。大心既立。然後審古賢念佛正行。如法
建立道場。極令嚴淨。於是三心圓發。五體投誠。觀佛相好。胡跪合掌。運
心普緣。無邊刹海。一切眾生。及我此身。自昔至今。流浪不返。深為可痛。
涕淚悲泣。求佛垂慈。不覺身如大山崩。皈命三寶。手擎香華。想遍法界。

敬禮投誠。破腹洗腸。發露罪過。晝夜六時。尅期練行。或障深未感。至死為期。於中不得剎那念世五欲。若根機不等。勝行難全。亦必處於淨室。內外肅清。隨意力行。禮佛懺悔。日定幾陳。精進一心。誓不中悔。或專誦經。或專持咒。或但持佛名號。若得見相好。即知罪滅緣深。○或問。如何用心。不得散亂。答。能運身口之念。勿論其散。但不間斷。自能一心。亦可即名一心。惟行之不休為度。固不必憂散亂矣。如母喪愛子。龍失命珠。不期一心。而自一心。豈制之令一心。不可制。實在行人勤怠耳。嗟。今之人。修而無效。蓋信根淺薄。因地不真。未曾立行。先欲人知。內則自矜。外則顯耀。使人恭敬。意有所得。甚至妄言。得覩淨境。或見小境。及夢中善相。未識是非。先須明說。此等卑下。必為魔惑。願行退失。隨生死趣。可不慎哉。……乃至小罪。猶懷大懼。解隨大乘。行依小學。○念佛若為宿業所使。願行有虧。當一心誦。拔一切業障根本。得生淨土。陀羅尼。持一遍。

即滅身中一切五逆十惡等罪。持十萬。即得不廢忘菩提心。持二十萬。即感菩提芽生。持三十萬。阿彌陀佛。常住其頂。決生淨土。

空谷大師 名景隆。陳姓。吳縣人。幼不如輩。好趺坐。若禪定然。從懶

雲和尚參叩大法。年廿八。出家虎邱。依石庵和尚於杭州靈隱寺。尋往天目。刻苦參究。忽有省。馳詣懶雲。遂蒙印可。師雖大悟心宗。然自行化他。均在淨土。嘗著淨土詩一百八首行世。又自為骨塔於錢塘。且自作銘。及成。常居其間。念佛以待終。時年已七十四矣。後不詳。

師云。念佛一門。修行捷徑。識破此身不實。世間虛妄。唯淨土可歸。念佛可恃。緊念緩念。高聲低聲。總無拘礙。但令身心閒淡。默念不忘。靜鬧閒忙。一而無二。忽然觸境遇緣。打著轉身一句。始知寂光淨土。不離此處。阿彌陀佛。不越自心。然欲將心求悟。反成障礙。但以信心為本。一切雜念。都不隨之。如是行去。縱然不悟。沒後亦必往生淨土。階級進修。無有

退轉。

宗本大師 字一元。陳姓。四明人。幼習儒。通詩禮。年十五見族兄朽木處士去世。驚怖憂疑。遂欲出家學道。以了生死。後於杭州之茶亭禮佛。遇一禪師。迎歸供養。拜問修法。禪師深加讚歎。因以念佛法門教之。既出家。窮參力究。頓明向上。旋復專修淨土法門。隆慶中。集歸元直指一書。廣弘彌陀之教。李卓吾嘗極稱之。後隱居。不知所終。

師云。念佛初不問是何人。凡以平生惡多自諉。而不肯念者謬矣。念佛初不管是何時。凡以年老及臨終自推託。而不肯念者謬矣。念佛初不拘是何法。凡立一定規。使千人一律。以致妨礙進修者謬矣。須知不揀賢愚。不擇貴賤。不在貧富。不分男女。不拘老幼。不拘僧俗。不論久近。皆可念佛。或高聲念。或低聲念。流水念。頂禮念。攝心念。參究念。觀想念。轉珠念。乃至行念。立念。坐念。臥念。默念。明念。千念。萬念。皆同一念。唯要決

定信心。求生淨土。果能如是行持。何用別求知識。可謂行船盡在把梢人。達者同登極樂國。

幽谿大師 字無盡。號傳燈。葉姓。衢州人。少從映庵出家。聽百松法師講法華經。有省。因問楞嚴大定。松瞠目周顧。師遂悟。後隱幽溪。學者輻輳。一生修諸懺法。及四種三昧。無虛日。暮年奉慈雲之行願二門。為日課。講自撰之淨土生無生論於石城。每登座。眾聞天樂臨虛。講畢乃止。臨終以指向空書妙法蓮華經五字。并自唱經題而化。

師云。念佛正行有二。一稱名。二觀想。稱名如小本彌陀經。七日持名。一心不亂。有事一心。有理一心。若口稱佛號。繫心在緣。聲聲相續。心心不亂。使念心漸漸增長。從漸至久。自少至多。一日二日。乃至七日。畢竟要成一心不亂而後已。此事一心也。理一心亦無他。但於事一心。念念了達。能念之心。所念之佛。三際平等。十方互融。非空非有。非自非他。無去

無來。不生不滅。現前一念之心。便是未來生淨土之際。念而無念。無念而念。無生而生。生而無生。於無可念中熾然而念。於無可生中熾然求生。是為事一心中明理一心也。二觀想者。具如觀無量壽佛經。境有十六。觀佛最要。當觀阿彌陀佛丈六身。作紫摩黃金色像。立寶池蓮華上。垂手接引狀。身有三十二大人相。八十種隨形好。此二種正行。須相須而進。凡行住坐臥時。則一心稱名。凡跌坐蒲團時。則心心作觀。行倦則跌坐以觀佛。坐久則經行以稱名。苟於四威儀中。修之無間。則往生西方必矣。○以橫豎三觀三諦。明念佛一行。橫論三觀。則能念屬乎三觀。所念屬乎三諦。如正稱名時。了能稱心。非內非外。無形無狀。即空觀。雖非內外形狀。而此能念之心。歷歷分明。即假觀。而此能念。非離念而有空。亦非離空而有假。雙遮雙照。即中觀。所稱佛名。及以音聲。如空谷中響。如水中月。了不可得。即真諦。雖了不可得。而佛號音聲。宛然在口。顯

然在耳。即俗諦。而此所念。亦非離真而有俗。亦非離俗而有真。俱存俱忘。即中諦。此橫論三觀三諦也。若豎論者。只以一心不亂。萬緣俱寂者。為空觀。以所念六字聖號。朗朗分明者。為假觀。能念雖空。而念者宛然。所念雖假。而空響不實。如是則即空不空。而空即假。即假非假。而假即空。雙遮雙照。境觀雙忘。所謂境為妙。假觀為空。境觀雙忘。便是中。忘照何曾有前後。一心融絕了無踪。

紫柏大師 沈姓。句曲人。出家後。禪淨雙修。均入壺奧。遊京師。神宗甚重之。因改大藏梵策為方冊。師荷法剛毅受嫉。忽妖書至。逮師拷訊。持理正而神色泰然。無何入獄。法司復受賄。欲加害。師曰。既爾何用汝為。遂索浴說偈。端坐而化。師生平所示念佛法門甚切。謂臨終正念。全恃平時功深。今師來去自由。其平時所修。可想而知矣。師云。念佛心真不真。勘驗關頭。只在歡喜煩惱處取證。其真假之心。歷

然可辨。大抵真心念佛人。於歡喜煩惱中。必然念念不間斷。是以煩惱也動他不得。歡喜也動他不得。二者既不能動。生死境上。自然不驚怖。今人念佛。些小喜怒到前。阿彌陀佛便拋在腦後矣。如何能得念佛靈驗。若依我念佛。能於憎愛關頭。不昧此一句阿彌陀佛。而現前日用。不能受用。臨終不得生西方者。我舌根必然破爛。若不依我法行。則念佛無靈驗。過在於汝。與我無干。○又問學者云。汝念佛常間斷否。答。合眼睡時。便忘記了。師震威呵曰。合眼便忘。如此念佛一萬年也莫幹。汝自今而後。直須睡夢中。念佛不斷。乃有出苦分。若睡夢中。不能念佛。忘記了。一開眼時。就痛哭起來。直向佛前叩頭懺悔。或念千聲。或念萬聲。盡自家力量便罷。如此做三二十翻。自然大昏睡中。佛即不斷矣。

蓮池大師 蓮宗八祖也。諱株宏。沈姓。仁和人。弱冠後。依姓天和尙披剃。尋受具。遍參知識。禮五台。感文殊放光。見雲栖幽寂。有終止志。

山民苦虎患。師誦經施食。患即除。歲旱。循田念佛。雨隨足至。於是化道大盛。師以念佛法門。普攝三根。著雲栖法彙廿餘種。提倡淨土。臨終前。遍辭繙素。至期念佛坐化。眾請留囑。曰。老實念佛。年八十一。

師云。念佛者。有默持。有高聲持。有金剛持。然高聲覺費力。默念易昏沈。只是綿綿密密。聲在於唇齒之間。乃謂金剛持。又不可執定。或覺費力。則不妨默持。或復昏沈。則不妨高聲。○久亂之心。一時難定。念佛心不清。不必憂。只要功夫深耳。字字句句當心念。○雜念是病。念佛是藥。念佛正治雜念。而不能治者。因念佛不親切也。雜念起時。即用心加工念。字字句句。精一不二。雜念自息矣。○萬念紛飛之際。正是做工夫時節。旋收旋散。旋散旋收。久後工夫純熟。自然妄念不起。且汝之能覺妄念重者。虧這一句佛耳。如不念佛之時。瀾翻潮湧。剎那不停者。自己豈能覺乎。○夫學佛者。無論莊嚴形迹。只貴真實修行。在家居士。不必定要

緇衣道巾。帶髮之人。自可常服念佛。不一定要敲樵擊鼓。好靜之人。自可寂然念佛。不一定要成群做會。怕事之人。自可閉門念佛。不一定要入寺聽經。識字之人。自可依教念佛。千里燒香。不如安坐家堂念佛。供奉邪師。不如孝順父母念佛。廣交魔友。不如獨身清淨念佛。寄庫來生。不如現在作福念佛。許願保禳。不如悔過自新念佛。習學外道文書。不如一字不識念佛。無知妄談禪理。不如老實持戒念佛。希求妖鬼靈通。不如正信因果念佛。以要言之。端心滅惡。如是念佛。號曰善人。攝心除散。如是念佛。號曰賢人。悟心斷惑。如是念佛。號曰聖人。○一勸極閒人念佛。婚嫁都畢。子孫克家。安閒無事。正好儘心儘力念佛。每日念幾千聲。乃至幾萬。一勸半忙閒人念佛。半了不了。或忙或閒。雖不極閒。亦可忙時治事。閒時念佛。每日念幾百聲。乃至幾千。一勸極忙人念佛。勤勞公務。奔波家業。雖無閒時。也須忙裡偷閒念佛。每日晨朝十念。乃至日

間或念幾百。○我出家後。到處參訪。時辯融大師。門庭大振。予自京師叩之。膝行再請。師曰。你可守本分。不要去貪名求利。不要去攀援。只要因果分明。一心念佛。予受教而退。時同行者大笑。謂這幾句話。那個說不出。千里遠來。只道有甚高妙處。原來不值半文錢。予曰。這個正見他好處。我們渴仰企慕。遠來到此。他卻不說玄說妙。陵駕我們。只老老實實。把自家體認過。切近精實的工夫。叮嚀開示。故此是他好處。我至今猶著實遵守。不曾放失。

憨山大師 字德清。蔡姓。金陵人。十九出家。專心念佛。一夕夢阿彌陀佛現身空中。自後常若在目。參究向上近十年。乃大悟。已而隱於嶗山。其地素不聞法。久之。三歲孩子皆知念佛。聖慈太后。歸依座下。尊禮備至。上怒太后厚施。捕師遣戍雷州。因中興曹溪道場。後蒙恩詔還。居廬山。專修淨業。旋於曹溪。念佛坐化。年七十八。肉身現存。

師云。修行第一要為生死心切。生死心不切。如何敢云念佛一片。若人果為生死心切。念念如救頭然。只恐一失人身。萬劫難復。要將這一聲佛咬定。定要敵過妄想。一切處。念念現前。不被妄情牽纏遮障。如此下苦工夫。久久成熟。自然相應。如此不求成片。而自然成片矣。○於二六時中。單將一句阿彌陀佛。橫在胸中。念念不忘。心心不昧。一切世事都不思想。但只將一句阿彌陀佛。作自己命根。咬定牙關。決不放捨。乃至飲食起居。行住坐臥。此一聲佛時時現前。若遇煩惱境界。心不安時。就將這一聲佛。提起一拶。即見煩惱當下消滅。以念念煩惱是生死苦根。今以念佛消滅煩惱。便是佛度生死苦處。若念佛消得煩惱。便可了得生死。更無別法。……若念至一心不亂。則臨命終時。淨土境界現前。自然不被生死拘留。則感阿彌陀佛。放光接引。此必定往生之效驗也。然一心專念。固是正行。又必資以觀想。更見穩密。……於十六觀中。隨取

一觀。或單觀佛。及菩薩妙相。或觀淨土境界。如彌陀經說蓮華寶地等。隨意觀想。若觀相分明。則二六時中。現前如在淨土。坐臥經行。開眼閉眼。如在目前。若此觀想成就。臨命終時。一念頓生。所謂生則決定生。去則實不去。此唯心淨土之妙旨也。……是故行人。第一以持戒為基本。以發願為助因。以念佛觀想為正行。又正當念佛觀時。將身心一齊放下。絲毫不存。心地如空。不見一法。即是空觀。即於此空心中。提一聲佛。隨舉念處。即觀佛像。如觀目前。歷歷分明不昧。即是假觀。然於正觀念時。返照能觀能念心體。空空寂寂。當空寂中。又觀念不忘。如此不忘不著。一心靈照。即中道觀。然此三觀。不用安排。但只舉念。則三觀一心。一念具足。此中又不可將昔日安排三觀措心。否則不妙矣。○十二時念佛者。人數不拘多寡。晝夜各分六班。照香輪流出班禮念。餘則靜坐。隨聞默念。或習觀門。願者隨之。此則靜多動少。不繁不亂。而佛聲不斷。則

妄念不生。如相呼相喚。不散不昏。動靜一如。自他不二。寤寐恆常。此則不起於座。頓見彌陀。是為第一如意妙行。至若飲食。亦宜如法調之。務使內外一如。則人我兩忘。是非俱泯。而道場之安恬寂寞。亦無如此之妙者。

蕩益大師 蓮宗九祖也。號智旭。鍾姓。吳縣人。父持大悲咒十年。夢觀音送子而生師。少以孔學自任。著書闢佛。及閱竹窗隨筆。始焚自著。廿四出家。參究向上。遇疾且殆。乃一意專修淨業。後隱靈峰。著述宏博。臨終遺命。焚後。屑骨和麵。分施禽魚。結西方緣。遂趺坐西逝。閱三年。啟視。髮長覆耳。面如生。門人未敢如遺命。乃建肉塔於靈峰。

師云。念佛法門。別無奇特。只是深信切願。力行為要耳。只貴信得及。守得穩。直下念去。或晝夜十萬。或三萬五萬。以決定不缺為準。畢此一生。誓無改變。而不得往生者。三世諸佛。便成誑語。一得往生。則永無退轉。

種種法門。悉得現前。切忌今日張三。明日李四。……豈知念得阿彌陀佛熟。三藏十二部。極則教理。都在裏許。千七百公案。向上機關。亦在裏許。三千威儀。八萬細行。三聚淨戒。亦在裏許。○真能念佛。放下身心世界。即大布施。真能念佛。不復起貪瞋癡。即大持戒。真能念佛。不計是非人我。即大忍辱。真能念佛。不稍間斷夾雜。即大精進。真能念佛。不妄想馳逐。即大禪定。真能念佛。不為他歧所惑。即大智慧。試自檢點。若于身心世界。猶未放下。貪瞋癡念。猶自現起。是非人我。猶自掛懷。妄想馳逐。猶未除滅。種種他歧。猶能惑志。便不名為真念佛也。○深信切願念佛。而念佛時。心多散亂者。即是下品下生。深信切願念佛。而念佛時。散亂漸少者。即是下品中生。深信切願念佛。而念佛時。便不散亂者。即是下品上生。念到事一心不亂。不起貪瞋癡者。即是中三品生。念到事一心不亂。任運先斷見思塵沙。亦能伏斷無明者。即是上三品生。故信願持

名念佛。能歷九品。的確不謬也。○信願持名。消伏業障。帶業往生者。即是凡聖同居淨土。信願持名。見思斷盡。而往生者。即是方便有餘淨土。信願持名。豁破一分無明。而往生者。即是實報莊嚴淨土。信願持名。持到究竟之處。無明斷盡。而往生者。即是常寂光淨土。是故持名。能淨四土。亦的確不謬矣。○所持之佛名。無論悟與不悟。無非一境三諦。能持之念心。無論達與不達。無非一心三觀。只為眾生妄想執著。情見分別。所以不契圓常。殊不知能持者。即是始覺。所持者。即是本覺。今直下持去。持外無佛。佛外無持。能所不二。則始覺合乎本覺。即究竟覺矣。○念佛而一心不亂。即是靜。一心不亂而念佛。即是慮。然則一心念而律儀攝矣。○念佛有事持。理持。事持者。信有西方阿彌陀佛。而未達是心作佛。是心是佛。但以決志願求生故。如子憶母。無時暫忘。理持者。信西方阿彌陀佛。是我心具。是我心造。即以自心所具所造洪名。為繫心之境。

令不暫忘也。○念他佛者。託阿彌陀佛。果德莊嚴。以為我所念之境。專心注意而憶念之。或憶名號。或想相好。或緣四十八願。往昔洪因。或觀力無畏等。現在勝德。總名為念他佛。貴在歷歷分明。一心不亂。則三昧功成。徑登淨域矣。○念佛一行。乃有多途。小經重持名。楞嚴但憶念。觀經主於觀境。大集觀佛實相。後世智徹禪師。復開參究一路。……獨參究之說。既與禪宗相濫。不無誦論可商。試嘗論之。心佛眾生。三無差別。果能諦信。斯直知歸。未了之人。不妨疑著。故誰字公案。曲被時機。有利亦有大害。言大利者。以念或疲緩。令彼深追力究。助發良多。又未明念性本空。能所不二。藉此為敲門瓦子。皆有深益。必淨土為主。參究助之。徹與不徹。始不障往生。言大害者。既涉參究。便單恃己靈。不求佛力。但欲現世發明。不復願往。或因疑生障。謂不能生。甚則廢置萬行。棄捨經典。古人本意。原欲攝禪歸淨。於禪宗開此權機。今人錯會。多至捨淨

從禪於淨宗翻成破法。全乖淨業正因。安冀往生彼國。○吾人從無始來。直至盡未來際。決無不起念時。縱心慮灰凝。人無想定。仍墮八萬四千枯槁亂想。但念地獄則地獄界人。念餓鬼則餓鬼界人。乃至念佛則為佛法界人耳。此理至明。故宗鏡錄云。一念相應。一念佛。念念相應。念念佛也。……盡一日中。出聲一炷香。默持一炷香。循環無間。必以一心不亂為期。此簡巧之行。須深信勿疑。久久勿替。自當圓超五濁。圓淨四土。更莫向含元殿裏問長安也。○深心念佛者。深心。自救救他之心也。佛者。靈知靈覺之極致。深心念佛者。以自救救他之心。契於靈知靈覺之極致。令若自若他。念念解脫者也。……當知生佛同體。佛者。無上眾生。眾生者。即未來諸佛。一念一切念。一切念一念可也。○證心大德問心要於予。余曰。心要莫若念佛。壽昌云。念佛心即是佛。蓋現前一念之心。無性緣生。緣生無性者也。惟其無性緣生。故念名滿腔是名。念利滿

腔是利。乃至晝所為。夜所夢。無不趨歸於一念之專注。而十界昇沈從此出矣。惟其緣生無性。故熾然造集善惡之時。驀地放下。則一切法了不可得。然設向此了不可得處坐定。則墮無為深坑。不能證法界無障礙體。不能起法界無障礙用。故須念佛求生淨土。方是大乘不可思議圓頓法門。夫念佛者。豈有他哉。以此緣生無性之一念。念彼無性緣生之佛名耳。佛名既是無性緣生。則緣生亦仍無性。是故念一聲有一聲。佛名顯現。念十百千萬聲。有十百千萬聲。佛名顯現。而不念時便寂然矣。念性既是緣生無性。則無性不礙緣生。儻不念佛。正恐又生種種雜念。縱不生雜念。亦恐墮在無生窠臼。故必以佛號生我之念。使我念念不離佛號。此乃心外無佛。佛外無心。是心作佛。是心是佛。謂之以佛證心可也。謂之以心證佛可也。謂之以佛證佛。以心證心亦可也。至直捷穩當。至圓頓了義。不可思議。不可將餘一切法門比量。果如此信得及。

直下念去。則諸佛出廣長舌。以證之。若人專念彌陀佛。號曰無上深妙禪。至心想像見佛時。即是不生不滅法。金口誠言。可不信哉。○念佛三昧。名寶王三昧。三昧中王。凡偏圓權實種種三昧。無不從此三昧流出。無不還歸此三昧門。蓋至圓頓之要旨。亦三根普被之巧方便也。眾生心性。一而已矣。只此一心。法爾具足。真如生滅二門。正隨緣而不變。名真如門。即不變而隨緣。名生滅門。依真如門。說圓實教。依生滅門。說偏權教。離真如無生滅。權是實家之權。故可為實施權。離生滅無真如。實是權家之實。故須開權顯實。為實施權。有藏通別之三。開權顯實。統惟圓教之一。權實四教。無非念佛法門。所謂念自佛。念他佛。雙念自他佛。約四教成十二種念佛三昧。又常行等四種三昧。同名念佛。一一三昧。各具十二。則四十八種。復次念他佛者。或念相好。念法門。念實相。以例念自念雙。亦可成三。廣歷四三昧。四教則一百四十四種。一一種。復有

無量境觀差別。非言可宣。而持名一法。出佛說阿彌陀經。仍在前來種種三昧之外。觀經云。汝若不能念彼佛者。應稱無量壽佛名字是也。此持名法門。雖似曲為中下。仍復最頓最圓。所持之名。無論解與不解。當體無非一境三諦。能持之心。無論達與不達。當體無非一心三觀。請嘗言之。六字彌陀。為因名故名。為因心故名。為亦名亦心故名。為非名非心故名。若因名故名。名應自持。何待心持。又名能自持。與心何預。若因心故名。是心本有名。則不持時。名何不現。若亦名亦心故名。名能有名。何待於心。心能有心。何待於名。又此名字。誰半屬名。誰半屬心。且不持時。名中半名雖無。心中半名應在。離既各無。合云何有。若非名非心故名。既非名非心。何能更有彌陀名字。如此推名。名字性空。緣生幻有一名字性。即一切名字性。名字即法界。中道實相。舉一全收。無一法在名字外。所念境諦既爾。能念觀智。例此可知。復次束此境三。總名妙假。舉

正報。咳依報。舉化主。咳徒眾。舉假名。咳實法。一句名號。三千歷然。故復次束此三觀。總名為空。以覓心無朕故。復次名若是心。復何為名。名若非心。心何持名。心若是名。復何為心。心若非名。名何預心。於其中間。無是非。豈非即中。幽谿云。境為妙。假觀為空。境觀雙忘。便是中。忘照何曾有前後。一心融絕了無踪。此之謂也。悟此理而持名。則一稱一念。頓圓無上菩提。縱未悟而捻珠記數。矻矻窮年。未嘗不暗合道妙。全在妙境。妙觀之中。久久熏習。性德漸顯。如染香人。身有香氣。不假方便。自得心開。此蓮宗諸祖所以極力弘揚也。誰有智者。捨此別求岐徑哉。

思歸集卷二終

念佛發願文

願我臨終無障礙。阿彌陀佛遠相迎。
觀音甘露灑吾頭。
勢至金臺安我足。一剎那中離五濁。
屈伸臂頃到蓮池。
蓮華開後見慈尊。親聽法音可了了。
聞已即悟無生忍。
不違安養入娑婆。善知方便度眾生。
巧把塵勞為佛事。
我願如斯佛自知。畢竟當來得成就。

（此文古今大有靈驗。有正發願時。見諸瑞相者。或夢中見佛放光者。行者當想彌陀恩德無量。自悲障重不見。須生慚愧。深自痛責。願見彌陀。能如是行。久之必見。）

思歸集卷三

印光法師鑑定 思歸子釋如岑敬輯

堅密大師 字成時。吳姓。歙縣人。廿八出家。禪教二宗。多所參訪。及見滿益。遂終身依止。歙人延師居仰山。山中猛虎皆馴伏。撰齋天儀。感天神現身。後住江寧半峰。大弘靈峰遺教。重訂淨土十要。益自撰之觀經初心三昧門。及彌陀經行願儀。厥功至偉。師勤修淨業。雖寒暑不少懈。康熙十七年。在半峰入寂。三日前。異香繞室。年六十一。

師云。淨土持名之法。有三大要焉。一者。六字洪名。念念之間。欣厭具足。如囚出獄。奔託王家。步步之間。欣厭具足。二者。參禪必不可無淨土。為防退墮。寧不寒心。淨土必不可入禪機。意見稍乘。二門俱破。三者。一句阿彌陀佛。非大徹不能全提。而最愚亦無稍欠。倘有些子分別。便成大法魔殃。只貴一心受持。寧羨依稀解悟。以上三要。頗切今時。倘能真實指迷。我願捨身供養。十方三世。共聞此言。

截流大師 蓮宗十祖也。諱行策。蔣姓。宜興人。廿三披剃。專修淨業。常住杭州之西溪等處。大闡蓮宗。弘化殊勝。復撰蓮藏集。淨土法語等書行世。康熙廿一年示寂。年五十五。時有孫翰臣。及吳姓子。同日病亡。一日夜。復蘇。各曰。吾為冥司勾去。繫殿下。忽覩光明徹地。香華漫空。冥王伏地。迎西歸大師。視之。即截公也。吾以光照。遂得放還。

師云。持名貴在一心不亂。無間無雜。非必以快念多念為勝也。但不緩不急。密密持名。使心中佛號。歷歷分明。著衣喫飯。行住坐臥。一句洪名。綿密不斷。猶如呼吸相似。既不散亂。亦不沉沒。如是持名。可謂事上能一心精進者也。○今時淨業學人。終日念佛。懺罪。發願。而西方尚遙。往生不保者。無他。蓋愛椿未拔。情纜猶牢故也。若能將娑婆恩愛。視同嚼蠟。不管閒忙動靜。苦樂憂喜。靠著一句佛號。如須彌山相似。一切境緣。無能搖動。或時自覺疲懈。惑習現前。便奮起一念。如倚天長劍。使煩惱

魔軍逃竄無地。亦如紅爐猛火。使無始情識。銷鑠無餘。此人雖現處五濁之鄉。已渾身坐在蓮華國裏。又何待彌陀垂手。觀音勸駕。而始信其往生哉。

道霈大師 號為霖。丁姓。建安人。十四出家。遍歷講席。至鼓山。依永覺禪師。參三年不悟。辭遊兩浙。復歸鼓山。後因捲簾大悟。於順治十四年。遂嗣永覺。開法廿餘年。海內推為東南第一法窟。著述甚富。尤推尊智者大師。又撰淨土指訣。淨土問答等行世。以念佛法門。自行化他。不遺餘力。嘗云。老僧志在宗門。行在淨土。後隱居。不詳所終。

師云。佛有三身。土有四土。然三身只是一身。四土原是一土。總以法界為體故也。所以圓人念佛。一以貫之。○念佛須信憶二字。不離於心。稱敬二字。不離於口。謂往生淨土。須要有信。千信即千生。萬信即萬生。信佛名字。不離心口。諸佛即救。諸佛即度。心常憶佛。口常稱佛。心常敬佛。

始名深信。○念佛務使字字分明。句句相續。蓋不分明。即是昏。不相續。即是散。一句佛號。歷歷現前。久之自然成就念佛三昧也。

省庵大師 蓮宗十一祖也。字思齊。時姓常熟人。七歲出家。廿四圓具。禪教性相。靡不貫通。住真寂寺。閱藏念佛。三年後。辯若懸河。又詣四明育王禮塔。感舍利放光。因撰涅槃懺。及勸發菩提心文。誦者多淚下。晚居杭州梵天寺。結社互勵。專修淨業。雍正十一年冬。預示次年四月十四西歸。至期日。十日前。已見佛。今再見矣。遂念佛而寂。

師云。願之一字。具該信行。信則信自他。因果事理不虛。（信得自心是佛。他人亦然。念佛為因。往生作佛為果。西方是事。唯心本性是理。一一真實。故云不虛。）行則專事持名。不雜不散。願則心心好樂。念念希求。如此三事。缺一不可。有信行而無願者有矣。未有有願而無信行者也。○問。今既專持名號。云何復令觀想。答。終日持名。暫時觀想。以觀助念。

念則不散。縱令心麤境細。亦可託像而觀。復何疑乎。問觀中見佛。得無魔事否。答。參禪人本不見佛。而佛忽現。此則心境相違。名為魔事。念佛人本自觀佛。佛隨相現。此名感應道交。非魔事也。然須了知所見之佛。如水中月。非有非無。不可取著。若生取著。則恐反成魔事。切宜慎之。○念佛而不發大菩提心。不與彌陀本願相應。終不往生。雖發菩提心。不專念佛。亦不往生。故必以發菩提心為正因。念佛為助緣。而後期生淨土。修淨業者不可不知。○念佛亦有魔事。其由有三。一者教理未明。二者不遇善友。三者自不覺察。三者之中。覺察之心。尤為最要。……大抵生西方佛國。非悠悠散善所能致。萬劫生死。非因循怠惰所能脫。無常迅速。旦暮即至。安得不為之早辦耶。……第恐願力不敵愛力。佛念不勝欲念。悠悠泛泛。半信半疑。則吾莫如之何也已矣。又偈云。南無阿彌陀。何人不知念。雖念不相應。母子難相見。行住及坐臥。常將此心斂。念

念自相續。念來成一片。如此念彌陀。彌陀自然現。西方決定生。終身無退轉。

徹悟大師 蓮宗十二祖也。諱際醒。馬姓。豐潤人。廿二出家。博通禪教。後主北京萬壽寺。聲馳南北。提倡淨土。率眾精修。繼主覺生。亦然。晚居紅螺山。歸者愈眾。遂成蓮宗道場。嘉慶十五年春。預告歸期。囑曰。幻緣不久。虛生可惜。宜各努力念佛云云。果於是年全月十七日。見佛親來接引。遂念佛坐化。眾聞異香滿室。荼毘。獲舍利百餘粒。師云。真為生死。發菩提心。以深信願。持佛名號。此十六字。為念佛法門。一大綱宗。若真為生死。心不發。一切開示。皆為戲論。世間一切眾苦。無過生死。生死不了。生死死生。出一胞胎。入一胞胎。捨一皮袋。取一皮袋。苦已不堪。況輪迴未出。難免墮落。……一念之差。便入惡趣。三途易入。而難出。地獄時長而苦重。是故即今痛念生死。如喪考妣。如救頭然也。

然我有生死。我求出離。而一切眾生。皆在生死。皆應出離。彼等與我。本同一體。皆是多生父母。未來諸佛。若不念普度。唯求自利。則于理有所虧。心有未安。況大心不發。外不能感通諸佛。內不能契合本性。上不能圓成佛道。下不能廣利群生。無始恩愛。何以解脫。無始冤愆。何以解釋。積劫罪業。難以懺除。積劫善根。難以成就。隨所修行。多諸障緣。縱有所成。終墮偏小。故須稱性。發大菩提心也。然大心既發。應修大行。而于一切行門之中。求其最易下手。最易成就。至極穩當。至極圓頓者。則無如以深信願。持佛名號矣。（師說信者。信釋迦無誑語。彌陀無虛願。信以念佛求生之因。必感見佛往生之果。又信我心具之佛。必應我具佛之心。願者。願生彼土。以欣厭心為主。）所謂執持名號者。即拳拳服膺之謂。謂牢持于心。而不暫忘也。稍或一念間斷。則非執持也。稍或一念夾雜。則非執持也。念念相續。無雜無間。是真精進。精進不已。則漸入一心。

不亂。圓成淨業。一心不亂。乃淨業之歸宿。淨土之大門。未入此門。終非穩妥。學者可不勉哉。○一。真為生死。發菩提心。是學道通途。二。以深信願。持佛名號。為淨土正宗。三。以攝心專注而念。為下手方便。四。以折伏現行煩惱。為修心要務。五。以專持四重律儀。為入道根本。六。以種種苦行。為修道助緣。七。以一心不亂。為淨土歸宿。八。以種種靈瑞。為往生驗證。以上八事。各宜痛講。修淨業者。不可不知。○一切法門。以明心為要。一切行門。以淨心為要。然則明心之要。無如念佛。憶佛念佛。現前當來。必定見佛。不假方便。自得心開。如此念佛。非明心之要乎。復次淨心之要。亦無如念佛。一念相應。一念佛。念念相應。念念佛。清珠下於濁水。濁水不得不清。佛號投於亂心。亂心不得不佛。如此念佛。非淨心之要乎。一句佛號。俱攝悟修兩門之要。舉悟則信在其中。舉修則證在其中。信解修證。俱攝大小諸乘。一切諸經之要。罄無不盡。然則一句彌陀。非至

要之道乎。○吾人現前一念之心。全真成妄。全妄即真。終日不變。終日隨緣。夫不隨佛界之緣。而念佛。便念九界。不念三乘。便念六凡。不念人天。便念三途。不念鬼畜。便念地獄。以凡在有心。不能無念。以無念心體。唯佛獨證。自等覺以還。皆悉有念。凡起一念。必落十界。更無有念出十界外。以十法界。更無外故。每起一念。為一受生之緣。果知此理。而不念佛者。未之有也。○一切境界。唯業所感。唯心所現。即其現處。當體即心。凡在有心。不能無境。不現佛境。便現九界之境。不現三乘之境。便現六凡之境。不現天人鬼畜之境。便現地獄境界。如人夢中所見山川人物。皆依夢心所現。若無夢心。必無夢境。設無夢境。亦無夢心。故知心外無境。境外無心。全境即心。全心即境。○觀經是心作佛。是心是佛。二語較之禪宗。直指人心。見性成佛。尤為直截痛快。何也。以見性難。而作佛易。故。何為見性。離心意識。靈光迸露。始為見性。故難。何為作佛。持佛名號。

觀佛依正。即為作佛。故易經云。汝等心想佛時。是心即是三十二相。八十種好。豈非以想念於佛。即為作佛耶。夫成佛是佛。理無二致。而見性作佛。難易相懸若是。豈非念佛較之參禪。尤為直截痛快也哉。一是祖語。一是佛言。何重何輕。何取何捨。學者但當盡捨舊習。虛其心。平其氣。試一玩味。而檢點之。當必首肯。是說為不謬矣。○最初迷真起妄。則曰。一念妄動。末後返妄歸真。則曰。一念相應。是則起妄之後。歸真之前。更有何法。能外此一念乎。是故一念悟。隨淨緣。即佛法界。迷隨染緣。即九法界。十方虛空。是此一念迷昧。一切國土。是此一念澄凝。四生正報。是此一念情想合離。四大依報。是此一念動靜違順。惟依此念。變現諸法。離此念外。無法可得。原此一念。本是法界。從緣而起。緣無自性。全體法界。故得橫徧十方。豎窮三際。離過絕非。不可思議。法爾具此威神。法爾具此功用。今以此念。念於西方阿彌陀佛。求生極樂淨土。正當念時。西

方依正。在我心中。而我此心。已在西方依正之內。如兩鏡交光。相合互照。此橫徧十方之相也。若約豎窮三際。則念佛時。即見佛時。亦即成佛時。求生時。即往生時。亦即度生時。三際同時。更無前後。帝網珠光。難齊全體。南柯夢事。略類一班。此理悟之最難。信之最易。但能直下承當。終必全身受用。可謂參學事畢。所作已辦矣。如或未能。但當任便觀察。隨分受用焉耳。○心能造業。心能轉業。業由心造。業隨心轉。心不能轉業。即為業縛。業不隨心轉。即能縛心。心何以能轉業。心與道合。心與佛合。即能轉業。業何以能縛心。心依常分。任運作受。即為業縛。一切現前境界。一切當來果報。皆唯業所感。唯心所現。唯業所感故。前境來報。皆有一定。以業能縛心故。唯心所現故。前境來報。皆無一定。以心能轉業故。若人正當業能縛心。前境來報一定之時。而忽發廣大心。修真實行。心與佛合。心與道合。則心能轉業。前境來報。定而不定。又心能轉業。前境

來報不定之時。而大心忽退。實行有虧。則業能縛心。即前境來報。不定而定。然業乃造於已往。此則無可奈何。所幸而發心與否。其機在我。造業轉業。不由別人。如吾人即今發心念佛。求生極樂。或觀依正。或持名號。念念相續。觀念之極。則心與佛合。合之又合。合之其極。則心能轉業。而前境之娑婆。轉為極樂。胎獄之來報。轉為蓮胞。便是樂邦自在人矣。若正恁麼時。其心或偶然失照。或忽生退悔。不與佛合。則業能縛心。而前境仍舊。來報依然。還是忍土苦眾生也。然則我輩有志出離。求生淨土者。可弗惕然而警。奮然而發也哉。○夫見道而後修道。修道而後證道。此千聖同途。千古不易之定論也。然見道豈易言哉。若依教乘。必大開圓解。若依宗門。必直透重關。然後得論修道。否則便為盲修瞎鍊。不免撞牆磕壁。墮坑落塹矣。唯淨土一門。則不然。從是西方過十萬億佛土。有世界名曰極樂。其土有佛。號阿彌陀。今現在說法。但發願持名。即

得往生。此乃佛心佛眼。親知親見之境界。非彼三乘賢聖所能知見也。但當深信佛言。依此而發願持名。即是以佛知見為知見。不必別求悟門也。餘門修道。必悟後依法修習。攝心成定。因定發慧。因慧斷惑。所發之慧有勝劣。所斷之惑有淺深。然後方可論其退與不退。唯此淨土門中。唯以信願之心。專持名號。持至一心不亂。淨業即為大成。身後決定往生。一得往生。便永不退轉。又餘門修道。先須懺其現業。若現業不懺。即能障道。則進修無路矣。修淨業者。乃帶業往生。不須懺業。以至心念佛一聲。能滅八十億劫生死重罪故。又餘門修道。須斷煩惱。若見思煩惱。分毫未盡。則分段生死不盡。不能出離同居國土。惟修淨業。乃橫出三界。不斷煩惱。從此同居。生彼同居。一生彼土。則生死根株便永斷矣。既生彼土。則常常見佛。時時聞法。衣食居處。出於自然。水鳥樹林。皆悉說法。同居土中。橫見上三淨土。諸上善人。俱會一處。圓證三種不退。一

生便補佛位。然則淨土一門。最初省求悟門。末後不待發慧。不須懺業。不斷煩惱。至極省要。至極徑捷。及其證入。至極廣大。至極究竟。學者當細心玩味。而詳擇之。毋以一時貢高。失此殊勝最大利益也。○吾人生死關頭。唯二種力。一者心緒多端。重處偏墜。此心力也。二者如人負債。強者先牽。此業力也。業力最大。心力尤大。以業無自性。全依於心。心能造業。心能轉業。故心力唯重。業力唯強。乃能牽生。若以重心而修淨業。淨業則強。心重業強。唯西方是趨。則他日報終命盡。定往西方。不生餘處矣。○佛法大海。信為能入。淨土一門。信尤為要。以持名念佛。乃諸佛甚深行處。惟除一生所繫菩薩。可知少分。自餘一切賢聖。但當遵信而已。非其智分之所能知。況下劣凡夫乎。然十一善法。以信居初。信心之前。更無善法。五十五位。以信為始。信位之前。別無聖位。故菩薩造起信論。祖師作信心銘。以信心一法。為入道要門也。○法藏比丘。對世自在。

王佛發稱性四十八種大願。依願久經無量長劫。修習大行。至於因圓果滿。自致成佛。法藏轉名彌陀。世界轉名極樂。非自性彌陀。唯心極樂乎。但此心性。乃生佛平等共有。不偏屬佛。亦不偏屬眾生。若以心屬彌陀。則眾生乃彌陀心中之眾生。若以心屬眾生。則彌陀乃眾生心中之彌陀。以彌陀心中之眾生。念眾生心中之彌陀。豈眾生心中之彌陀。不應彌陀心中之眾生耶。但佛悟此心。如醒時人。眾生迷此心。如夢中人。離醒時人。別無夢中之人。豈離夢中之人。別有醒時之人耶。但夢中之人。當不自認為真。亦不離夢中之人。別求醒時之人。唯應常憶醒時之人。憶之又憶。則將見大夢漸醒。而夢眼大開。即夢中能憶之人。便是所憶醒時之人。而醒時之人。非夢中人也。夢中人眾多。醒時人唯一。十方諸如來。同共一法身。一心一智慧。力無畏亦然。此乃即一即多。常同常別。法爾自妙之法也。念佛之意。大略如此。○吾人現前一念。緣生無性。

無性緣生。不生佛界。便生九界。若約緣生無性。則生佛平等一空。若約無性緣生。則十界勝劣懸殊。阿祈達王臨終。為驅蠅人以拂拂面。一念瞋心。遂墮為毒蛇。一婦人渡河失手。其子墮水。因撈子故與之俱沒。以慈心故。得生天上。夫一念慈瞋。天畜遂分。則此臨終之緣生一念。不可慎乎。苟以此心緣念彌陀。求生淨土。得不見佛往生乎。但此一念。不可僥倖而致。必須存之以誠操之有素。是故吾輩於此一句彌陀。千念萬念。以致終日終年念者。無非為熟此一念而已。果得一念純熟。則臨命終時。唯此一念。更無異念。智者大師云。臨終在定之心。即淨土受生之心。然唯此一念。更無異念。非在定之心乎。念果如是不見彌陀。更見何人。不生淨土。更生何處。只恐吾人。自信不及耳。○觀經是心作佛。是心是佛。二語既舉。則言外之心不作佛。心不是佛。心作九界。心是九界。心不作九界。心不是九界。等義俱彰矣。噫。果明此理。而猶不念佛者。則吾

末如之何也已矣。○觀經是心作佛。是心是佛。二語。不唯是觀經一經。綱宗法要。實是釋迦如來一代時教大法綱宗。不唯釋迦一佛法藏綱宗。實是十方三世一切諸佛法藏綱宗。此宗既透。何宗不透。此法既明。何法不明。所謂學雖不多。可齊上賢也。○真法無性。染淨從緣。一真既舉。體成十界。則十界全體即一真。是故善談心性者。必不棄離於因果。而深信因果者。終必大明乎心性。此理勢所必然也。○吾人現前一念能念之心。全真成妄。全妄即真。終日隨緣。終日不變。一句所念之佛。全德立名。德外無名。以名召德。名外無德。能念心外。無別所念之佛。所念佛外。無別能念之心。能所不二。生佛宛然。本離四句。本絕百非。本徧一切。本含一切。絕待圓融。不可思議。蓮宗行者。當從者裏信入。○須知一句阿彌陀佛。以唯心為宗。此唯心之義。須以三量楷定。三量者。現量。比量。聖言量也。現量者。謂親證其理也。如羅什大師。七歲隨母入佛寺。見

佛鉢喜而頂戴之。俄而念曰。我年甚幼。佛鉢甚重。何能頂戴。是念纔動。忽失聲置鉢。遂悟萬法唯心。高麗惟曉法師來此土參學。夜宿塚間。渴甚。明月之下。見清水一汪。以手掬而飲之。殊覺香美。至次日清晨。乃見其水為墓中挖出。遂惡心大吐。乃悟萬法唯心。便回本國著述。此皆現量親證也。比量者。借眾相而觀於義。比喻而知也。諸喻之中。夢喻最切。如夢中所見山川人物。萬別千差。皆不離我能夢之心。離夢心外。別無一法可得。即此可以比喻。而知現前一切萬法。但唯心現也。聖言量者。三界唯心。萬法唯識。千經萬論。皆如此說。已約現等三量。楷定唯心。更約事理二門。辨明具造。謂由有理具。方有事造。理若不具。事何所造。所以理具。但具事造。離事造外。別無所具。由有事造。方顯理具。事若不造。爭知理具。所以事造。只造理具。離理具外。別無所造。祇以一念心中。本具十界萬法。即此一念隨緣。能造十界萬法。理具如金中本具。可成餅

盤釵釧之理。事造如隨工匠鑪錘之緣。造成餅盤釵釧之器。又理具如麵中本具可成種種食物之理。事造如水火人工之緣。造成種種食品也。已辨事理。復約名體同異。揀定真妄。佛法中有名同而體異者。有名異而體同者。名同體異。如心之一名。有肉團心。有緣慮心。有集起心。有堅實心。肉團心。同外四大。無所知識。緣慮心。通於八識。以八種心皆能緣慮。自分境故。此則是妄。集起心。唯約第八。以能集諸法種子。能起諸法現行故。此則真妄和合。堅實心者。即堅固真實之性。乃離念靈知。純真心體也。今言唯心者。乃堅實純真之心也。名異體同者。如諸經中所說真如。佛性。實相。法界等。種種極則之名。皆此堅實純真心也。已揀真妄。還約本有現前。折衷指點。以諸經皆言無始本有真心。夫既曰本有。即今豈無。而今現有。即本有也。若無無始。則無現前。若離現前。豈有無始。是故不必高尊本有。遠推無始。但現前一念心之自性。即本有真心。

也。以現前一念。全真成妄。全妄即真。終日隨緣。終日不變。離此現前一念之外。豈別有真心自性哉。古德云。威音那畔。不離今世門頭。眾生現行無明。即是諸佛不動智體。其庶幾乎。由上四義。以顯唯心。故一以唯心為宗也。又一句阿彌陀。以唯佛為宗。以一切萬法。既唯心現。全體唯心。心無彼此。心無分際。於十界萬法。若依若正。假名實法。隨拈一法。皆即心之全體。皆具心之大用。如心橫徧。如心豎窮。以唯心義成。唯色唯聲。唯香唯味。唯觸唯法。乃至唯微塵。唯芥子。一切唯義俱成。一切唯義俱成。方成真唯心義。若一切唯義不成。但有唯心之虛名。而無唯心之實義。以一切唯義俱成。故曰法無定相。遇緣即宗。唯微塵。唯芥子。尚可為宗。八萬相好莊嚴之果地彌陀。反不可以為宗耶。故以唯佛為宗。又以絕待圓融為宗。於十界萬法。隨拈一法。無非即心全體。具心大用。橫徧十方。豎窮三際。離於四句。絕於百非。獨體全真。更無有外。彌滿清淨。

中不容他。一法既爾。萬法皆然。各約諸法當體。絕待無外。是為絕待。又以十界萬法。各各互徧。各各互含。一一交羅。一一該徹。彼彼無障無礙。各各無壞無雜。如當臺古鏡。影現重重。如帝網千珠。回環交攝。此約諸法迭互相望。是為圓融。今合絕待圓融為一宗。正絕待時即圓融。正圓融時便絕待。非離絕待。別有圓融。絕待其圓融。非離圓融。別有絕待。圓融圓融。其絕待。絕待圓融。各皆不可思議。今共合為一宗。則不思議中不思議也。又超情離見為宗。以但約諸法絕待。離過絕非。已超一切眾生情妄執著。三乘賢聖所見差別。若約諸法圓融。圓該四句。融會百非。尤非凡情聖見之所能及。故總立超情離見為宗。初以唯心為宗。次以唯佛為宗。三以絕待圓融為宗。末以超情離見為宗。總此四重宗旨。方是一句彌陀正宗宗旨。豈易言哉。○一切眾生本來是佛。真心本有。妄情元空。一切善法。性本自具。但以久隨迷染之緣。未斷元空之妄。

未證本有之真。善本具而未修。佛本是而未成。今欲斷元空之妄。證本有之真。修本具之善。成本是之佛。而隨悟淨之緣者。求其直捷痛快。至頓至圓者。無如持名念佛之一行矣。以能念之心。本是全真成妄。全妄即真。所念之佛。本是全德立名。全名即德。能念心外。無別所念之佛。所念佛外。無別能念之心。能所兩忘。心佛一如。於念念中。圓伏圓斷。五住煩惱。圓轉圓滅。三雜染障。圓破五陰。圓超五濁。圓淨四土。圓念三身。圓修萬行。圓證本真。而圓成無上妙覺也。一念如是。念念皆然。但能念念相續。其伏斷修證。不可得而思議者矣。以是全佛之心。念全心之佛。實有自心果佛。全分威德神力。冥薰加被耳。一句佛號。不雜異緣。十念功成。頓超多劫。於此不信。真同木石。捨此別修。非狂即癡。復何言哉。復何言哉。○一切眾生。為利鈍十使所使。久經長劫。流轉生死。受大苦惱。不能出離。可悲也。十使者何。即身邊邪見戒。此五為利使。以發動輕便故。

貪瞋癡慢疑。此五為鈍使。由利使所生。對利說鈍故。此之十使。眾生或多或少。各有偏重。若帶之修道。但唯增長邪見煩惱。決無相應分。如欲斷之實難。以此十使。於四諦下。歷三界九地。有八十八使見惑。八十一品思惑。但斷見惑。如斷四十里流。況思惑乎。若見思二惑。毫髮未盡。分段生死。不能出離。此所謂豎出三界也。甚難甚難。然此十使。總名眾生知見。古德謂眾生知見。須以佛知見治之。佛知見者。即現前離念靈知也。然此靈知。不能孑然自立。必隨緣起。不隨佛界之緣。便隨九界緣起。離十界外。無別緣起故。欲隨佛界緣起。無如以信願心。持佛名號。但信貴深。願貴切。持名貴專勤。果以深切專勤之心。信願持名。即是以佛知見而為知見。亦即是念念中。以佛知見治眾生知見也。熾然十使心中。但置一信願持名之心。即轉生界緣起。為佛界緣起。此於修道門中。乃點鐵成金極妙之法。只須赤體擔當。久久勿替。管取金臺可以坐待。寶

蓮不日來迎。是為從此同居。生彼同居。橫出三界。較之豎出者。不亦省力也哉。○修習一切法門。貴乎明宗得旨。今人但知萬法唯心。不知心唯萬法。但知心外無佛。不知佛外無心。但知無量為一。不知一為無量。但知轉山河大地歸自己。不知轉自己歸山河大地。然既不知心唯萬法。豈真知萬法唯心。既不知佛外無心。豈真知心外無佛。所謂一個圓球。劈作兩半。離之則兩傷。合之則雙美也。是故念佛者。必以唯佛唯土為宗。若唯佛唯土之宗不明。則真唯心義不成。果透真唯心義。則唯佛唯土之宗自成。既成此宗。則一句所念之佛。所生之土。全體大用。橫徧豎窮。獨體全真。包羅無外。所念既爾。能念亦然。是謂以實相心。念實相佛。以法界心。念法界佛。念念絕待。念念圓融。以絕待故。全超一切法門。無與等者。以圓融故。全收一切法門。無出其外者。此之謂法無定相。遇緣即宗。繁興大用。舉必全真。一句阿彌陀佛。須恁麼信。恁麼念。方是不

思議中不思議也。○當念佛時不可有別想。無有別想即是止。當念佛時須了了分明。能了了分明即是觀。一念中止觀具足。非別有止觀。止即定。因定即止。果觀即慧。因慧即觀。果一念不生。了了分明。即寂而照。了了分明。一念不生。即照而寂。能如是者。淨業必無不成。如此成者。皆是上品。一人乃至百千萬億人。如是修。皆是如是成就。念佛者可不慎乎。

悟開大師 字豁然。張姓。蘇州人。出家於祥峰。圓具於高旻。既悟心宗。乃開法於荆南顯親寺。旋退隱。歷居雲間。練川等處。後歸寶藏庵。專修淨業。嘗著念佛百問。淨業知津。念佛警策。淨業初學須知。及古道情等書行世。感化甚眾。道光十年夏疾作。寄書遠近緇白。悉以生死事大為勗。且云秋盡當西歸。果於立冬前二日。向西念佛坐化。師云。開眼念佛。心易散動。可閉目念。當念佛時。將心放空。提起佛號。即

念即聽。即聽即念。綿綿密密。行之久久。必有相應時也。但要字字從念頭上著實。句句從求生西方裏出來。更有繫念一法。在不念佛時。將念頭常掛在阿彌陀佛身上。心常清淨。不動不搖。便是得力處。○問曰。雜念從何而來。答。人之一身。只有一念。念佛之念即是他。雜念之念亦是他。只因念佛猶未專。故有少分在佛外。問。此雜念如何除得。答。雜念不須除得。但以此一念。全提在佛上。即無。問。然精力疲弱。不能使之即無奈何。答。道力未充。多諸散亂。收攝六根。漸歸清淨。如猶未能。可置之不理。或目注佛相念。或念注佛相念。自無雜念矣。問。如此確好。但久之雜念復起。如何。答。內心昏濁。外境紛拏。念佛便不得力。甚至雜念纏擾不開。然勿焦燥。但澄淨心思。令一句佛聲從口出。音以耳聞。又復從心中流出。循環貫攝。雜念即無。問。如此甚妙。尚有鈍根者不能。且又如何。答。可將南無阿彌陀佛六字。當念佛一聲。即記在南字上。二聲記無字。

三聲記阿字。又彌。又陀。又佛。而又南字。連環不斷。則妄念無處出生矣。妙空大師。鄭姓。江都人。少業儒。嘗同許雲虛。楊仁山。貫如法師等。商刻大藏經。旋出家。自號刻經僧。凡十五年。已刻三千餘卷。寂後三載。而大般若經始告完成。師自受具之後。持戒精嚴。過午不食。生平著述尤富。後彙刻為樓閣叢書。其中大都為闡揚淨土之作。從而受化者甚眾。如蔣元亮等。均蔚為人望。光緒六年。念佛而寂。年五十五。師云。觀既未易成就。戒亦未易全持。眾福非旦夕可期。妙悟非鈍根可得。大願堅固。更罕有焉。若不再從老實持名上。出一頭地。必致長沉苦海。永受輪迴。千佛慈悲。亦難救度。況持名一行。普攝三根。方便殊勝。莫過於斯。○念佛人于行住坐臥。務常端正。身若端正。心自清淨。當人自驗。誠不我欺。○口既念佛。則禁涉閒言。若一涉及。當思念佛人。不應如是。則猛念佛數聲。以提醒而掃蕩之。○念佛之人。勿雜惡念。于必經之

事。一過即捨。久之意地清淨。遇事即有妙智觀察。此乃念佛轉識成智之謂也。○或高聲。或低聲。或默持。或金剛持。都不相應者。古有擊舌持一法。可取用之。其持法即不動口。亦不出聲。但使繫心一念。惟以舌根。搗擊前齒。心念隨應。音聲歷然。聲不越竅。聞性內融。心印舌機。機抽念根。從聞入流。反聞自性。是三融會。念念圓通。久久遂成。唯心識觀。○所謂隨順持名者。昏沉則經行持。散亂則端坐持。或跪或立或臥。皆隨己便。總使一句佛號不忘。此乃降伏心魔之要術也。○凡遇逆順淨穢。苦樂得失。一切境界時。務須保此一念。不然念隨境界轉去。佛念從此斷絕。豈不可惜矣哉。○對像時。即以此像為真佛。面對心念。其誠敬可知。不對像時。亦應如對像之誠敬。如此念佛。最易感通。黑業亦易消滅也。○世間一切苦人。求閒不得。故不能念佛。今閒矣。又聞此念佛之法。務須綿密接續。振作收斂。方能不負光陰。若使悠悠念去。不能濟事。虛延

歲月辜負四恩。一朝無常忽到。將何以抵對耶。○既有智慧。勿令入狂。最宜靜細念佛。以堅固之。當知智慧人能念佛。則使世間之念佛者益多。且令外道之修行者易返。以有智慧之聲名以啟之。有智慧之作用以救之故也。○老實念佛者。既不逞才能。又不求名利。最為難得。以老實二字。是生西方一條大路。又老實者。不于一句阿彌陀佛外。添一毫妄想也。○凡今生前世。惡果成就。苦報必來。故一分苦。即一分惡也。不可誘于命運之不齊。但當愧其修行之不早。每一想及。身毛皆豎。五內若裂。悲傷感奮。痛不欲生。如此念佛。則字字從肝髓中流出。方是念佛真境。○處一切無可如何之境而不悲者。非人情矣。然處一切無可如何之境而徒悲者。又豈明佛性乎。既悲矣。則當思出苦。而當思與一切眾生。畢竟出苦。當思佛之所以稱大悲者。為其能拔眾生出苦也。我以悲心念佛。求佛之悲。拔我之苦。其宜如何懇切耶。○念佛之心。既已純。

熟于六塵中。唯一聲塵。六根之用。全寄一耳。身亦不覺其旋繞也。舌亦不覺其鼓動也。意亦不覺其分別也。鼻亦不覺其呼吸也。眼亦不覺其開閉也。觀音勢至兩圓通。即是一也。根即塵也。塵即根也。根塵即識也。十八界融成一界也。○一事方畢。一語方罷。尙未打點念佛。而一句佛名。即滾滾出來者。此三昧易成之象也。○念佛之境。孤寂最佳。高低隨宜。緩急隨分。打成一片。正在此時。當知身孤而心不孤也。諸佛及彌陀之心。未嘗暫捨乎我。舉意佛知。開口佛聞。何憂孤寂乎。○病者死之機也。死者凡聖淨穢之關也。病中當作死想。勤念佛名。決定待死。必有光明接引。遂我往生之願。若於病上。略一停想。則一切愛戀恐怖。煩惱安排。種種雜念。一齊現前。生死關頭。如何濟事。若病危時。但記取阿彌陀佛四字于心。勿忘可也。左右侍奉之人。亦宜常將此四字。頻頻提醒。當知百劫千生。所有錯走之路。全在此時一念。斷得清楚。何以故。六道輪

迴皆一念為主。若一念專注在佛。則形雖敗壞。而神不散亂。即隨一念而往生淨土矣。嗚呼。但記取阿彌陀佛四字于心。勿忘可也。

戀西大師 諱古崑。廣信人。年十餘出家。旋即受具。既悟向上。復修淨業。自行化他。唯誠唯懇。後住明州西方寺。以終焉。師自發心至終。日持佛號六萬。二時迴向。寒暑無間。光緒十八年秋。略示疾。無何。向西趺坐。念佛而逝。次年二月。荼毘。眾見頂現十佛像。雙手各現一佛像。因師曾焚二指。分供釋迦。彌陀。頂常然香。供養十方諸佛故也。

師云。奉告有緣之士。于持名時。只要令聲音不絕。不必注著一心不亂。聲音不絕是因。一心不亂是果。因行若真。果必成就。所謂形直則影端。聲和則響順也。可惜今時之人。佛尚不肯常稱。于句句中有銷塵融滯之功。德亦不知。便先想一心不亂。豈非鳥無翼而欲飛。樹無根而欲茂。所以每每念彌陀。每每無滋味。念得妄想多。便向別門去。嗚呼。哀哉。淨

土法門衰敗至此。可謂極矣。願我同倫。出聲記數。努力努力。又當知出聲是口。記數是身。故妙叶禪師云。能運身口之念。勿論其散。但不間斷。自能一心。亦即可名一心。惟行之不休為度。故不必憂散亂矣。偈云。專念阿彌陀。不必除妄想。只要聲不絕。決定生安養。專念阿彌陀。不必參是誰。只要心不亂。決定出輪迴。專念阿彌陀。不必懺宿業。只要仗佛力。決定能消滅。專念阿彌陀。不必斷煩惱。只要佛聲現。決定當時少。專念阿彌陀。不必尋方便。只要心常憶。決定成一片。專念阿彌陀。不必求悟門。只要到西方。決定悟無生。專念阿彌陀。不必報四恩。只要佛不離。決定利群生。專念阿彌陀。不必起疑惑。只要信佛語。決定生彼國。

印光大師 蓮宗十三祖也。趙姓。邵陽人。博通宗教。專修淨業。歷住終南。紅螺。普陀。民十九。至吳。創建靈巖淨宗道場。教人以倫常因果為基礎。念佛生西為歸宿。印贈佛書五百萬部。佛像百餘萬幀。民廿

九年冬。於靈巖念佛坐化。荼毘。卅二齒全存。五色舍利數千粒。世壽八十。僧臘六十。遺著百萬言。弟子廿餘萬。類多賢哲。及黨國聞人。

師云。淨土法門。釋迦彌陀之所建立也。文殊普賢之所指歸也。馬鳴龍樹之所弘揚也。匡廬天台。清涼永明。蓮池。蕩益之所發揮倡導。以普勸乎若聖若凡。或愚或智也。○念佛一法。乃佛教之總持法門。但有專念自佛。專念他佛。兼念自他佛之不同。專念自佛者。如諸經中。深窮實相。以期證悟。乃於五陰。六入。十二處。十八界。七大等諸法中。以般若智照了。達此一切法。當體全空。親見本具妙真如性。及禪宗看念佛的是誰。并各種話頭。以期親見父母未生前本來面目是。此於四種念佛中。名為實相念佛焉。專念他佛。有三種念法。一觀想。謂依十六觀經作觀。或專觀白毫。或但觀丈六八尺之佛身。或觀廣大法身。及具觀十六種觀。二觀像。謂對佛形像。想佛相好光明等。三持名。謂一心稱阿彌陀佛聖。

號。此三種念法。雖不同。皆須具有真信切願。方可與佛感應道交。方可決定現生出此娑婆。生彼極樂。此四種念佛。唯實相念佛。諦理最深。然頗不易修。以唯仗自己戒定慧。及參究照察之力。別無他力補助。若非宿根成熟。則悟尚不易。何況實證。唯持名念佛。下手最易。成功最速。倘能都攝六根。淨念相繼。必於現身。親證念佛三昧。臨終決定往生上品。縱根機陋劣。未證三昧。但以信願持佛名號。如子憶母。常時無間。迨至臨終。感應道交。仗佛慈力。帶業往生。末世眾生。唯此是賴。否則但種來因。難得實益。果能志心持念。念到全心是佛。全佛是心。心外無佛。佛外無心。無念而念。念而無念。心佛兩彰。而復雙泯時。則實相妙理。觀體顯露。西方依正。徹底圓彰。即持名而深達實相。不作觀而親見西方。攝機最普。得益最深。最契末世鈍根之士。大暢如來出世之懷。以故從上知識。多皆注重於持名一門。此念他佛之大致也。至於自他俱念。即所謂

禪淨雙修者。有以專看念佛的是誰。以期明心見性。不以信願求生為事者。雖似禪淨雙修。實為有禪無淨。既無信願。莫由仗佛力以帶業往生。倘未到業盡情空地位。又不能仗自力以了生脫死。是知禪淨雙修。唯具深信願者。方為得益。否則固不如專致力於持佛名號一門也。○念佛一事。最要在了生死。既為了生死。則生死之苦。自生厭心。西方之樂。自生欣心。如此則信願二法。當念圓具。再加以至誠懇切。如子憶母而念。則佛力。法力。自心信願功德力。三法圓彰。猶如杲日當空。縱有濃霜層冰。不久即化。○既欲修持淨業。必須敦倫盡分。閑邪存誠。諸惡莫作。眾善奉行。戒殺喫素。護惜物命。信願念佛。求生西方。內為父母兄弟姊妹。外而親戚朋友。鄉黨鄰里。咸皆以此奉勸。無論彼之能信受與否。固不可不令彼一得聞知也。○念佛人。但能真切念佛。自可仗佛慈力。免彼刀兵水火。即宿業所牽。及轉地獄重報。作現生輕報。偶罹此殃。但

于平日。有真切信願。定于此時。蒙佛接引。○既有真信切願。當修念佛正行。言念佛正行者。各隨自己身分而立。不可定執一法。如其身無事累。固當從朝至暮。從暮至朝。行住坐臥。語默動靜。穿衣喫飯。大小便利。一切時。一切處。令此一句弘名聖號。不離心口。若盥漱清淨。衣冠整齊。及地方清潔。則或聲或默。皆無不可。或睡眠。及裸露洗浴大小便時。及至污穢不潔之處。只可默念。不宜出聲。默念功德一樣。出聲便不恭敬。勿謂此等時處。念不得佛。須知此等時處。出不得聲耳。又睡若出聲。非唯不恭敬。且致傷氣。不可不知。○念佛用功最妙之方法。是都攝六根。淨念相繼。都攝六根者。即是念佛之心。專注於佛名號。即攝意根。口須念得清清楚楚。即攝舌根。耳須聽得清清楚楚。即攝耳根。此三根攝於佛號。則眼決不會亂視。念佛時。眼宜垂簾。不可睜大。眼既攝矣。鼻也不會亂嗅。則鼻亦攝矣。身須恭敬。則身亦攝矣。六根既攝而不散。則心無

妄念。唯佛是念。方為淨念。六根不攝。雖則念佛。心中仍然妄想紛飛。難得實益。若能常都攝六根而念。是名淨念相繼。能常常淨念相繼。則一心不亂。與念佛三昧。均可漸得矣。○欲心不貪外事。專念佛。不能專。要他專。不能念。要他念。不能一心。要他一心等。亦無奇特奧妙法則。但將一箇死字。貼在額顱上。掛在眉毛上。心常念曰。我某人。從無始來。直至今生。所作惡業。無量無邊。假使惡業有體相者。盡虛空界。不能容受。宿生何幸。今得人身。又聞佛法。若不一心念佛。求生西方。一氣不來。定向地獄。鑊湯。爐炭。劍樹。刀山。裏受苦。不知經幾多劫。（師說乃至變餓鬼諸苦。及變畜生諸苦等。）雖欲出離。末由也已。○念佛雖貴心念。亦不可廢口誦。以身口意三。互相資助。況欲攝心以證三昧者乎。○念佛要常作將死將墮地獄想。則不懇切亦自懇切。不相應亦自相應。以怖苦心念佛。即是出苦第一妙法。亦是隨緣消業第一妙法。○念佛時。必須

至誠。或有時心中悲痛起來。此係善根發現之相。但切勿常常如是。否則必著悲魔。凡有適意事。不可過於歡喜。否則必著歡喜魔。○念佛時。眼皮須垂下。不可提神過甚。以致心火上炎。或有頭頂發癢發痛等病。必須調停適中。○大聲念。不可過於致力。以防受病。○掐（音恰）珠念。能防懈怠。但靜坐念佛。切不可掐。掐則指動而心不能定。久必受病。○念佛心不歸一。由於生死心不切。若作將被水衝火燒。無可救援之想。及將死將墮地獄之想。則心自歸一。無須另求妙法。故經中屢云。思地獄苦。發菩提心。此大覺世尊最切要之開示。惜人不肯真實思想耳。地獄之苦。比水火之慘深無量無邊倍。而想水衝火燒則悚然。想地獄則泛然者。一則心力小。不能詳悉其苦事。一則親眼見。不覺毛骨悚然耳。○病與魔皆由宿業所致。汝但能至誠懇切念佛。則病自痊癒。魔自遠離。倘汝心不至誠。或起邪淫等不正之念。則汝之心。全體墮於黑暗。

之中。故致魔鬼擾擾。汝宜于念佛畢迴向時。為宿世一切怨家迴向。令彼各沾汝念佛利益。超生善道。○于未得一心前。斷斷不可萌見佛之念。能得一心。則心與佛合。心與道合。欲見即可頓見。不見亦了無所礙。倘急欲見佛。心念紛飛。欲見之念。固結胸襟。便成修行大病。久之則多生怨家。乘此躁妄情想。現作佛身。企圖宿怨。自己心無正見。全體是魔氣分。一見便生歡喜。從茲魔入心腑。著魔發狂。雖有活佛。亦莫如之何矣。但能一心。何須預計見佛與否。○關中用工。當以專精不二為主。心果得一。自有不可思議感通。于未一心前。切切不可躁妄心。先求感通。一心之後。定有感通。感通則心更精一。所謂明鏡當臺。遇形斯映。絃紘自彼。與我何涉。心未一而切求感通。即此求感通之心。便是修行第一大障。況以躁妄格外企望。或致起諸魔事。破壞淨心。○凡念佛人。各須務實克己習氣。與人方便。凡可說者。雖與我有讐。亦須為說。令其趨

吉避凶。離苦得樂。平時侃侃鑿鑿。與人說因果報應。生死輪迴。并念佛了生死之道。與教兒女為立太平之基等義。心如弦直。語無模稜。居心可以質鬼神。作事決不昧天理。若到臨終。決無此種可憐可憫之現象。(因有黃某臨終時極慘。似當墮餓鬼道。其友人函懇印老證明。此上一段開示。即老人開導其友人者。)○汝之念佛氣悶。非體弱之故。乃業障所使。汝但懇切至誠念佛。如念不來。則心常憶想。能念則仍須用口念。否則但心轉心憶。久久此業即消。以後凡居心行事。必須向厚道一邊做。厚則載福。薄則無福可得。若再加以刻險。奸巧。則便如山峰峻時。任何雨澤皆不受。任何草木皆不生矣。○一句南無阿彌陀佛。綿綿密密。常時憶念。凡有忿怒。淫欲。好勝。賭氣等念。偶爾萌動。即作念云。我念佛人。何可起此種心念乎。念起即息。久則凡一切勞神損身之念。皆無由而起。終日由佛不可思議功德。加持身心。敢保不須十日。即見

大效。若只偶爾念一句兩句，便欲見效，則是自欺欺人。雖亦仍有功德，欲即由此癒病，則決不可得。凡事均以誠為本，修持可不用其誠，而欲得癒病滅苦之利益乎。○念佛之樂，唯真念佛者方知。然必志誠懇切，攝心而念，不可著外境相。否則心地不通，觀道不熟，魔境現前，亦不了知，則殆矣。切囑。切囑。○觀想一法雖好，必須了知所見之佛像，乃屬唯心所現。若認做心外之境，或致著魔發狂，不可不知。若認做外境，作塊然實有，便成魔境矣。合眼開眼，但取合宜可也。○近來修行者，多多著魔，皆由以躁妄心，冀勝境界。勿道其境是魔，即其境的確是勝境，一生貪著歡喜等心，則便受損不受益矣。況其境未必的確是勝境乎。倘其人有涵養，無躁妄心，見諸境界，直同未見，既不生歡喜貪著，又不生恐怖驚疑，勿道勝境現有益，即魔境現亦有益。何以故，以不為魔轉，即能上進故。此語不常對人說，因汝有此種事，固不得不說也。○念佛之人，

當存即得往生之心。若未到報滿，亦只可任緣。倘尅期欲生，若工夫成熟，則固無礙。否則只以求心，便成魔根。倘此妄念，結成莫解之團，則險不可言。○念佛心不歸一，當攝心切念，自能歸一。攝心之法，莫先于至誠懇切。心不至誠，欲攝莫由。既至誠已，猶未純一，當攝耳諦聽。無論出聲默念，皆須念從心起，聲從口出，音從耳入。（默念雖不動口，然意地之中，亦仍有相。）心口念得清清楚楚，耳根聽得清清楚楚，如是攝心，妄念自息矣。○所謂十念記數者，當念佛時，從一句至十句，須念得分明，仍須記得分明。至十句已，又從一句至十句念，不可二十三十。隨念隨記，不可掐珠。唯憑心記。若十句直記為難，可分為兩氣，則從一至五，從六至十。若又費力，當從一至三，從四至六，從七至十，作三氣念。念得清楚，記得清楚，聽得清楚，妄念無從著脚，一心不亂，久當自得耳。○念佛迴向，不可偏廢。迴向即信願之發於口者。然祇宜於夜課畢，及日中

念佛誦經畢行之。念佛當從朝至暮不間斷。其心中但具願生之念。即是常時迴向。○日用之中。所有一絲一毫之善。及誦經禮拜種種善根。皆悉以此功德迴向往生。如是則一切行門。皆為淨土助行。猶如聚眾塵而成地。聚眾流而成海。廣大淵深。其誰能窮。然須發菩提心。誓願度生。所有修持功德。普為四恩三有。法界眾生迴向。則如火加油。如苗得雨。既與一切眾生深結法緣。速能成自己大乘勝行。若不知此義。則是凡夫二乘自利知見。雖修妙行。感果卑劣矣。○每日功課迴向。一一當與法界眾生。若此功課為此。彼功課為彼。亦非不可。然必又有普迴向之願。方為與三種迴向相合。三種迴向者。一迴向真如實際。心心契合。二迴向佛果菩提。念念圓滿。三迴向法界眾生。同生淨土。○曰誠。曰恭敬。此語舉世咸知。此道舉世咸昧。某某由罪業深重。企消罪業。以報佛恩。每尋求古德之修持懿範。由是而知誠與恭敬。實為超凡入聖。了生

脫死之極妙祕訣。故常與有緣者諄諄言之。○律不獨指粗迹而已。若不主敬存誠。即為犯律。而因果又為律中綱骨。若人不知因果。及瞞因果。味果皆為違律。念佛之人。舉心動念。常與佛合。則律教禪淨。一道齊行矣。○念佛法門。以信願行三法為宗。以菩提心為根本。以是心作佛。是心是佛。為因該果海。果徹因源之實義。以都攝六根。淨念相繼。為下手最切要之工夫。由是而行。再能以四弘誓願。常不離心。則心與佛合。心與道合。現生即入聖流。臨終直登上品。庶不負此生矣。○有一祕訣。愷切相告。竭誠盡敬。妙妙妙妙。○向外馳求。不知返照回光。如是學佛。殊難得其實益。孟子曰。學問之道無他。求其放心而已矣。汝學佛而不知息心念佛。於儒教尙未實遵。況佛教乃真實息心之法乎。觀世音菩薩。反聞聞自性。大勢至菩薩。都攝六根。淨念相繼。金剛經應無所住而生其心。不著色聲香味觸法而行布施。乃至萬行。心經照見五蘊皆空。皆

示人即境識心之妙法也。若一向專欲博覽，非無利益。奈業障未消，未得其益，先受其病矣。

弘一大師 諱演音，李姓，字叔同，天津人。肄業於日本美專，執教於國內各校。民七出家，杭州大慈，受具靈隱，慨律學久衰，乃發心宏闡。於是萍居浙閩，專事講述，著有南山律苑叢書等行世。尤服靈巖印公，故亦篤修淨業。恆以生宏戒律，歿歸西方為志。民卅一年秋，於溫陵預知時至，念佛而寂。年六十四，僧臘廿四。火後獲舍利千八百餘粒。

師云：古詩云：我見他人死，我心熱如火。非是熱他人，看看輪到我。人生最後一段大事，豈可須臾忘耶。今為講述如下所列。當病重時，應將一切家事及自身體悉皆放下。專一念佛，一心希冀往生西方。能如是者，如壽已盡，決定往生。如壽未盡，雖求往生，而病反能速癒。因心專誠，故

能滅除宿世惡業也。倘不如是放下一切。專一念佛者。如壽已盡。決定不能往生。因自己專求病癒。不求往生。無由往生故。如壽未盡。因其一心希冀病癒。妄生憂怖。不但不能速愈。反更增加病苦耳。○病未重時。亦可服藥。但仍須精進念佛。勿作服藥癒病之想。病已重時。可以不服藥也。余昔臥病石室。有勸延醫服藥者。說偈謝云。阿彌陀佛。無上醫王。捨此不求。是謂癡狂。一句彌陀。阿伽陀藥。捨此不服。是謂大錯。因平日既信淨土法門。諄諄為人講說。今日患病。何反捨此而求醫藥。可不謂為癡狂大錯耶。○若病重時。痛苦甚劇者。切勿驚惶。因此病苦。乃宿世業障。或亦是轉未來三途惡道之苦。于今生輕受。以速了償也。○自己所有衣服諸物。宜于病重之時。即施他人。若依地藏菩薩本願經。如來讚歎品所言。供養經像等。則彌善矣。○若病重時。神識猶清。應請善知識。為之說法。盡力安慰。舉病者今生所修善業。一一詳言而讚歎之。令

病者。心生歡喜。無有疑慮。自知命終之後。承斯善業。決定生西。○臨終之際。切勿詢問遺囑。亦勿閒談雜話。恐被牽動愛情。貪戀世間。有礙往生耳。若欲留遺囑者。應于健康時書寫。付人保藏。○倘自言欲沐浴更衣者。則可順其所欲而試為之。若言不欲。或噤口不能言者。皆不須強為。因常人命終之前。身體不免痛苦。倘強為移動沐浴更衣。則痛苦更當加劇。世有發願往生之人。臨終為眷屬等移動擾亂。破壞其正念。遂不能往生者。甚多甚多。又有臨終可生善道。乃為他人誤觸。遂起瞋心。而牽入惡道者。如經所載。阿耆達王。死墮蛇身。豈不可畏。○臨終時。或坐或臥。皆隨其意。未宜勉強。若自覺氣力衰弱者。僅可臥床。勿求好看。勉強坐起。臥時。本應面西。右脅側臥。若因身體痛苦。改為仰臥。或面東。左脅側臥者。亦任其自然。不可強制。○大眾助念佛時。應請阿彌陀佛接引像。供于病人臥室。令彼瞻視。○助念之人。多少不拘。人多者。宜輪

班念相續不斷。或念六字。或念四字。或快或慢。皆須預問病人。隨其平日習慣及好樂者念之。病人乃能相隨默念。今見助念者。皆隨己意。不問病人。既已違其平日習慣及好樂。何能相隨默念。余願自今以後。凡任助念者。于此一事。切宜留意。○尋常助念者。皆用引磬。及小木魚。以余經驗言之。神經衰弱者。病時甚畏引磬及小木魚聲。因其聲尖銳。刺激神經。反令心神不寧。若依余意。應免除引磬小木魚。僅用音聲助念。最為妥當。或為擊大鐘大磬大木魚。其聲宏壯。聞者能起肅敬之念。實勝引磬小木魚也。但人之所好。各有不同。此事必先向病人詳細問明。隨其所好而試行之。或有未宜。僅可隨時改變。萬勿固執。○既已命終。最切要者。不可急忙移動。雖身染便穢。亦勿急為洗滌。必須經過八小時後。乃能浴身更衣。常人皆不注意此事。而最要緊。惟願廣勸同人。依此謹慎行之。○命終前後。家人萬不可哭。哭有何益。能盡力幫助念佛。

乃于亡者有實益耳。若必欲哭者，須俟命終八小時後。○頂門溫暖之說，雖有所據，然亦不可固執。但能平時信願真切，臨終正念分明者，即可證其往生。○命終之後，念佛已畢，即鎖房門，深防他人入內，誤觸亡者。必須經過八小時後，乃能浴身更衣。（前文已言，今再諄囑，切記切記。）因八小時內，若移動者，亡人雖不能言，亦覺痛苦。○八小時後著衣，若手足關節硬，不能轉動者，應以熱水淋洗，用布攪熱水，圍于臂肘膝灣，不久即可活動，猶如生人。○凡念佛等一切功德，皆宜迴向普及法界眾生，則其功德乃能廣大，而亡者所獲利益，亦更因之增長。○吾人臨命終時，乃是一生之臘月三十日，為人生最後。若未將往生資糧預備妥穩，必致手忙足亂，呼爺叫娘，多生惡業一齊現前，如何擺脫。臨終雖恃他人助念，諸事如法，但自己亦須平日修持，乃可臨終自在。奉勸諸仁者，總要及早預備才好。

印光法師勸修淨土要言

吾人心性與佛同儔。祇因迷背。輪迴不休。如來慈憫。隨機說法。普令含識。就路還家。法門雖多。其要唯二。曰禪與淨。了脫最易。禪唯自力。淨兼佛力。二法相校。淨最契機。如人渡海。須仗舟船。速得到岸。身心坦然。末世眾生。唯此堪行。否則違機。勞而難成。發大菩提。生真信願。畢生堅持。唯佛是念。念極情忘。念即無念。禪教妙義。徹底顯現。待至臨終。蒙佛接引。直登上品。證無生忍。有一祕訣。剴切相告。竭誠盡敬。妙妙妙妙。

思歸集卷四

印光法師鑑定

思歸子釋如岑敬輯

淨土雜詠

六十餘年片時春夢。覺來剛熟黃梁。浮華幻影。有甚好風光。冷眼兒輕
輕覷破。急翻身。蹬斷絲韁。兒孫戲從他搬演。何必看終場。青山茅屋子。
殘生活計。別作商量。但隨緣消遣。洗鉢焚香。先送心歸極樂。恣逍遙。寶
樹清涼。堪悲也。回頭望處。業海正茫茫。

——莊嚴居士

日月籠中飛鳥。乾坤水上浮萍。百年暫寄少長齡。豈可瞢然不省。好把
塵緣打疊。休將夢境消停。彌陀六字是真經。記取修行捷徑。○不問賢
愚老少。何分貴賤癡呆。有心皆可作如來。佛語流傳固在。一句彌陀極
易。六時繫念無虧。此身誓取紫金臺。應念心心頂戴。

——靈瑞禪師

疊疊叮嚀囑勸。切切彌陀悲願。滔滔的苦海深。層層的業債牽。鬧鬧喧
喧。輪迴了千遍。早早登安養歸船。時時禮古佛垂憐。逍遙遙西方古

路永永住無生國裏證真詮。○急忙忙浮生如電。痛煞煞輪迴千遍。浪滔滔苦海無邊。一心心誰肯把彌陀念。最堪憐。無端愛欲牽。無常一到。只恐風箏斷。四大分離眾業纏。怨愆泥犁苦萬千。懸懸極樂慈尊眼。望穿。

——智達禪師

西方好。隨念即超群。一點歸心憑落日。萬端塵事付浮雲。人世自紛紛。……凝望處。決定去栖神。金地經行光裏步。玉樓晏坐定中身。方好任天真。

——白雲禪師

欲生安養國。承事鼓音王。（鼓音王。即阿彌陀佛。）合掌須西向。低頭禮彼方。嬰兒思乳母。遠客望家鄉。慎重迎新月。殷勤送夕陽。形骸同土木。戒檢若冰霜。想念離諸妄。跏趺在一牀。剎那登淨域。方寸發幽光。骨肉都融化。乾坤極杳茫。太虛含表裏。佛剎據中央。蓮吐葳蕤萼。波翻潑灑塘。樓隨四寶合。臺備七珍妝。鏡面鋪堦砌。荷心結洞房。瑤池無晝夜。

珠水白宮商。渠瑩金沙底。風輕寶岸旁。千枝分赤白。萬朵間青黃。暫挹身根爽。微通鼻觀涼。聖賢雲鬢鬣。天樂日鏗鏘。俊偉純童子。伊優絕女郎。掛肩如意服。擎鉢自然漿。脫體殊清淨。含輝更焜煌。袈裟籠瑞靄。瓔珞襯仙裳。遍往微塵國。周遊正覺場。永懷恩入髓。且免毒侵瘡。回憶娑婆苦。爭禁涕淚滂。

——西齋和尚

○修途十萬一毫端。何謂西方路渺漫。

——古溪禪師

佛境不從心外見。真容多在定中觀。

○西方故國早回還。人命無常呼吸間。

——一元禪師

有限光陰當愛惜。今生蹉過出頭難。

○千劫升沈事可嗟。須彌散骨亂如麻。

——蓮侶居士

於今始覺知慚愧。淚眼晨昏只憶家。

○最怕臨終神識迷。

舌根堅硬氣難提。

若非平日心專一。那得資糧助往西。
——西一居士

○靜觀深時落日斜。了知極樂路非賒。

十年浪子無歸處。一念回光便是家。
——蘭臺居士

○輾轉因緣十二支。塵沙劫數了何時。

空王路下勤稽首。雙淚潛流不自知。
——樂園居士

(空王即指阿彌陀佛)

○稱一弘名哭一聲。聲聲哭向大慈尊。

此回若不歸家去。六道何時得脫身。
——戀西大師

○說著無常事事輕。饑餐渴飲懶經營。

一心不退思安養。萬善同歸憶永明。
——楚石老人

○說著蓮邦兩淚垂。閻浮苦趣實堪悲。

世間出世思惟遍。不念彌陀更念誰。
——夢東大師

○念念彌陀休背覺。心心極樂願還鄉。

何時得受清虛體。壽極河沙不可量。
——省庵法師

○六時叩問黃金父。赤子飄零幾日歸。

話到輪迴無盡處。相看不覺淚沾衣。
——中峰國師

○暫居此地非吾土。遙憶西方是我家。

極樂人民無量壽。不將日月計年華。
——實賢大師

○船上西來望故鄉。寶華池上晚風涼。

飄零不耐歸心切。一片輕旛挂夕陽。
——明本禪師

○夜長易得還鄉夢。歲暮難忘作客情。

十萬憶程安養國。寸心耿耿掛長庚。
——思齊老人

○深宵倚檻窺殘月。薄暮推窗望夕陽。

客路玲瓏久漂泊。苦求佛力早還鄉。
——寸香齋主

○生死輪迴望攝提。心酸徹腑痛沈迷。

回家不待蓮華放。先送神歸落日西。
——昱山法師

○人生百歲七旬稀。往事回觀盡覺非。

每哭同流何處去。閒拋淨土不思歸。
——梵琦禪師

○日夜思歸未得歸。天涯客子夢魂飛。

覺來何處雁聲過。望斷故鄉書信稀。
——楚石老人

○白露秋分涼透窗。客途遊子憶蓮邦。

慈尊何日垂金臂。一片歸心夢不忘。
——昱山法師

○委骸回視積如山。別淚翻成四海瀾。世界到頭終有壞。人生彈指究

何歡。成男作女經千遍。戴角披毛歷萬端。不向此生生淨土。投胎一

錯悔時難。
——優曇大師

○攝心快向樂邦來。莫待無常老病催。若使此生重蹉過。難逃永劫墮

輪迴。天邊落日勤修觀。世上空華莫用栽。念念直前無退轉。寶池坐看一蓮開。

——蓮隱禪師

○娑婆業道事縱橫。說著蓮邦夢也清。一息不來千劫恨。寸心肯捨六時名。如雞抱卵溫相續。似火鎔金鍊愈精。當下情根除卻盡。自然真性現圓明。

——周光居士

○早投清泰為棲息。休向濁塵論有無。煩惱熾時徵定力。念頭起處作工夫。尺香勤課三千佛。寸意隨輪百八珠。慈母倚門虛眼望。可憐遊子尚迷途。

——西齋居士

○漸看鬢髮著霜痕。自省己非自討論。一世竟成何事業。百年還有幾朝昏。急須立志求安宅。休更甘心赴死門。樂國不遙歸有路。蓮臺好去覲慈尊。

——蓮隱禪師

○昔年容易別瓊樓。本也無心作遠遊。豈意而今髮垂雪。片懷常掛月

西鈎。枕中忽聽思歸鳥。檻外頻驚落葉秋。一柱檀煙一聲磬。等閒遙望淚橫流。

——
檀庵大師

○西望紅霞白日輪。仰觀寶座紫金身。一方土淨方方淨。十念心真念念真。生極樂城終不退。盡虛空界了無塵。向來苦海浮還沒。何幸今為彼岸人。

——
西齋和尚

○暮年光景苦無多。電影漚華一刹那。黃葉漸凋真老矣。秋風終夕奈愁何。無心不用貪浮利。有口惟應念佛陀。珍重臨行須努力。莫教萬劫自蹉跎。

——
實賢大師

○淨土因何獨指西。要令心念有歸栖。一門入後門門入。初步迷時步步迷。直就下凡階上聖。不離煩惱證菩提。蓮華勝友應相待。何日歸來手共携。

——
寸香齋主

○我教原開無量門。于中念佛最為尊。都融妄念歸真念。總攝諸根在

一根。不歷三祇修福慧。但稱六字出乾坤。如來金口無虛語。歷歷明文尙具存。

——思齊老人

○一入西方境自融。雙眸頓覺翳銷鏘。無邊刹土光中現。遍界真身象外逢。華襯玉欄紅隱隱。樹含金殿碧重重。色心泯合渾無寄。鏡象分明絕點蹤。

——涅槃懺主

○六月人間暑氣高。炎炎火宅被焚燒。一林樹影藏高閣。十里荷華映畫橋。念佛聲悲頻有淚。思鄉心切更無聊。清涼池上何時返。滌盡煩惱水白饒。

——寸香齋主

○亥時人定絕喧囂。痛策身心莫漫憍。斬斷妄心青草死。推聞昏暗黑山高。淚因憶佛渾難制。愁為思鄉不易消。遙想白蓮華蕊上。定知名字已曾標。

——寸香齋主

○行時正好念彌陀。一佛還隨一步過。足下時時遊淨土。心頭念念絕

娑婆。傍華隨柳須回顧。臨水登山莫放他。等得阿儂生極樂。十方來去任如何。

——省庵法師

○住時念佛好觀身。四大之中那一真。我與彌陀非兩箇。影兼明月恰三人。空房漸朽應難住。腐棟將頽豈易蹲。何日如蟬新脫殼。蓮華胎裡去栖神。

——省庵法師

○坐時觀佛足跏趺。端坐蓮臺華正敷。毫相分明隨念見。金容映現與心符。事如夢幻原空寂。理到圓融非有無。何日池頭捧雙足。親蒙頂上灌醍醐。

——省庵法師

○臥時念佛莫開聲。鼻息之中好繫名。一枕清風秋萬里。半牀明月夜三更。更無塵累心難斷。唯有蓮華夢易成。睡眼朦朧諸佛現。醒來追記尙分明。

——省庵法師

○彌陀慈父願門開。攝受群生等一孩。濃血團中離臭穢。蓮華胞裡受

香胎。但憑信願為良導。只有狐疑是棄材。濁惡娑婆難久住。早同善友賦歸來。

——省庵法師

生西證驗略錄

唐懷玉大師。姓高。丹邱人。執持律法。名節峭然。一食長坐。蚤蝨恣生。誦彌陀經三十萬遍。日課佛號五萬聲。常行懺悔。天寶元年。六月九日。見西方聖像。數如恆沙。一人擎銀臺來迎。玉曰。吾一生念佛。誓取金臺。何為不然。聖像遂隱。玉倍加精進。忽聞空中云。頭上已有光暈矣。請趺坐結印。以俟佛來。越三日。異光滿室。玉云。若聞異香。我報將盡。書偈云。清淨皎潔無塵垢。上品蓮臺為父母。我修道來經十劫。永離娑婆歸淨土。說偈已。香氣盈空。聖眾遍滿。見阿彌陀佛。觀音。勢至。共御金剛臺來迎。玉含笑而逝。邵太守段懷然。作偈讚曰。我師一念登初地。樂國笙歌兩度來。唯有門前古槐樹。枝低只為挂金臺。

——宋高僧傳

僧感并州人。持觀無量壽佛經。阿彌陀經。夢身生羽翼。左觀經文。右彌陀經文。欲飛而身重。又誦二年。夢羽翼長。欲飛稍輕。更誦二年。飛騰無礙。即向西方。到極樂世界。見一佛菩薩云。汝誦經力。得到極樂邊地。汝回娑婆。每日誦四十八遍。千日後。方生上品。感夢覺。如說修行。三年而終。臥處生蓮華七莖。七日不萎。

——三寶感應要略

隋。汶州二沙彌。不知何許人。同志念佛。經五年。長者先亡。至淨土見佛。自言。有小沙彌。與我同修。可得生否。佛言。由彼勸汝。汝方發心。汝今可歸。益修淨業。三年後。當回來此。至期。二人見佛與聖眾自西而來。大地震動。天華飄舞。一時同化。

——佛祖統紀

清。朗然尼。姓沈。嘉善人。幼年見嫂產難之苦。自誓不字。尋出家于淨池庵。專修淨土。閒忙無間。後年七十一。謂其徒曰。吾三月中。已三夢寶池。趺坐華中。往生有分矣。遂無疾坐逝。

——染香集

宋王日休居士。龍舒人。宋高宗朝。舉國學進士。棄官不就。既修淨業。日課千拜。著書名龍舒淨土文。自王臣以至優丐之屬。咸以淨土法門。勸引皈依。其文淺說曲論。至詳至懇。若父兄之教子弟然。後廬陵李彥弼有疾。垂死。夢一人自稱龍舒居士。曰。汝食白粥。疾當瘳。且汝尙憶闕仲雅。教汝修行捷徑否。弼曰。每日念佛不輟。既覺。索粥食之。立癒。彥弼稔聞日休名。尋遣諸子往受學焉。不久回云。日休將卒前三日。遍別道友。勉以精進淨業。云將有行。不復相見。及期與生徒講書畢。禮誦如常。至三更。忽厲聲念阿彌陀佛數聲。曰。佛來接我。屹然立化。弼後見所夢與畫像合而感之。為刻日休像。并述其事。傳遠近。自是廬陵人多祀之。咸祐中。呂元益重刻淨土文。至祝願篇。板中得舍利三顆。其叔父師說載其事於篇首。

樂邦文類

清吳生。杭州人。祖父俱庠生。順治初年。兵圍城。父母失散。生被掠。送張

將官標下服役。生年方十三。自歎吾本儒家子。今下賤若此。必是宿業。遂於佛前立誓。持齋念佛。日誦金剛經。回向西方。年十六。本官發糧充丁。即將糧銀買香供佛。跪誦阿彌陀佛聖號。後忽告本官。欲生西方。本官不信。訶為妖言。次日又至提督前乞假。督怒。批本官捫打五十。毫無怨言。又向各營作別。云某日歸西。至期沐浴焚香。禮佛畢。仍至本官船上叩辭。本官大怒。遣兵迹之。見其西向三拜。端坐說偈曰。身在營中心出家。身披鎧甲是袈裟。刀刀親見彌陀佛。箭箭射開白蓮華。遂自吐火焚其軀。合營官長。皆遙望羅拜。本官合門。因是齋戒。

——蓮莊集

清癡頭道士。姓王。直隸人。極愚。親亡乏食。困餓敝廬。無所為計。或與之錢。亦莫辨其數之多寡。京邑陳道人收為徒。令日掃地拾柴。晚則課彌陀佛號數百。禮拜炷香為度。癡頭誦佛不成韻。每昏沈欲睡。道人以長竿擊之曰。汝愚昧若此。尚不知精進耶。如是者三載。一夕。呵呵大笑。道

人復擊之。癡頭曰。今日打我不得矣。詰其故。曰。師枯坐十八年。不知修法。若能如我老實禮念。早生西方見佛矣。道人奇之。而莫測其謂。翌日癡頭登峭崖。向西合掌。屹立而化。闍維得舍利二粒。

——染香集

評曰。道士往生。古傳罕聞。今癡頭以愚昧之子。為千古特出之人。而黃冠者流。則曰。我學神仙。念佛乃愚夫所為。豈非反被聰明誤耶。

昔天竺阿輸迦國一婆羅門。愚癡無智。愛婦情深。不知厭足。其婦信佛。擊金鼓唱阿彌陀佛。時夫擲入宿。婦乃與約。每夕同擊金鼓唱佛。畢始宿。婆羅門如言。行至三年病死。五日復蘇。泣與婦曰。吾死將入鑊湯地獄。鬼卒以鐵杖打罪人。擊鑊發音。吾驚魂昏憤。記汝擊金鼓念佛聲。遂唱南無阿彌陀佛。頓時鑊湯如涼池。蓮華彌滿其中。所煮罪人皆坐蓮華上。得生淨土。冥王歡喜。放吾還世。說偈云。若人造多罪。應墮地獄中。纔聞彌陀名。猛火為涼池。

——三寶感應要略

宋越國夫人王氏。哲宗從父荆王之妻也。專修淨土。晝夜無間。導諸妾婢。并志西歸。中有一妾獨懈。夫人曰。不可以爾一人。壞我規矩。擯之。妾悚悔。遂益精進。久之弗倦。一日。謂同事曰。吾其行矣。夜聞異香滿室。無疾而逝。越宿。同事者告夫人言。夜夢化去之妾。令致謝夫人。幸蒙訓責。得生西方。感德無量。夫人曰。彼能入我夢。乃可信爾。其夕夫人夢亡妾致謝如前。夫人曰。西方可至乎。妾曰。可。遂導夫人行。頃之。見一大池。中有蓮華。大小間錯。或榮或悴。夫人問其故。妾曰。世間念佛者。才發一念。此中便生一華。勤惰不同。榮悴遂異。精進者榮。怠廢者悴。若歷久不息。念熟觀成。形消神謝。決生其中。中有一人朝服而坐。寶冠瓔珞。莊嚴其身。夫人問曰。何人也。妾曰。楊傑也。又一人朝服而坐。其華頗悴。夫人又問何人。曰。馬玕也。兩人皆修淨業。事載淨土聖賢錄。夫人曰。我當生何處。妾導之行。可數里。望見一華臺。金碧晃耀。光明洞然。妾曰。此夫人生

處。乃金臺上品上生也。既覺悲喜交至。其年遇生日。晨起。秉鑪爇香。望觀音閣而立。諸眷屬方趣前為壽。視之。則已化去矣。

——往生傳

唐張善和。殺牛為業。臨終見牛數十頭。作人言曰。汝殺我。善和告妻。急延僧為我念佛。僧至。謂云。經言。若有眾生作不善業。應墮惡道。至心具足十念。稱阿彌陀佛者。除八十億劫生死之罪。即得往生極樂世界。善和云。地獄至急。不暇取香鑪矣。即以左手擎火。右手拈香。向西厲聲稱佛。未滿十聲。遂云。佛來也。已與我寶座。言訖而終。

——淨土聖賢錄

惡人往生。尚有殺雞之張鍾馗。業漁之宋金奩。業獵之馮珉等。冀讀者。普勸是類。改業念佛。因附之。

清光緒間。湖北黃陂。有某貞女。忘其姓名。幼稟宿慧。父母為擇婿。誓不嫁。從師受菩薩戒。持名念佛。求生淨土。足不出閨闈。一日其嫂令其為兒取湯衣。貞女曰。吾心即佛心。吾手即佛手。不可以不淨觸也。嫂哂曰。

妹異日嫁得夫婿。獨不養子耶。貞女悵立良久。不得已。以兩指拾與之。嫁期將近。示微疾。屢請父母速備後事。嫁之前一日。貞女含笑曰。西方極樂。兒幸往生。母以為念。乃趺坐合掌。念佛化去。坐缸三年。啟視。體貌如生。據別傳云。體貌如生。唯昔曾拾濁布二指。色灰黑。且將脫。

——近代往生傳

民國慈溪一貧婦。忘其姓。家貧。子逆。一日被子罵。心苦難受。訴之鄰近寺僧。僧曰。汝已知苦。何不賣去。婦曰。如何賣得了。僧曰。汝專念阿彌陀佛。求生西方。臨終佛來接去。則永離眾苦。但受諸樂。便把苦賣了。婦曰。我母子共房。灶俱在內。牀下尚作豬圈。如此邈遠。何能念佛。僧曰。無妨。汝在家時。祇管念。暇時來寺拜佛。婦即依教奉行。專求脫苦。念佛無間。二三年後。預示其子云。某日我要生西。當為我料理。盡母子之道。其子不信。久之又言。子亦不信。一日其子忽聞異香撲鼻。不知何來。遍覓無

獲。乃信母言是實。至期見母自沐清潔。穿淨衣。果端坐念佛而逝。時在民國十年前後。如此貧婦。一無所知。念佛數年。尙能預知時至。異香先發。安然坐逝。可見淨土法門。真無人不堪修者。

——淨土聖賢錄

清。丁童子。常熟人。居梅里鎮。七歲時。聞其父母持佛名。亦每朝持之。未幾。有微疾。晨臥。忽蹶然興曰。今日未課佛名。自誤大矣。遂盥漱禮誦畢。復就寢。至晚。告母曰。吾隨佛西去。願勿驚訝。乃連聲誦佛名。良久暈絕。母出不意。猶望其蘇。聞喉中作聲。若欲有言。喚之不應。忽大聲稱大慈大悲四字。遂絕。次日就殮。舉體皆冷。而頂則尙暖也。

——往生持驗錄

民國。查童女。名六慶。九江查賓臣居士之女也。賓臣夫婦與童女皆皈依佛法。民國乙酉年。童女六歲。常言我此房屋逼塞的很。七月廿三。其母將往念佛林念佛。童女定規要隨去。次日即得微疾。終日自結手印。後病轉重。父母懇禱于觀世音菩薩。求加被令好。童女常言。我要去。其

父母見其決定要去。遂問汝往何處去。彼即以手向西指。其父曰。汝去可也。童女即瞑目而逝。

——近代往生傳

佛化大魚。引人念佛。執師子國。海上有島。編戶五百餘。捕鳥為食。忽有無數魚來。唱南無阿彌陀佛。島人不解佛法。依其音唱南無阿彌陀佛。魚即近岸。頻唱。殺之而不去。肉甚美。且久唱得者。味最上。少唱得者。味漸劣。人嗜魚肉。遂皆唱佛名。後一人死。三月後。乘紫雲。放光明來。謂眾曰。吾得生極樂世界。彼佛哀我等愚癡。化作魚身。勸以念佛。汝觀魚骨。皆是蓮華。見者感悟。乃戒除殺生。同皆念佛。

——三寶感應要略

佛化鸚鵡。引人念佛。安息國人。不識佛法。居邊鄙。氣質愚。時有鸚鵡。鳥黃金色。青白文飾。能作人語。國人愛其身肥力強。問曰。汝以何為食。鳥曰。我聞唱阿彌陀佛名。即以為食。若欲養我。但唱佛名。不須別食。諸人聞之。競唱佛名。鳥即飛騰往還。馴甚。鳥曰。汝等欲見豐饒土否。答欲見。

鳥曰。若欲見。當乘我羽翼。諸人乘之。力猶稍弱。鳥勸令念佛。即飛騰虛空。向西而去。國人歎異曰。此是阿彌陀佛。化作鸚鵡。引攝邊鄙。現身往生。即于其地立精舍。號鸚鵡寺。每齋日。修念佛三昧。自是安息國人。初識佛法。念佛往生淨土者甚多。

——三寶感應要略

唐河東裴氏。家有鸚鵡。常狎而敬之。告以六齋之禁。比及晨後。非時之食。終夕不視。或教以持名念佛者。當自有念。以至無念。則仰首奮翼。若承若聽。其後或俾之念佛。則默然不答。或謂之不念。即唱言阿彌陀佛。每虛室戒曙。發和雅音。穆如笙竽。念念相續。聞者莫不灑然。貞元十九年七月。悴而不懌。馴養者知其將盡。乃鳴磬告曰。將西歸乎。為爾擊磬。爾其存念。每一擊磬。一稱阿彌陀佛。既十擊磬。而十念成。斂羽委足。不震不仆。奄然而絕。闍維得舍利十餘粒。節度使韋皋為之記。事見佛祖通載。他如宋元祐間。長沙之八哥。聞僧念佛。遂亦念。亡後以棺葬之。俄

而口生蓮華一枝。出于土面。

——見聞錄

淨土聖賢錄。載上聖下凡。各界異類。共千餘案。讀之自信念佛一法。實乃至簡至要。至頓至圓之勝妙法。

淨土宗略史

圓淨居士原著 思歸子略增

中土各宗裏面。取得最多數的信仰。獲得最普遍的流傳。勢力最為宏深的。便是這一門淨土宗。此宗專教人發願往生極樂世界清淨國土。故名淨土宗。諸大乘經所共讚揚。唯淨土三經。（阿彌陀經。無量壽經。觀無量壽經。）專明其致。般舟。悲華。寶積等經。說來更切。就是此宗的起源。馬鳴菩薩。在大乘起信論中。勸生淨土。龍樹菩薩。著十二禮。和易行品等。天親菩薩。著往生論等。皆淨土弘傳的源流。自佛法傳入中國以後。雖有淨土教的流布。但大弘此宗。實地修持的。當以東晉慧遠大師為第一人。自遠公廬山創立蓮社。一時集會者。大都是法門的龍象。

和儒林的泰斗。一唱百和。無不率從。後來曇鸞。智者。道綽。善導。清涼。懷感。慈敏。飛錫。承遠。法照。少康。永明。諸大德。無不將此自行化他。以後禪宗諸大宗匠。也有明垂言教。極讚此法的。長廬。天衣。圓照。大通。中峰。天如。楚石。空谷等。各大祖師。雖弘禪宗。偏讚淨土。到明朝蓮池大師。自參笑巖大悟之後。便置彼取此。以為淨業若成。禪宗自得。以後紫柏。憨山。滿益。截流。省庵。夢東。等諸大師。亦都如此。（概觀禪淨兩宗。如單提向上。則一法不立。佛尚無著落處。何況念佛求生淨土。此是真諦之一泯。一切皆泯。所謂實際理地。不受一塵。是顯性體的。如果確論修持。則一法不廢。不作務。便不受食。何況念佛求生淨土。即是俗諦之一立。一切皆立。所謂佛事門中。不捨一法。是顯性具的。必欲棄俗諦而修真諦。便非真諦。如棄四大五蘊而言心性。身既不存。心將安寄。如即俗諦而修真諦。即是真諦。如在眼曰見。在耳曰聞。即四大五蘊而顯心性。這就是

從上禪宗諸祖師。密修淨土的大旨。我們知道華嚴是諸經之王。而普賢大士。以十大願王導歸極樂。所以本宗應以普賢為初祖。在中土當時慧遠大師。並沒有開宗立派的用意。但期同願。無取傳承。千百年來。本宗雖流布日宏。卻沒有師資授受的系統。直到宋代。四明曉法師。才取異代同修淨業而功德高盛的幾位大師立為七祖。即慧遠。善導。承遠。法照。少康。延壽。省常等七人。志盤依著這一說。作了一篇淨土立教志。後來雲棲弟子。又奉蓮池大師為八祖。後人更列入蕩益。截流。省庵。徹悟。合為蓮宗十二祖。最近海內緇素。又一體推尊印光法師為第十三祖。這不過是景仰先德。並不如宗教家的師資相承。因為淨土一法。是普被三根。統攝諸法。一切諸法。無不從此法界流。無不還歸此法界的。所以就不特立系統了。這樣看來。我們就知道淨土法門。是釋迦和彌陀所建立的。是文殊和普賢所指歸的。是馬鳴和龍樹所弘揚的。

是匡廬。天台。清涼。永明。蓮池。滿益等。所發揮倡導的。諸菩薩大士。在千百年前。早已為我們遍研藏教。特地揀出了這個不斷惑業。便預補處的。即此一生。便出樊籠的。至圓至頓。至簡至易的。即淺即深。即權即實。統攝禪教律。而高出禪教律的。特殊超越天然妙法了。我們只消依教奉行。自然可以往生西方。果證無生。位登不退的。前途珍重罷。

古德警訓略錄

靜坐常思己過。閒談勿論人非。○大音希聲。大器晚成。大智如愚。大巧若拙。○見人不是。諸惡之根。見己不是。萬善之門。○不自重者取辱。不自畏者招禍。不自滿者受益。不自是者博聞。○心術以光明篤實為第一。言語以簡重真切為第一。容貌以正大老成為第一。○安莫安於知足。危莫危於多言。貴莫貴於無求。賤莫賤於多欲。○人之謗我也。有其能辯。莫如能容。人之侮我也。有其能防。莫如能化。○謙退是保身第一。

法安詳。是處世第一法。含容。是待人第一法。恬淡。是養心第一法。○世路風霜。吾人鍊心之境也。世情冷暖。吾人忍性之地也。世事顛倒。吾人修行之資也。○世人談及生死。鮮不悚慮。往往不能真為生死者。眼前活計。放不下耳。○說我過者是良醫。譽我善者如鳩酒。千古道脈。期我者明師良友。眼前活計。誘我者惡友魔黨。○圓融者無詭隨之態。精細者無苛察之心。方正者無乖拂之失。沉默者無陰險之術。誠篤者無權魯之累。光明者無淺露之病。頸直者無徑情之偏。執持者無拘泥之迹。敏鍊者無輕浮之狀。○世出世事。莫不成於慈忍。敗於忿躁。故君子以慈育德。以忍養情。德育。天地萬物。皆歸我春風和氣之中。情養。乖戾妖孽。皆消於光天化日之下。○學道不難伶俐。難於慎重。發心不難勇銳。難於堅久。涉世不難矯俗。難於自持。作事不難敏達。難於深忍。研義不難領解。難於精確。○學道之人。骨宜剛。氣宜柔。志宜大。膽宜小。心宜虛。

言宜實。慧宜增。福宜惜。慮宜遠。思宜近。事上宜虔。接下宜謙。處同輩宜退讓。得意勿恣意奢侈。失意勿抑鬱失措。作福莫如惜福。悔過莫如寡過。應念身世苦空。切莫隨流逐隊。○常想病時。塵心漸滅。常想死時。道念自生。夫病死正現前時。有何我相可恃。有何五欲可貪。有何名利可戀。古董之可携去。不恃我相。我見伏矣。不貪五欲。煩惱降矣。不戀虛名。體面可放下矣。○世情淡一分。佛法自有一分得力。娑婆活計輕一分。生西便有一分穩當。此事只問自心。不必問知識也。知識亦勸人淡世情。轉活計。專求出要耳。

印光法師普勸全球同胞同念觀音聖號啟

觀世音菩薩。於無量劫前。久已成佛。號正法明。但以悲心無盡。慈誓莫窮。故復於十方世界。現菩薩及人天凡聖等身。以施無畏。而垂濟度。普門品所謂。應以何身得度者。即現何身而為說法。不但現有情身。即山

河船筏。橋梁道路。藥草樹木。樓臺殿閣。亦隨機現。總以離苦得樂。轉危為安為事。凡遇刀兵水火。惡病惡獸。怨家對頭。惡鬼毒蛇。種種危險者。果能至誠稱念。南無觀世音菩薩。即可蒙菩薩加被。轉危為安。現在殺劫瀰漫。全球皆無安樂之處。亦無安樂之人。願中外同胞。同念觀音聖號。同以觀音救苦救難之心為心。同以觀音利人利物之事為事。則人我念空。鬥爭事息。自可同享太平。共樂天常。縱令定業難轉。喪身失命。亦可仗菩薩力。往生西方。則是因宿業而殞身命。蒙佛力而出苦海也。凡我中外同胞。祈共鑑此愚誠。

民國廿六年秋寄居蘇州報國寺 七十七歲老僧釋印光啟

法數名義略錄

○一生補處 即一生成佛之謂也。○二諦 即真俗二諦也。○八十種好 即佛之全身有八十種微妙相好也。○八萬細行 此約大略

而言。實有八萬四千。即行。住。坐。臥。四威儀。各持二百五十條戒。則成一
千。又攝有情。攝善法。攝律儀。三聚戒各一千。成三千。是名三千威儀。又
淫。殺。盜。妄言。綺語。兩舌。惡口。名七支。各有三千。則成二萬一千。又貪。瞋。
癡。等分。四煩惱各具二萬一千。則成八萬四千之數也。又名八萬四千
律儀。○十惡 即上條七支。再加貪。瞋。癡。以此十法。與善相反故。反此
十惡。則成十善矣。○十界 亦名十法界。即四聖。一佛。二菩薩。三緣覺。
四聲聞。六凡。亦名六道。一天。二人。三阿修羅。上三名三善道。四地獄。五
餓鬼。六畜生。此三名三惡道。又名三途。總此聖凡善惡。是為十界也。○
十八界 即眼。耳。鼻。舌。身。意。六根。對色。聲。香。味。觸。法。六塵。和中間能分
別六塵境界之六識。即眼識。耳識。鼻識。舌識。身識。意識。合此六根。六塵。
六識。是為十八界。○三皈 即皈依佛。皈依法。皈依僧。又名三自皈依。
○三昧 梵云三昧。華言正定。即一切禪定之總稱。○三界 即欲界。

色界。無色界。凡一切天人。均在三界內。○三十二相。即佛全身之妙相。共有三十二種。如頂上肉髻相。眉間白毫相。胸前卍字相。脚下千輻輪相。等等是也。前列八十種好。即在此三十二相之中。○三際。亦名三世。即過去。現在。未來也。○三藏。即經藏。律藏。論藏也。○三乘。一聲聞乘。二緣覺乘。三菩薩乘。○三心。一至誠心。二深心。三迴向發願心。又一慈心不殺。具諸戒行。二讀誦大乘經典。三修行六念。迴向發願。上品上生。必具此等諸行。○三摩地。梵語三摩地。此云等至。等謂齊等。離沈掉故。至謂至到。到勝定故。亦云持等。謂持平等心。專趣一境故也。○三身。即法身。報身。應身也。○五逆。一弑父。二弑母。三弑阿羅漢。四破和合僧。五出佛身血。○五無間業。上五逆是五無間地獄業。因。當感五無間之果報如下。一趣果無間。二受苦無間。三時無間。四命無間。五形無間。○五欲。一財。二色。三名。四食。五睡眠。○五濁。一劫

濁。二見濁。三煩惱濁。四眾生濁。五命濁。○心內具三千法。即一心具足十法界。每界又各具十界。則成百界。每界又具十如是。則成千如是。又名字一千。正報一千。依報一千。共成三千。又心既具三千。事造亦有三千。○六度。一布施。二持戒。三忍辱。四精進。五禪定。六智慧是也。○四土。一凡聖同居土。二方便有餘土。三實報莊嚴土。四常寂光淨土。○四重律儀。即不殺。不盜。不淫。不妄語。○四宏誓願。即眾生無邊誓願度。煩惱無盡誓願斷。法門無量誓願學。佛道無上誓願成。○正覺。即佛道也。○安樂世界。即極樂世界也。○阿僧祇。梵語阿僧祇。此云無央數。○阿鞞跋致。梵語阿鞞跋致。此云不退轉。有三種淺深各不同。一位不退。入聖人之流不退。至凡夫地故。二行不退。常度眾生不退。至小乘位故。三念不退。因法執已空。則念念趣向佛果菩提故也。欲知其詳。請閱他書。○阿耨多羅三藐三菩提。梵語也。此云無上正

等正覺。即佛所得之究竟佛果菩提。○恆河沙劫。梵語恆河。又云殑伽河。此云天堂來。其河既闊且長。而沙細如粉。佛說經。每舉以況其多劫者。長時分也。○毘婆舍那。梵語毘婆舍那。此云觀。謂以智照理故。亦云正見。亦云了見。謂觀行成時。境智成時。能了了見性。不昏昧故。○奢摩他。梵語奢摩他。此云止。以寂靜為義。即天台宗之體真止也。○娑婆。梵語娑婆。華言堪忍。即吾人所居之極苦世界之名。謂能忍受其眾苦故。

跋

甲午夏杪。余以因緣得覩思歸集一書。捧讀之餘。如獲至寶。正擬醵資付梓。以廣流通。適晤張郭能諦居士。將本書內容與之詳言。居士念佛心專。素以持名為內行。作諸功德為外行。聞余言。深表同感。遂慨然獨任印費。付印期間。得大光法師接洽校對。以是因緣。余祇靜觀厥成。不禁歡喜讚嘆之至。夫以時丁末法。眾生根鈍。思欲離苦得樂。求其法之最方便。最直捷者。莫如持名念佛。以其三根普被。利鈍兼收故。是以古今大德。專倡念佛法門者。不知凡幾。而眾生根性。宜於念佛者尤多。思歸集者。乃摘錄古今大德所說念佛法要。以策勵念佛行者。俾信心未堅固者。令其堅固。願力未宏大者。令其宏大。行持未踏實者。令其踏實。如是信願行三法具足。必

生淨土無疑。其或未然。請披閱是集。必能望綆影而疾進矣。

乙未仲春 菩薩戒弟子吳蘊齊敬跋

念佛論

湛山倓虛大師為初機學佛略說

大光記述

佛法發源於印度，流傳於中國，乃至世界各國，其目的無非令人覺悟自心，離苦得樂。蓋佛者覺義，自覺覺他，覺行圓滿。又佛以慈悲為本，慈能與樂，悲能拔苦故。

佛出世後，說法四十九年，經後人結集起來，成三藏十二部。因為眾生根性不一，對於所稟教法亦異，傳到中國之後，就在這三藏十二部之中，大致分出來宗、教、律、密、淨五大宗。這並不是佛特意的分出這五大宗來，在佛經裡面也查不出有什麼宗什麼派，是為了適合眾生的根性，在自然的趨勢中，後人繼續前人，各宗所學，才建立了這五大宗。五大宗的宗門下，是教外別傳，專門修禪功，直指人心，見性成佛。教下門頭是先悟後修，由修而證。律宗是專持佛的戒律，先以執身，次第攝心。如五戒、十戒、二百五十戒、菩薩戒、三聚淨戒……等，由於嚴淨戒津

故。乃能由戒生定。因定發慧。密宗是專門持咒。注重事項。須三密相應。這四宗比較起來。最初入手都稍難一點。惟獨淨土宗。最簡單。最直捷。只堅持一句南無阿彌陀佛。念至一心不亂。即可蒙佛接引往生極樂。無論利根鈍根。都能攝受。

修淨土法門。唯一的行持。就是誠心念佛。如果有人要問。為什麼要念佛。現在先就字義上來說明這兩個字。念字是一個今字和一個心字合成的。分開來說。就是今心。合起來說。就是念佛。佛字是印度梵語。具足云佛陀耶。按中國意思來說。就是覺悟的意思。也就是明白的意思。念佛是人人本分的事。也是人人本能的事。念佛的意義。就是求得現前一念心的覺悟與明白。一念具足十法界。所謂十世古今。不離當念。微塵刹土。不隔毫端。如能發心心念佛。則一念念佛。一念覺悟。念念念佛。念念覺悟。一念念佛。一念明白。念念念佛。念念明白。人誰不願覺悟。誰不

願明白。但是人們口裡只管說想覺悟。想明白。而心裡卻存著一些糊塗想。由於心有糊塗想。身體就去。做糊塗事。什麼是糊塗想。就是意三業貪瞋癡。什麼是糊塗事。就是身三業殺盜淫。及口四業。兩舌。惡口。妄言。綺語。由於身口意三業不淨。所以整天六根對六塵。分別聲色貨利。是非好醜。在所知所覺上做活計。念佛就是要回生換熟。放下這些所知所覺。離開能知能覺。而恢復到本知本覺上去。能夠恢復本覺。就能成佛。成佛也並不是另外添了些什麼東西。就是用念佛的功夫。念得打成一片。把人們心裡那些骯髒東西。去得乾乾淨淨。骯髒東西去淨了。佛性也就現前了。

因為人心本來是覺悟的。光明的。其體週遍法界。只因無始闍動。被六塵所蔽。人們的知覺。偏在一方面去。只認識此色身小我。而忽略了盡虛空。遍法界的覺性大我。殊不知人們所認為是我的這個身體。是地。

水、火、風、空、根、識，七大假合而成。如果把它分散開，這個身體就不存在了。例如皮肉筋骨，是屬於地大；血脈津液，是屬於水大；溫熱煖觸，是屬於火大；氣力動轉，是屬於風大；身體內外的虛空，是屬於空大。（如果沒有虛空，就把人憋死了。）另外要有六根，即眼、耳、鼻、舌、身、意，是屬於根大。每一根中，要有一識，即是六識，屬於識大。如果把這些東西都分了家，一個人就不存在，那裡還有個我呢？就是當前由於七大假合有這麼一個我，實際上不過是個臭皮囊。裡面裝一些腥臊爛臭、骯髒東西。比如在我們講開示的時候，忽然有人用一個皮口袋裝滿了大糞，紮上口送進來。我們大家都以為這是骯髒東西，捏著鼻子嫌臭，躲遠遠的，或趕緊把它扔出去，以為是褻瀆。其實我們人人都是個臭皮口袋。我們人的這個臭皮口袋，還不如用一個真的皮口袋裝上大糞送進來的比較乾淨。因為送進來的這個臭皮口袋還紮著口，我們人人

這個臭皮口袋。上下都張著口。直冒臭氣。所謂九竅常流不淨。但是人們就以此臭皮口袋是我。還愛的不得了。這樣化裝。那樣保養。如以佛的眼光來說。實屬愚癡顛倒之甚。

大家應該知道。我們這個身體。大家都認為是我。其實這不是我。而是我所使喚的一個物。應該在「我」字下面加上一個「的」字。稱為「我的」。因為這個身體是屬於我的一部分。像一件應用東西。如果我願意使用它的時候。就用它。不願用的時候。就把它放下。不被其所累。如果放不下。就被它累贅了。

普通一般的習慣。都以這個身體為我。我以外的便是人。許多人我合起來。就是眾生。每個眾生都想多活幾年。相續不斷。就是壽者。其實這都是些假名假相。比如人我。就是相待假。（對待法。以人而有我。以我而有人故。）眾生就是因成假。（假借眾因緣而成故。）壽者就是相

續假。（我人眾生相續不斷故。）如果離開這些，那裡還有個實我呢。況且我以主宰為義，人們這個色身之我，它本身並作不得主。比如人到餓的時候，不吃就不行，渴的時候，不喝就不行。壽命盡了該死的時候，不死也不行。碰到好看的，不多看幾眼也不行。遇到五慾環境，不享受就不行。這已失去主宰之義。殊不知這些吃喝享受是屬於生命上的事。生命是有生有滅的，人們除了生命以外，還有一個慧命，它是永無生滅的。什麼是慧命永無生滅，就是人人本有的知覺性。這知覺性雖是無形無相，然而它能盡虛空，遍法界，無處不有，無處不是。所謂空生大覺中，如海一漚發。念佛就是培養自己的法身慧命，仗佛力，仗自力，求生西方極樂世界，開佛知見，恢復自己的本覺性。

過去的祖師們，如天台智者大師，永明壽禪師，藕益大師，徹悟禪師……等，末了都歸於淨土，專門念佛。因為修其他宗，往往為了根器不

適合。或者遇不到相當人指導，會出毛病走錯路。念佛人，只要信願行具足，腳踏實地去念，既仗佛力，又仗人力，決不會走錯路的。所以說念佛法門最方便，最直捷。

修其他宗，都是仗自力，能斷惑才能證真，說起來很容易，實際上沒有相當功夫，不容易做到。修淨土法門有一種特別好處，可以帶業往生。到極極世界之後，仗阿彌陀佛的力量，和觀世音菩薩、大勢至菩薩及其他諸上善人聚會一處，共同熏修。將來慢慢就可以業盡情空，由凡聖同居土，到方便有餘土，由方便有餘土，到實報莊嚴土，由實報莊嚴土，直到常寂光淨土，得見佛的真身。這是說根性淺薄的話。如果是上乘根性，無論生到任何一個佛土裡，都能圓見四土的。

念佛求往生的好處，只要生到西方極樂世界，就永遠不再墮落，永久不再造業，自己可以慢慢加功進行去修行，直至成佛度眾生為止。修

其他宗固然也很好。任何人也不能毀謗。但是如修不到究竟處。仍然要墮落。如過去無著。世親。師子覺。三位菩薩。當初志同道合。同發願修。唯識觀。生兜率內院。見彌勒菩薩。言明誰先去時。到那裡再回來報訊。後來師子覺先圓寂。一去三年不見回來報訊。過三年後世親又圓寂。當他臨命終時。無著告訴他說。「你到天上見彌勒之後。無論如何。要回來報個訊。」世親去後。過了三年才回來。無著問他。「你為什麼過了這麼多時才回來。」世親說。「我到兜率內院。聽彌勒菩薩一座法。拜了三拜。繞一個圈子就回來了。因為那裡日夜長。不多會功夫。在人間就過了三年。」無著又問他。「師子覺現在何處。為什麼不回來報訊。」世親說。「他生天經過兜率外院。還沒有到內院去。就被五欲所纏。到現在還沒有見到彌勒哩。」無著聽說之後。生天很危險。於是從新發願。不生天。願生極樂。（見智者大師淨土十疑論引證）請想師

子覺已是大乘菩薩位子。在天宮尚被五欲所纏。這是多麼危險的事。其他如修禪定功夫。如果超不出三界去。無論到任何一個天上去。待天福享盡之後。仍然要墮落。去隨業受報。像楞嚴經上所說的無聞比丘。就是一個很好的例證。可是念佛人就沒有這種危險。不是有這麼兩句話麼。「饒你修到非非想。不如西方歸去來。」這是說就是生到四空天的非非想天。壽盡福滿。仍然要墮落。不如生到西方極樂世界。在九品蓮華台之中。縱然生到下下品。還可以慢慢證到上上品。比生到非非想天也強得多。

念佛期內。每天一開始要念彌陀經。常住裡作晚課的時候。每天也要念彌陀經。念一遍。就是把西方極樂世界的依正莊嚴的境界。在心裡熏一遍。使在觀想上。成一種西方極樂世界的觀念。也像一部電影片子。念一遍。就等於把西方極樂世界的影子在心幕上放映一遍。日久

天長。在六根上所接觸的。整個是極樂世界的最勝境界。妙相莊嚴。在現時來說。雖然還沒生到西方極樂世界去。然而在心理上。卻早已被西方極樂世界的境界所包圍。人們的意識在無形中都沈浸在妙相莊嚴的氣氛裡。將來臨命終時。熏業現前。平日所持誦的阿彌陀佛聖號。諸聖眾等。到這時會真的現身來接引你了。平日所憧憬所縈迴的西方極樂世界的清淨妙境。在一剎那頃。也就化現目前了。所謂「自性彌陀。唯心淨土。」眾生就是佛。佛就是眾生。莫不都是性分所具。心即土。土即心。莫不都是唯心所現。祇看人念佛功夫如何。如果信願行堅固不移。自性和佛性打成一片。那麼當下自性即是佛性。佛性即是自性。佛具足無量壽。眾生也具足無量壽。佛具足無量光。眾生也具足無量光。阿彌陀佛有西方極樂世界依正二報。相好莊嚴。眾生也有依正二報。相好莊嚴。在阿彌陀經裡說。「皆是阿彌陀佛。欲令法音宣流。

變化所作。」從這句經文裡，可以證明西方極樂世界的諸般境界，都是隨著阿彌陀佛的福德業相，唯心所現。如果阿彌陀佛能這樣顯現，眾生性和佛性是相同的，眾生又何嘗不能顯現呢？所以說在自性上，就是彌陀，在唯心上就是淨土。在性分上並劃不出那是眾生的邊界，那是佛的邊界，在淨土上也指不出那是唯心的，那是非心的。西方彌陀與自性彌陀，西方淨土和唯心淨土，都是一整個的。可是要明白所謂唯心，並不是所說的人們腔子裡那個六塵緣影的妄心，是說法法唯心。所說的自性，並不是說人身上四大假合的那個習性，乃是眾生所本有的自性。念佛人每天念彌陀經，對這一點要明白，把自己的信心堅固起來。

阿彌陀經是釋迦佛無問而自說的，裡面是說西方極樂世界依正二報莊嚴，及念佛生西方的，它的意義和法華經相同。因為法華經也是

對舍利弗尊者。無問而自說的。佛說過無量義經之後。便入於無量義處三昧。身心不動。放眉間白毫相光。照東方萬八千土。現出種種瑞相。致使聞法大眾。起種種疑難。經過彌勒菩薩和文殊菩薩為大眾決疑之後。佛便從三昧安詳而起。沒用人請問。開口即對舍利弗尊者說。『諸佛智慧。甚深無量。其智慧門。難解難入。一切聲聞辟支佛。所不能知。……成就甚深。未曾有法。……取要言之。無量無邊。未曾有法。佛悉成就。』

我嘗說。「法華經就是廣說的彌陀經。彌陀經就是略說的法華經。」這兩部經都是全事即理的話。並沒像其他諸經。說很多法相名詞。讓人悟理修行等事。所說的完全是以現量心。觀現量境。如果大家對於法華經和彌陀經。細心研究過的。對裡面文義會通起來一對照。就明白了。

法華經共七卷二十八品。前十四品是開權顯實。後十四品是開近顯遠。都是說最上乘法。例如在彌陀經裡說：『若有善男子、善女子、聞說阿彌陀佛執持名號。若一日。若二日。若三日。若四日。若五日。若六日。若七日。一心不亂。其人臨命終時。阿彌陀佛與諸聖眾。現在其前。是人終時。心不顛倒。即得往生阿彌陀佛極樂國土。』在法華經第二十三藥王本事品說：『聞是經典。如說修行。於此命終。即往安樂世界。阿彌陀佛大菩薩眾。圍繞住處。生蓮華中。寶座之上。』意義都相同。其他在阿彌陀經裡所說的國土莊嚴。說佛的壽命。說佛的光明。以及六方佛諸佛護念等。雖然和法華經的文相措詞有廣略不同。但其境界和意義都是理無二致。所以一句阿彌陀佛是最上乘法。包括無量法門。

一句阿彌陀佛念得相應。當下即得六根清淨。例如今在念佛期裡面。眼常看佛。就是眼根清淨。耳聽自己及大眾念佛的聲音。就是耳根清

淨。鼻子嗅著爐裡的香氣。就是鼻根清淨。舌頭反來覆去的念佛。就是舌根清淨。身體在清淨道場裡。天天向佛拜佛。就是身根清淨。念佛。拜佛。心裡想佛。這就是意根清淨。六根清淨。則三業清淨。三業清淨。則身不作殺盜淫。口不兩舌惡口。妄言綺語。意不起貪瞋癡。當下即是十善業。修行人最不容易對治的就是身口意三業。可是這一句阿彌陀佛。就能把三業收攝得住。久而久之。觀念成熟。淨因增長。臨命終時。決定往生極樂。

普通人都以為成佛是件難事。其實並不難。佛和眾生都是一種觀念。功夫所成。佛一念具足十法界。眾生一念也具足十法界。若一念貪心起。就是餓鬼。一念瞋心起。就是地獄。一念癡心起。就是畜生。一念疑慢心起。就是修羅。一念落於五常五戒。就轉於人道。一念落於上品十善。就生天上。若以四諦為觀念。就是聲聞。以十二因緣為觀念。就是緣覺。

以六度為觀念，就是菩薩。以自利利他，萬行平等為觀念，就是佛。又如世間人，亦各有各的觀念。如士農工商，軍政警學，最初都是由於觀念所成。觀念什麼，自己就是什麼。念佛人也是一樣。每天眼裡看佛，嘴裡念佛，身體拜佛，心裡想佛，耳根聽佛，時時刻刻，以超生極樂世界為觀念。這樣到末了，決定能生西方極樂世界，也決定能成佛。

上面我曾說過，中國佛教，在自然的趨勢中，經後人分成了若天宗派。如天台宗、賢首宗、法相宗（亦稱慈恩宗或唯識宗）、淨土宗、真言宗、禪宗、律宗……等，這都是後人為了傳承的關係和學習的專門，才建立起來的。在這些宗派之中，其他宗派都是單純的，唯淨土宗和律宗，其行持和教義，滲入了其他各宗，為其他各宗所共有，而又為佛的七眾弟子所共學。例如天台宗、賢首宗、三論宗、法相宗等，各宗的判教不同，各宗的修觀亦異，但是總起來說，他們都可以以修淨土為最方便。

都可以念佛成佛。就是禪宗。也要參念佛是誰。無論出家在家。亦無論其學佛動機如何。但其學佛的唯一目標。不外念佛成佛。同時在這學佛成佛的過程中。又要共同遵守著佛的清淨戒律。例如中國南北各大叢林。無論其是某一宗或某一派。在他兩次上殿繞佛的時候。都是念「南無阿彌陀佛。」開口說話應答也是念「南無阿彌陀佛。」當然其最終目的。不外是生西方極樂世界見佛成佛。從此可以想見佛法門。是多麼的方便而又普遍。還有佛的戒律。也是最要緊的事。佛法的興盛不興盛。端視後人之於戒律持守不持守。如果大家遵守佛的戒律。佛法就可以持久住世。不然的話佛法就隨著時代而趨滅亡了。

佛在世的時候。處處以身作則。大家都以佛為師。佛滅度後。大家都以戒為師。佛在臨入滅的時候。四眾弟子為請佛住世。圍繞在佛的左右。

抱頭痛哭。這時無貧尊者。在極端悲慟中忽然想起。佛在世的時候。大家以佛為依止。今後佛要入滅了。欲令佛法久住於世。有幾件事情。需要乘佛在世時問明白。這時。阿難尊者也站在佛的旁邊掩面痛哭。因為他是佛的常隨眾。傳持佛法的人。佛在每一次說法的時候。他都在場給佛當侍者。因此無貧尊者讓阿難尊者以四事去問佛。其中的頭兩件事就是第一。佛在世時大家依佛為住。佛滅度後依何為住。第二。佛在世時大家以佛為師。佛滅度後當以何為師。阿難以此去問佛。佛說。我滅度後當依四念處為住。以戒為師。從此可知戒律之於後世如何重要了。

凡是佛的弟子。都要遵守佛的戒律。縱然不能完全持。也要檢要緊的。持幾條算幾條。持總比不持強。南北各大叢林。各有各的規矩。各有各的家風。這些規矩家風。就是人們所共同遵守的戒律。試問那個寺廟

庵堂沒有規矩。就是人們的日常往來。應人接物。也都有一定界限和節制。可見持戒和念佛是同樣重要的。現代律宗大德弘一律師。他雖是專門宏律的人。他個人卻一心一意的念佛。見人也勸人念佛。其他如諦閑老法師。虛雲老和尚……等。亦莫不注重念佛。所謂教演本宗。行修淨土。

普通說起來。佛有七眾弟子。一曰比丘僧。是出家受具足戒的男人。二曰比丘尼。是出家後受具足戒的女人。三曰式叉摩那。譯曰學法女。即是沙彌尼欲受具足戒者。從十八歲至二十歲期間。別學六法（不淫。不盜。不殺。不虛誑語。不飲諸酒。不非時食。）過此即可受具足戒而為比丘尼。四曰沙彌。是出家後受持十戒的男人。五曰沙彌尼。是出家後受持十戒的女人。六曰優婆塞。是在家近事三寶的男人。七曰優婆夷。是在家近事三寶的女人。

在家的念佛人，首先應該歸依三寶，受持五戒。何謂三寶，即是佛寶、法寶、僧寶。佛如現在的娑婆世界教主釋迦牟尼佛，乃至過去諸佛，現在諸佛，未來諸佛。法以軌則為義，就是諸佛所說的言教。僧以傳持為義，就是紹隆佛法，為後人做模範的人。在三寶中有自性三寶，別相三寶，住持三寶。自性三寶是眾生本具，非向外求的。如自己靈明覺照的為佛寶。寂常圓淨的為法寶。融和妙樂的為僧寶。何謂別相三寶，謂此三寶各有人、法、因、果、性、相、體、用的分別。如妙覺及佛的三身，皆謂之佛。真如理體及一切方便法門，皆謂之法。五十位賢聖，皆謂之僧。何謂住持三寶，謂此三寶住持於世，能令佛法傳持不滅，為世間一切眾生所利賴。例如我們現在所看到的佛像、舍利，就是佛寶。所誦經律論藏，就是法寶。出家徒眾，傳持佛的利生事業，就是僧寶。

大家應該知道，讓人歸依三寶，並不是歸依另外的三寶，是要你歸依

自性中本具的三寶。佛譯為知覺的「覺」字。人人都有個覺性。所以歸依佛。就是歸依自己的覺性。人人都可以從自己覺性中流露出無窮的妙理。歸依法。就是歸依自己本具的真如妙理。人人可以持續從真性中發揮的妙理。歸依僧。就是歸依自己持續覺法的融和妙性。絕不像其他宗教。只許神為神。不許人為神。人永遠給神做奴隸。這無奈太不平等了。佛教講究是法平等。無有高下。人人有覺性。人人可以念佛成佛。雖然普通說歸依的時候。是歸依現在的住持三寶。可是那只是給人做引導。主要是讓人歸依到自性的三寶。至於究竟成佛。也絕不是給任何一位佛做奴隸的。念佛人應該對這件事弄明白。成佛絕不是別人可以代替的。也絕不是他人賜給的。是要自己念佛成自性中的佛。

三歸而外。最低限度。應該遵守著五戒。作為念佛的助行。五戒。就是不

殺生。不偷盜。不邪淫。不妄語。不飲酒。不殺生就是仁。不偷盜就是義。不邪淫就是禮。不妄語就是信。不飲酒就是智。持五戒就已經做到了世間的五常。因為世間上所需要的是仁愛。不是殘忍。是道義。不是強暴。是禮讓。不是邪曲。是信實。不是欺詐。是理智。不是愚癡。念佛人持五戒。可以養成仁愛。道義。禮讓。信實。理智。既可做社會的正人君子。又可做為淨土資糧。

三歸五戒之外。對三十七道品中的四念處。和八正道。都應當常作觀念。何謂四念處。第一。觀身不淨。例如一個人來處不淨（從陰道出故）。去處不淨（死變膿血土泥）。種子不淨（父精母血）。內外不淨（內而血肉筋骨等。外而髮毛爪齒等不淨）。究竟不淨（一切都

不淨）。第二。觀受是苦。大概說起來。苦有八種。即是生苦。老苦。病苦。死苦。愛別離苦。求不得苦。怨憎會苦。五陰熾盛苦。細說起來。就有無量諸

苦。例如一個人到家裏，或到社會，沒有沒煩惱的。所謂不如意事常八九。這不如意事，不能種種遂心，就是苦。第三，觀心無常，心念剎那生滅，無有常住。第四，觀法無我，一切法都是假名假相，沒有一處是真我。簡單的說，這就是四念處。常這樣做觀想，也能鞏固自己念佛的信心。

何謂八正道，就是正見、正思惟、正語、正業、正精進、正念、正定、正命。正見是不存邪知邪見，還有不應當看的就不去看它，免得污染了自己的眼。正思惟是不應當思惟的事情就不去思惟它，免得污染了自己的心。正語是不應當說的話，就不去說它，免得污染了自己的口。正業是正當的行業，例如念佛人，和專門在社會上辦慈善事的、當醫生的、病人治好，死人救活，這是一種行業。還有開棺材鋪的、殺豬的、宰牛的，也是一種行業。所謂矢人惟恐不傷人，函人惟恐傷人，同是行業。要找一種厚德積福的正業去做，不要做不正當的。正精進和正業有關。

例如上面所說做各種行業的人，同是一樣的精進。一種是向解脫成佛的路上精進。一種是向墮落惡道的路上精進。還有念佛的人，五更起半夜睡，勇猛精進。這是直往成佛的路上精進。所以正精進和不正精進就不同了。正念的「念」字，就是人的念頭。在人心意剛要發動而還未發動的時候，就叫做念頭。正念就是處處以善心好心做出發點。不要有絲毫歪曲邪僻的心。正定是鑒於凡是正當的事，就一心一意去做。什麼是正當的好事，如念佛是正當的好事，就一心一意念佛。念至一心不亂，入念佛三昧，這就是屬於正定。正命是以上面諸多正當的事情來檢點自己的身口意，自始至終，以清淨身口意三業，順正法而活命，絕不做其他邪命的事情。這樣解釋八正道，祇是應合初機信佛的人。至於按教理往深裡去說，那又不是這麼簡單了。

念佛人除一心一意念佛之外，為了恐怕身心放逸，或信願行不堅固。

可以常拿四念處和八正道來檢點約束自己的身心。至於念佛的方
法，也應按照自己的根性去選擇。大致不外持名念佛、觀想念佛、實相
念佛。還有一種最方便的法子，就是呼吸念佛。往裏一吸氣的時候念
「南無阿彌」，往外一呼氣的時候念「陀佛」。這樣，只要人有一口
氣，就念一聲佛。久而久之，時時刻刻，行住坐臥，不離一句阿彌陀佛。這
方是真精進。當人臨命終時，最後一息氣欲斷時，人一生的行業，也就
隨著最後呼吸的一聲佛去。往生極樂世界，得見阿彌陀佛。

關於念佛得往生的，出家在家，男女老幼，臨命終時種種瑞相，都已載
在往生傳內。這種例子已不勝枚舉。我出家後，據我親眼看到的，就有
二十多位。其他聽說的還不算。現在為了啟發大家的信心，且就我所
看到的，舉出三位來作例子。

第一是出家的修無法師。他是營口人，做磚瓦匠出身。因生活環境不

好。做工時又嫌辛苦。因感到我們這個世界上。只有苦。沒有樂。屢思出苦之法。後聽人說念佛好。遂發心常時念佛。出家後。正式聞佛法。念佛心益懇切。逢人亦必勸人念佛。

民國十八年。我在東北哈爾濱極樂寺請諦閑老法師去傳戒。有一天。外寮一位師傅找我說。從營口來一位修無師。預備發心在戒期裏行苦行。之後領來見我。我問他能做什麼。他說我願發心侍候病人。時定西法師在極樂寺任監院。給在外寮找一間房。住了十幾天。又去找我說。要走。定西法師在旁說。你發心來侍候病人。為什麼剛住十幾天就要走。太無恆心了吧。修無師說。我不是往別處走。是要往生。請監院師慈悲。給預備幾百斤劈柴。死後焚化。定西法師問他。你幾時走。修無師說。在十天以內吧。說完這話之後。他便回自己屋去了。第二天又來找我。我和定西法師說。給法師告假。我今天就要走。請給我一間房。再找幾

個人念佛送送我。定西法師在公墓院內打掃出來一間房。找幾塊舖板。搭一個舖。又到外寮找幾位師傅去念佛送他。在他臨往生之前。送他的人說。修無師你今天要往生佛國了。臨走也應該作幾句詩。或作幾句偈子。留個紀念。修無師說。我做苦工出身。生來很笨。不會作詩。也不會作偈子。不過我有一句經驗的話。可以告訴諸位。就是能說不能行。不是真智慧。大家聽他說這話。覺得很踏實。於是大家齊聲念佛。修無師面西趺坐。也跟著一同念佛。念了不到一刻鐘工夫。就往生了。常住臨時打了一口坐龕。到了晚上裝龕。雖是天氣很熱的時候。其面目清秀異常。身上一點臭味。一隻蒼蠅都沒有。諦閑老法師和一般信佛的人都爭相去看。歎為希有。之後用木柴架起。舉火焚化。紅火白煙。一點邪味也沒有。後潘對鳧老居士聽說這事。特別將修無師生平念佛事蹟。寫一篇文。印出來分給大家看。認為是僧人中的好模範。

第二位是鄭錫賓居士。山東即墨人。業商。因看佛經。知念佛好。遂發心念佛。終身不娶。二十二年在青島。我為他說皈依和念佛的好處。自是念佛心益誠懇。把家裡的事情。完全交給他弟弟料理。自己專心念佛。以後。他習練的能講彌陀經。每年。必由即墨經青島住一兩天。到平度縣給善友們講幾次經。二十四年時。鄭居士還請我去平度講過一次經。二十八年春。鄭居士又經青島去平度縣講經。過了兩個多禮拜。有從平度縣來的人和我說。老法師你知道吧。鄭錫賓居士已經歸喇。（膠東人謂人死曰歸。）我聽他說這話之後。很愕然。我說。前十幾天他在這裡路過時。還很好。為什麼這樣快就故去了。有什麼病。他怎樣故去的。來的人說。鄭錫賓居士在講完彌陀經之後。聽經的人都走了。只剩下五六位辦事人。因大家都是朋友。在一塊吃午飯。飯後。鄭居士請他的朋友給租一間房子。說要走。他朋友說。你要走為什麼還要租

房子。鄭居士說。我要往生。因恐死在別人家裡犯忌諱。他朋友說。我們是多年知交。不要說你是往生佛國。就是臥病不起。死在我家裡也應當。何必另找房子。現在我們這裡有很多念佛念佛的。如果你真有把握往生。也給我們這一方念佛的人看看。作一個榜樣。說完這話。他朋友就在自己家裡收拾出來兩間屋。搭一個舖。鄭居士和他的朋友簡單說幾句告辭的話。抖擻了抖擻身上。在舖上面向西。盤腿坐好。說給諸位告假。我現在要走了。我們同事信佛一場。請諸位念佛送我一程吧。他的朋友在旁說。你臨終時還不說幾句偈子。給我們作個紀念嗎。鄭居士說。不用說偈子。就你們看到的我這個樣子。來去自如。你們就照我這樣行。這就是個很好的紀念。說完這話。大家念佛送他。不到一刻鐘工夫。就含笑往生了。因此在平度縣一帶。人人都知道念佛好。也引起很多人信佛。

鄭錫賓的弟弟，起初看到他哥哥，拋家捨業，專門去念佛，心裡不高興。後來經他的哥哥一再勸說，也勉強信佛念佛，但並不懇切。此次親眼看見他哥哥念佛往生，預知時至，來去自如，知道念佛絕不是騙人的事，於是也一心一意的專門念佛。三年後也預知時至，念佛往生了。不過臨終時，稍微有點病，不如他哥哥那樣痛快。

第三是一位女居士張氏，青島人，生有一子一女。家境很貧寒，其夫在海港碼頭拉車為生。張氏住青島市內湛山精舍附近，精舍內立有佛學會。每到禮拜日，我由湛山寺到此講經，居士們聽完經後，再念一支香的佛。張氏藉此因緣，皈依三寶，得聞佛法，信佛很篤實。平素在家念佛，禮拜日即領其兩個孩子去佛學會聽經，聽完經後，照例跟大家一塊念佛。

二十六年冬，一日清早起來，張氏忽謂其夫曰：你好好領著孩子過活。

吧。我今天要往生佛國了。其夫因為生活奔走，對佛法少熏習，乃怒目斥之曰：「得咧，我們家窮，還不夠受嗎？你還來扯這一套。」說完這話後，不睬他，仍去碼頭拉車。張氏又囑其二子曰：「我今天要往西方極樂世界了，你們倆好好聽你父親的話，不要淘氣。」這時他兩個孩子，大的不過十歲，小的五六歲，聽他母親說這話，也不知是什麼意思，仍舊門裡門外的跑著玩。張氏把家裡的事情略微收拾一下，便洗洗臉，梳梳頭，因是窮家，也沒新衣服換，便換了一套漿洗過的舊衣服，到床上，面西趺坐，念著佛就往生了。她兩個孩子，因在外邊玩的時間久了，肚子餓了，回家吃飯，見其母在床上坐著並未煮飯，趨前呼之不應，以手推之，仍是不動。這時兩個孩子才知道他母親已經死了，於是哭著跑到鄰居家去送信。鄰人聞訊趕至，見張氏雖死很久，仍是面目如生，並讚嘆其念佛功夫深。後其夫由碼頭回來，痛哭一場，因家貧，無以為殮，乃由佛

學會諸居士給湊款。處理其身後事宜。人生最要緊的事。就是念佛了。生死無論如何。大家要按照自己的環境。忙裡偷閑來靜坐一會。念一段時間的佛。在工作時間也可以心裡默念。不然。如果整天淫殺盜妄。作奸犯科。造種種業。難免要墜落三途。輪迴六道。將是受苦無盡了。佛在楞嚴經上說。『汝負我命。我還汝債。以是因緣。經百千劫。常在生死。汝愛我心。我憐汝色。以是因緣。經百千劫。常在纏縛。惟殺盜淫。三為根本。以是因緣。業果相續。』大家請想想。造殺盜淫業。是多麼苦。奉勸大家。要快念佛。多念佛。所謂「念佛一聲。福增無量。禮佛一拜。罪滅河沙。」

以上把念佛的好處。很散漫的說了一個大概。至於詳細處和究竟處。有淨土五經。淨土十要等可參考。現在我為了啟發大家的信心。不過簡單一說。希望大家。既然知道念佛的好處。要具足真信心。都攝六根。

淨念相繼。踏踏實實。至至誠誠。老實念佛。將來同往西方極樂世界去聚會。

一九五〇年庚寅一月一日 於香港華南學佛院大光敬記

善導大師新傳

會集：一、唐道宣大師續高僧傳中會通傳。 (史料一)

二、清貫通師蓮宗諸祖略傳中善導傳。 (史料二)

三、日大野法道教授善導大師與日本 (史料三)

善導大師俗姓朱·誕於隋大業九年(公元六一三年)·生於安徽泗洲(或山東青州)。少出家·後見西方變相與觀無量壽經·便喜誦習十六觀行。恒諦思維·忱節西方·以爲冥契。未逾數載·觀想忘疲·已成深妙。便於定中·備觀寶閣·瑤池·金座·宛在目前。涕泗交流·舉身投地。貞觀十五年·大師廿九歲·至

西河石壁谷玄中寺。見道綽禪師。蒙授無量壽經。（以上根據史料三。下接史料二）見淨土九品道場。喜曰。『此真入佛之津要。修餘行業。迂僻難成。惟此法門。速超生死。於是勤篤精苦。晝夜禮誦。旋至京師。激發四衆。每入室長跪唱佛。非力竭不休。出則演說淨土法門。三十餘年。未嘗睡眠。護持戒品。纖毫不犯。好食供衆。粗惡自奉。所有贖施。用寫阿彌陀經十萬餘卷。畫淨土變相三百壁。修營塔寺。然燈續明。道俗從其化者甚衆。有誦彌陀經十萬至五十萬遍者。有日課佛名自一萬至十萬者。其間得三昧生淨土者。不可紀述。或問念佛生淨土耶。導曰。如汝

所念·遂汝所願。乃自念一聲·有一光明從其口出·十至於百·光亦如之。其勸世偈曰·漸漸鷄皮鶴髮·看看行步龍鍾·假饒金玉滿堂·豈免衰殘病苦。任汝千般快樂·無常終是到來·唯有徑路修行·但念阿彌陀佛。又著觀經四帖疏。或問何故不令人作觀·直遣專稱名號耶·答曰·衆生障重·境細心粗·識颺神飛·觀難成就。是以大聖悲憐·直勸專稱名字·正由稱名易故·相續即生。若能念念相續·畢命爲期者·十即十生·百即百生。何以故·無外雜緣·得正念故。與佛本願相應故。不違教故。順佛語故。若捨專念修雜業者·百中希得一二·千中希得三四。何以故·

雜念亂動·失正念故。與佛本願不相應故。與教相違故。不順佛語故。繫念不相續故。心不續念報佛恩故。雖作業行·常與名利相應故。樂近雜緣·自障障他往生正行故。比見諸方道俗·解行不同·專雜有異。但使專意作者·十即十生。修雜不至心者·千中無一。願一切人等·善自思惟·行住坐臥·必須厲心克己·晝夜莫廢·畢命爲期。前念命終·後念即生。長時永劫·受無爲法樂·乃至成佛·豈不快哉。又作臨終正念文曰·凡人臨終欲生淨土者·須是不得怕死。常念此身多苦·不淨惡緣·種種交纏。若是捨此穢身·超生淨土·受無量快樂·解脫生死苦趣·乃是稱意

之事。如脫弊衣·得換珍服·放下身心·莫生戀著。纔遇有病·便念無常·一心待死。須囑家人·及問候人·來我前者·爲我念佛。不得說眼前閒雜之話·家中長短之事·亦不須軟語安慰·祝願安樂·此皆虛華無益。若病重將終·親屬不得垂淚哭泣。及發嗟嘆懊恨聲·惑亂心神·失其正念。但教記取阿彌陀佛·守令氣盡。若得明解淨土之人·頻來策勵·極爲大幸。用此法者·決定往生·無疑慮也。死門甚大·須自家著力始得。一念差錯·歷劫受苦·誰人相代。思之思之。導一日（下接史料一）在光明寺說法·有人告導曰·今念佛名·定生淨土否。導曰·定生·定生。

其人禮拜訖・口誦南無阿彌陀佛・聲聲相次。出光明寺門・上柳樹表・合掌西望・倒投身下・至地遂死。事聞台省。（上史料一原文・以下據史料三。）

師於唐高宗永隆三年（公元六八一年）三月十四日・怡然長逝。世壽六十九歲。弟子懷暉爲師造塔・並建伽藍（即今香積寺）。大師遺著存世者共五部九卷・計爲觀經疏四卷・往生禮讚一卷・觀念法門一卷。法事讚二卷・般舟讚一卷。

黃心示會集

會集善導大師傳後贅語

本傳以清貫通師之善導大師傳爲主體，兼採唐道宣大師之續高僧傳與日『善導大師與日本』中之原文與史料會集而成。清傳據「樂邦文類」與「佛祖統計」兩書，已較完備，惜仍有欠詳實。故取道宣大師之原文，以正其失實。採日人之史料，以補其未詳。乃成今作。

清傳之首曰：『善導不詳其所出』。而日籍則備載大師姓氏，籍貫，生期，與少年出家求道經過。故採以補之。至於其篇末，則記爲大師登樹，自投而逝。雖與宋戒珠師之《往生傳》，宋王

古之《新修往生傳》·南宋宗曉師之《樂邦文類》所載盡同·但考以唐道宣大師所著·與夫大師塔銘碑記·則可證大師自投之說·實爲傳聞之誤。此已有日大野法道教授論證於前。按道宣大師《續高僧傳》第三十七卷會通傳中所記·乃大師一時說法·有人問話·問者念佛登樹自投。竊計道宣大師乃律宗初祖·法門龍象·又是同代大德·所記當是信史。更據日人考證·大師之龕記·碑銘·塔銘等四種·均無投身自殺之說·由是信知·投身者乃問話之來客·而非說法之大師也。且大師一生戒行謹嚴·軌範人天·焉能於臨終關頭·一反素操·而顯詭異。於是乃刪除清傳舊語

·而代以道宣大師之原文·以復真面。篇末又據日著·略誌大師示寂歲月·身後塔寺與存世遺著·以竟全文。

心示今值勝緣·研讀諸傳·於大師之聖德高風·彌深景仰。信夫·日法然上人讚曰·「彌陀願王之垂跡。」親鸞上人讚曰·「善導獨明佛正意。」我國蓮池大師曰·「善導和尚·世傳彌陀化身·見其自行精嚴·利生廣博·萬代之下·猶能感發人之信心。若非彌陀·亦必觀音普賢之儔。嗚呼大哉。」惜余痴鈍不文·又以史料未充·註經無暇（開始註疏先師夏蓮老會集之無量壽經）·匆匆會集·雖較清傳稍詳·但仍未能彰顯大師之聖德於什一。

它日遇緣·當另作之·或能稍勝耶。

心示敬跋